

# ECI KI CIMANYINU CYÀ

## NSHÌIKIDILU ANYÌ, MUKALENGE?



Twasakidila, wa manza tente, Mwaneetu Neville.

Mwoyi wenu awu diloolo edi, nwênù balunda baanyi baa mushinga mukole. Ndi ne disanka be bwa kwikala mwalukile cyakabidi, diloolo edi, mu mudimu wa Mukalenge, Nzambi wetu.

<sup>2</sup> [Mwaneetu Neville udi wambila Mwaneetu Branham ne: “Eci nunku ke cidi cyasa ku nzembu, *apa*.”—Muf.] Eci nunku ke cidi, *eci* ke cyôci. Kaa, eyo. Mbîmpè.

<sup>3</sup> Mvwa munulame mukùngùlù mule be, mu dinda emu, mu mushindu wa ne ndi ngumvwa ne bidi bikengela ngènzèku ne mitàlù bwa diloolo edi. Um-hum, uh-huh, uh-huh. Ekelekele, mushindu mwine uvwabi bwalu bukole, panuvwa anu kacya nwîmana kuulu apu, mbibi be kabidi diloolo edi. Pa nanku, kabyakunengaku katuyi banupetele myaba to, nwamonu’s, padi anu ekeleeziya ujika. To, kadi katwena balongolole bwa kushaala mukùngùlù mupitepite bule diloolo edi to.

<sup>4</sup> Kadi, bwa maalaba diloolo kaayi, tudi twipacila bwa kushaalaku ndambu wa dîbà. Maalaba diloolo, piikala bamwe baa kunudi ne mushindu wa kulwa, maalaba diloolo, mona’s, tudi batekemene ne netwikale ne cikondo cya dicyonkomoka mu Mukalenge. Nekwikale bantu balenga baa dikema mwaba ewu maalaba diloolo. Twêtù bônso, netwikale ne cikondo . . .

<sup>5</sup> [Mwakunyende wa balume wa Mwaneetu Branham, Edgar Branham, udi wamba ne: “Kaa, munanga wanyi, indila! Mbandombe bwa kukulomba. Mvwa mupwe mwoyi bwa kukwambila. Kadi, bantu bààbûngi mwaba ewu badi bamba ne wêwè utu anu maja lubilu ngoma lubilu, bwa kupatuka mu disangisha. Kadi maalaba diloolo’s udiku mwa kumba kwangacilamu dîbà dyônso dyûvwà muswe adi, kuumukila pa dîbà mwandamutekete too ne pa dîbà dikumi ne ibidi, pawikala anu muswe kudyangata. Mpindyewu, ke cidi bateeleji aba bandombe bwa mêmè kukulomba ncyôci aci. Pa nanku mpindyewu wêwè ùbûmvwijèci, pawikala kuyi wela meeji nanku to.”—Muk.]

<sup>6</sup> Netufile meesa a Mukalenge mundankulu, maalaba bufuku. Ndi mutwishibwe ne nenu—nenujinge kwikala ne . . . kwikadilamu. Padi bakwabo munkaci mwa kwela mbila mikole ya disanka ne kwela mikunda, ne kutuuta midilu muulu, kunwa maala, ne bikwabo apu, twêtù kaayi netwinyike mitù ne kaneemu kônso kumpala kwa Nzambi [Katupa kaa mukaba

wa mēyi munda mutupu—Muf.] ne twangata meesa a Mukalenge, bwa kubanga cidimu ne mucipu wetu, myoyi kudi Nzambi, mu didilambula kudiYe.

<sup>7</sup> Nenku nekwikale baakudi balenga baa dikema mwaba ewu maalaba diloolo, cya bushuwa menemene. Bàdikù balenga baa dikema. . . Mwaneetu wa ku Géorgie mmulwe kaaba aka, Mwaneetu Palmer, mwakudi mulenga wa dikema. Mwaneetu Junior Jackson neikale kaaba aka maalaba diloolo; Mwaneetu Beeler, Mwaneetu Neville. Kaa, ekelekele, ekelekele! Nenku tutungunuka anu kutunugunuka, balume baa Nzambi balenga baa dikema biikalà kaaba aka, Mwaneetu Willard Collins, ne bânà beetu bônso abu bàtù bàtùyiishà mayiisha manene a dikema abu. Ne pàmwāpa bakwabo nebafikilepu, pa nanku netutekemene cikondo cya dicyonkomoka maalaba diloolo.

<sup>8</sup> Mpindyewu mukajaanyi yēyè uvwa wamba ne: “Kwambi eci to,” kadi bikengela anu ncyāmbè nansha bishi. Nwamfwilaayiku luse mündi mwambe *bukalenge bwalabale*, mu dinda emu, pamutu paa kwamba *mwedi wa kashiba*.

Billy, udi musòmbe paanyima pàapa wawa, kwambaye ne: “Ki yēyè wābangi awu’s.”

<sup>9</sup> Mēmè ne: “Bukalenge bwalabale; bikengela ikale ne bukcalenge bwalabale.” Mvwa nswa kwamba ne, mwedi wa kashiba.

<sup>10</sup> Mēmè ndi bu civwabo bamba bwa mwena Hollande awu, nudi bamanye’s. “Nenku kanwikadi nungangacila ku bîndi ngamba to, ikalaayi nungangacila ku bîndi nswa kwamba.”

<sup>11</sup> Mēmè kwamba ne: “Ndi ngeela meeji ne badi bangumvwa, paanyima paa bidimu byōnsò ebi.” Nudi bamanye ne, eci cidi anu bu. . .

<sup>12</sup> Mbidimu makumi asatu ebi bîndi mu cyambilu eci. Bidimu makumi asatu mu tabernacle ewu! Bivwa bikengela nwikaleku bamanè kumanya mpindyewu, kî mmwômò anyi? Kaa, ekelekele! Ncyā bushuwa ne twanyi tulaasa tulonga kî ntukumbane cipidi to. Kadi ndi—ndi mumanye ne ncyēna mumanye mwa kwakula to, kadi ntu ngenzela Mukalenge mutooyi udi ne bulelela.

<sup>13</sup> Nenku, mwaneetu, ngeela meeji ne uvwa n’Docteur Lamsa, mwena Bible wa Lamsa, uvwa mu dikudimuna awu, wākamba ne. . .

<sup>14</sup> Musangu kampana wûmvwà ngaakula, kadi nciyi mumanye ne yēyè uvwa mwaba awu to. Ki kwalukilaye ne kubangaye kwakula pa Ulimà Tuumimà, ki pashiishe wakula pa Bukênkè bwabwa. Ki kwambaye ne: “Ncilumbu kaayi eci’s ne bantu aba leelu ewu?” Ki mēmè ne. . . Yēyè ne: “Kabingila kavwa kenze ne bantu, bakudimunyi, kabavwa mwa kukudimuna Bible mu mushindu mujaalame, mbwalu bakudimunyi baakateeta

kukudimuna mu cyena Yiddish cya citumbuke. Pende Yesu, mu kwakula, ùvwa wakula ngaakwilu wetu wa patupu ewu, anu muvwa bantu baa mu mìsèsèsu baakula amu.”

<sup>15</sup> Nenku, nudi bamanye’s, kudi Mufundu mu Luuka emu, udi mwambe ne: “Bantu beetu baa patupu aba bavwa baMuteeleja ne disanka.” Yèyè uvwa wakula mu ngaakwilu wabo bôbò. Ndi ntekemena ne ki mudibi nanku, cyakabidi.

<sup>16</sup> Tudi ne disanka bwa Mukalenge. Mpindyewu, ndi mumanye, ndi mmona bainábànzà baba biimane kuulu. Mbibi be bwa kumona bantu balume biimane kuulu, katuyi twamba bwa bânà baa bakaji ne baa balume baba, ne bainábànzà, ne bikwabo, biimane kuulu benda balonda bimanu, ne bânà bakese. Kadi, katwena anu ne myaba micyankame ya kusômba to. Pa nanku, tudi tulomba ne, musangu walonda wutwikala mwa kwenza masangisha, paanyima paa elu lumingu, paanyima paa ewu musangu. . .

<sup>17</sup> Nudi bamanye’s, cintu cìdì cìlondà citudi balongolole, bwa ku dyetu dimanya, m’Bitampi Mwandamutekete abi. Nenku, bu Mukalenge mwa kwanyisha, netubibange padibi anu ne ekeleeziya nyawu wajiki, dimwibaka, bwa twamona mwa kubwelela muneemu emu. Netulwe bwa dimulambula dya cyakabidi. Ne pàmwäpa dîbà kanà dyônsò kubangila ku lumingu lumwe too ne ku yibidi, ne pàmwäpa mbingu yisatu, kacya anu byàngatangana’s, tudisangisha mpindyewu, biya nanku bwa—bwa Bitampi Mwandamutekete. Pa nanku, tudi tutekemena cikondo cya dicyonkomoka mu Mukalenge, mu ciine cikondo aci. Nenku netwikale. . . Nwênù bônsò baa pambelu paa cimenga abu, netunutumine twarta ne bikwabo byônsò ku poste, bwa kunumanyisha anu dîbà adi menemene, pàmwäpa lumingu lujima, anyi yibidi, kumpala kwa dîbà.

<sup>18</sup> Mwenji wa makumi a bya diibaka naabi, mûngûmvù Billy wamba diloolo edi, mmufwanyine kujikija byônsò mu matuku dikumi a ngondo mwibidi. Ee, yèyè mujikije mu matuku dikumi, netubange lwà ku matuku dikumi ne ataanu, pa dîbà adi. Pa nanku, padibo anu ne baajikiji, netubangile dyakamwe pa cyôci aci.

<sup>19</sup> Mwaneetu wa bakaji mununu Kidd uvwa mumbiikile, abidi adi panshi aa, wamba kudila ne mwadi wa binsonji ewu. Wamba ne: “Mwaneetu Branham, tudi bateete ne mwetu mwônsò bwa kuteemesha mashinyi a kale awu, kadi kaâyikù mwa kuteema to. Pa nanku,” yèyè ne, “sambilaku bwa kuteemawu, nenku nêndwe maalaba.” Ki yèyè ne: “Ncyêna mumanye ne ngâpeta mwaba wa kusômbela’s?”

<sup>20</sup> Mêmè ne: “Kuditacishi to, netunupetele cibambalu, Mwaneetu wa bakaji Kidd, panudi anu nufika. . .”

<sup>21</sup> Wêwè kwamba ne: “Mwoyi webe ubeneshiibwe.” Wêwè kwamba ne: “Udi mumanye’s, wêwè mwenze masangisha too

ne pa dībà dikumi ne ibidi wa bufuku,” ne, “ncyêna muswe kupatuka pa dībà dikumi ne ibidi wa bufuku to.”

<sup>22</sup> Nudi bamanye’s, yêyè ne Mwaneetu wa balume Kidd bakaadi ne bidimu bitwe ku makumi mwandamukulu ne bitaanu, muntu ne muntu, kadi bacidi anu mu mudimu wa bwambi. Nudi bamanye citubo benza anyi? Batu bangata cisanji cya mikaba ya mêyi, bangata Mayiisha aanyi ne benda baya ku lupitaadi ne ku lupitaadi, ku nzubu ne ku nzubu, bendesha mikaba ya mêyi ayi. Mpindyewu, aci cyôci kaciyi ne, kabayiku balekela to! Aci’s ki dibenga kulekela mudimu. Aci’s ki kushaala anu kacya baakwata ku Diitabuuja, too ne kundekeelu, bafwa ne Mwele wa mvita mu cyanza. Kalume kaanyi anu nanku. Awu’s ki mushindu wûndi mêmè muswe kwenza. Uh-huh.

<sup>23</sup> Nenku pashiishe, kwambaye ne: “Udi mumanye’s, bu mêmè mwa kupatuka, mu cibeeba mwônsò amu, pa dībà dikumi ne ibidi wa bufuku,” yêyè ne, “ne paanyima paa dībà dikumi ne ibidi bufuku abu, nkeba bwa kafika kumbelu, ne démons yônsò yidi mikwacike maala ayi,” yêyè ne, “yenda yendesha mashinyi,” yêyè ne, “yenda yinyeemesha mu mishindu yônsò naka, yenda yinwa maala.” Yêyè ne: “Démons yidi inyeemakanà eku ne eku ayi,” yêyè ne, “s’ndi mufwanyine kuumvwa bwôwà bu wa kufwa.”

<sup>24</sup> Mwaneetu Pat, mwaneetu wa bakaji ewu’s nkakwacikwetu kakulakaji. Mbanganyi badi bamanye Mwaneetu wa bakaji Kidd? Útu ùsòmbela apa, bwa, ùdi anu kakwacikwetu kaa mmwenekelu wa cijila.

<sup>25</sup> Nenku, pa dībà adi, anji elaayi anu meeji, bidimu kumpala kwa mêmè ewu kulediibwa (paanyi nyewu nkaadi muntu mukole), yêyè uvwa mu mikuna mwamwa, yêyè ne Mwaneetu wa balume Kidd. Úvwa mwa kwikala usukwilangana bilàmbà, dituku dijima, pa dibaya dya kusukwila bilàmbà, bwa kupeta meeyà dikumi ne ataanu anyi makumi abidi ku disukwilangana dya bilàmbà, bwa kutumaye bayende ku mwaba kampanda, diloolo adi, bwa kuyaye kayiisha. Mu mines ya makala ya mu Kentucky mwamwa yaya, munudi...mùvwà mùkèngelà bwa muntu kampanda ikale mukulamè ne cingoma, bwa kubànda kakuna aku, too ne ku mwaba wùvwà uya bwa kuyiisha awu. Kaa, ekelekele! Pa dībà adi, mêmè ndi ndyambidila mundamunda ne:

Ndi ne cya kwambwibwa bwa kwalukila kwetu  
ku Dyulu  
Pa bulaalu bwa maalu mapeepele bulengeja ne  
bilòngò,  
Padi bakwabo balwe mvita bwa kupeta difutu,  
Ne benzele lwendu pa mbû ya mashi anyi?

Ndi ne cya kulwa mvita piikalabi ne ndi ne cya  
kukookesha,  
Mvudijileku dikima, Mukalenge.

<sup>26</sup> Mbwena kwamba ne, ndi njinga dikwacisha dya kudiYe, ku Dîyì Dyende. Ki cîndi muswe diloolo edi. Mpindyewu, ngeela meeji ne bisanji bìdì bikwata mèyì mbikàngula mpindyewu.

<sup>27</sup> [Mwaneetu wa balume mukwabo udi wamba ne: “Wàmanya’s kulu kupwa mwoyi dilambula dya bânà.”—Muf.] Kaa, eyowa’s we. Ndi ne . . . Mfwilaayiku luse.

<sup>28</sup> Mwaneetu wa bakaji mutekete uvwa ne mwânà wa mu diboko kaaba aka, mu dinda emu, uvwaye ukeba bwa bamulambule. Nenku mêmè kumwambila ne netücyenzè bushuwa diloolo edi, nenku mpindyewu. Nenku, maalaba diloolo, netwikale ne dilambula dya bânà, midimu ya dyondopa, byônso bitudi mwa kupeta mushindu wa kwenza abi. Tudi ne dîbà dyàbûngì. Pa nanku, mwaneetu wa bakaji mutekete awu yêyepù, ne mwikale ne mwanende mukese awu.

<sup>29</sup> Nenku ndi ngeela meeji ne tudi ne bantu badi bafumine kule menemene, ne bàvwà biikale mwaba ewu mu dinda emu bwa muiiki wa babidi wa ne muntu nkaaya, ne bwa cintu kampanda. Nenku bavwa ne cya kudisangishila mwômò amu mu dinda emu, ne bivwa bikengela bwa Billy kubindijaye too ne diloolo edi. Kadi kàcivwa mwa kubapeta kaaba nansha kamwe to, nwamonu’s, diloolo edi. Pawikala kaaba aka, wêwè mwaneetu wa bakaji, ndi mwalukile muntwamu bwa katanci kakese, ngindila, ne ntangila bwa kumona yêyè ní uvwa mwa kupeta inábànzà awu. Bavwa babidi, ngeela meeji, bàvwà mu miyiki ya babidi ya ne muntu nkaaya ayi bafumine kule pambelu paa ditunga. Pa nanku, tudi—tudi batwishiiibwe ne, mêmè munupangile, nêmpetè anu mushindu wa kupetangana neenu ne lukasa lwônso kwòkò kwikale mushindu, pàmwâpa maalaba diloolo, pa kubwela apu.

<sup>30</sup> Mpindyewu, ndi ngeela meeji ne, ewu ki yêyè inábànzà mwine awu, ulwâlwa ewu, udi mwambule mwânà mukese wa mu diboko muvwale kankanzu kakese kaa kakayi maboko kaa—kaa bleu kaka anyi?

<sup>31</sup> “Nkankanzu wa kayi maboko”? Meda, kî ng’aci cîmvwà—cîmvwà—cîmvwà njinga kwamba to, munanga wanyi, ní ncinyi ní ncinyi. Cidi ne mmwenekelu wa kankanzu kaa . . . Nkankanzu wa kayi maboko, mbanganyi badi bamanye cidi nka—nkankanzu wa kayi maboko? Mona’s, cya bushuwa. Jàketè wa cinsalabeeta cya kale’s, bwanyi mêmè. Pa nanku—pa nanku . . .

<sup>32</sup> Mona’s, s’mmwânà mukese wa mu Dallas. Ekelekele, abi’s mbilenga be. Mwaneetu wa balume, swaku usemenene apa. Numfwileku luse.

<sup>33</sup> Ee, ee, ntu munange kakaba kakese aku, kaudi mwelele aku. Dinà dyende nganyi? [Tatwëndè udi wamba ne: “Rebekah

Lynn.”—Muf.] Rebekah Lynn. L-y-n-n. Kadi dînà dyebe dya famiye nganyi—nganyi mpindyewu? Stayton. Rebekah Lynn Stayton. Mmwômò anyi? Ndi mwa kumwambulaku anyi? [“Bushuwa’s.”] Ndi mumanye ne bitu bikole ndambu, bwa kulekela mwânà mushindu awu. Kí mmulenga anyi? Rebekah Lynn Stayton.

<sup>34</sup> Famiye ewu mmupicile mu maalu àbûngì. Inábànzà mukese, mutekete ewu, ne bayende, mbafume ku disungidiibwa anu abidi adi panshi aa ne babwejiibwe mu dimanya dya Mukalenge. Kadi mpindyewu, mu disangila dyabo, Nzambi nyewu wáfidi Rebekah mulenga kwîsù, mutekete ewu, nenku nyewu balwa nende kudi Mukalenge.

<sup>35</sup> Mpindyewu, bantu bààbûngì, badi babiikila ne . . . dibatiiza dya bânà ba mu maboko, mu ekeleeziya wa ba-Méthodistes ne mikwabo yàbûngì, bôbò batu babamyamina mâyi pacidibo batooke apu. Mpindyewu, abi bidi anu bîmpè, bwa ku dyanyi dimona. Kadi twètù tutu misangu yônsò tuteeta kushaala anu ne cidi Bible wamba bwa kwenza. Ne mu Bible mwine, (kacya) kakutuku kwanji kwikala cintu paaci ne ndibatiiza dya mwânà wa mu diboko to; mwaba nansha umwe mu maalu malonda, too ne ku ekeleeziya wa ntwadijilu wa Katolike, ku dyetu peetu dimanya, civwà nku Nsangilu wa Nicée.

<sup>36</sup> [Mwânà wa mu diboko awu udi wela lubila wenza ne: “Baa!”—Muf.] Pa nanku’s awu udi anu mushindu wa kwamba ne: “Amen.” Aci, nudi numona’s, nudi ne . . . Nwamonu’s, bikengela wêwè kwikala ne dyumvwija’s.

<sup>37</sup> Pa nanku, kadi, mu Bible, baakalwa ne bânà bakese kudi Yesu, bwa Yêyè kubabenesha. Ne Yêyè wakabatentekela byanza ne wakababenesha. Nenku, aci, ki citucidi batungunuke ne kwenza ncyôci aci.

Mpindyewu twinyikaayaaku mitu yetu.

<sup>38</sup> Taatù wetu wa mu Dyulu, nsongaakaji ewu ne nsongaalume ewu nyewu balwe diloolo edi ne Rebekah mukese mulenga kwîsù ewu udi mubapeebwe, mu bujitu bwabo bwa dyambula, bwa kumukoleshabo mu mibelu ya Nzambi. Nenku nyewu balwa nende diloolo edi bwa kumuleeja kudi Mukalenge. Ne padi maamù mumuumushe mu ende maboko mumufile mu aanyi, pashiishe nyewu mmuumusha mu aanyi mêmè mmufila Kûdì Wêwè, Rebekah mwânà ewu. Nzambi, ikalaku nende ne mubeneshe. Benesha tatwëndè ne mamwëndè. Swaku biikale bônso ne nsòmbelu wa lulamatu, bàlaalè bàboobokè, ne, kwôkò mushindu, bàfikèku too ne ku dimona dya Dilwa dya Mukalenge Yesu. Swaku bwa mwânà ewu akole mu dimanya dya Mukalenge. Kabidi, byôbi ne maalaba udiku, swaku bwa kwikalaye ntemu munene Bwebe Wêwè. Enzaku nanku, Mukalenge. Mpindyewu, bu Wêwè pa buloba apa, Kûdì Wêwè nkuvwa bakaji aba ne balume aba mwa kulwa ne bânà baabo balela. Kadi twètù

aba, bambi baa Evanjeeliyo, tudi baaminyampala Beebe. Pa nanku, nyewu tuKupa mwânà wa mu diboko ewu, bwa nsòmbelu wa mudimu mu Bukalenge Bwebe, mu Dînà dya Mwân'Ebe, Mukalenge Yesu Kilisto. Amen.

<sup>39</sup> Akubeneshe, Rebekah mwânà! Kaacintu kakese kalenga kaayipu's we! Nzambi anubenesheku bubidi bwenu, ne mwânà wa mu diboko ewu, anupe nsòmbelu wa nulaala nubooboka, wa disanka, mu mudimu wa Nzambi.

<sup>40</sup> Ncyèna mumanye ní ndi ne dikanda dikumbane, anyi ní ncyèna naadi. Ewu's mmwânà wa balume anu pa yèye menemene. Dyende nganyi? [Maamù udi wamba ne: "Stanley Victor Cleveland."—Muf.] Stanley... ["Stanley."] Stanley Victor... ["Cleveland."] Clayland? Clay-... ["Cleveland."] Cleveland. Stanley mwânà, aka kaadîna bulengaku's we, ne kânà kaa balume kiine bulengaku! Ee, ndi ngeela meeji, bwa... Twänjîbi kubanduluka kuneeku tŭng, Stan. Aka's nkânà kaa balume kalenga's? Kaa, s'nudi bamanye. Mudimu ewu katùtu tuwulongola tuwambulula kumpala to. Tutu tuwenza anu nunku, nudi bamanye's, kakwena bya mishingà mu diwenza to. Ncyà bushuwa. Ncyà bushuwa ne nkalumyana kalenga be. Nyewu ngápù mwoyi dînà dya famiye adi's. Ncyèna ngeela meeji ne ndi ndishindumuna bimpè mu dyòdi to. ["Cleveland."] Cleveland. Eyo.

Twinyikaayaaku mitu yetu mpindyewu.

<sup>41</sup> Taatù wa mu Dyulu, babaka babidi aba nyewu balwa ne mwânà wa mu diboko ewu, Stanley Cleveland mwânà, bwa kulambudiiwaye kudi Mukalenge Yesu. Nenku bu mùdi mpaasata wa kaaba aka, wa ekeleeziya ewu, ne mêmè, patudi biimane pamwe mu bwobumwe mu midimu ya Mukalenge apa, nyewu tuKupeesha mwânà ewu bwa nsòmbelu wa mudimu. Wêwè ngudi mumufile kudi taatù ne maamù; kadi mpindyewu nyewu bamumpeesha mêmè, mu maboko aanyi; kadi nyewu mmuumusha mu aanyi maboko mmuteeka mu Ebe Wêwè. Nzambi, beneshaku tatwëndè ne mamwëndè. Beneshaku mwânà mukese wa balume ewu, ne bwònsò bwabo bàlaalè bàboobokè, mu nsòmbelu wa disanka wa diKukwacila mudimu. Swaku bwa mwânà ewu akoleshiibwe mu mibelu ya Nzambi, bwa kuMukwacila mudimu, ne kuMuciina, ne kuMunanga, matuku ende ónsò a mwoyi. Mpindyewu, bàvwà balwe ne bânà aba Kùdi, bwa Wêwè ubabeneshe; ne twètù, biikale ne byanza byetu bitentekela mwânà ewu, tudi tumubenesha mu Dînà dya Mukalenge. Swaku bwa yèye alaale abooboke, nsòmbelu wa disanka ne wa mubidi tumatuma ne dikanda, ku mudimu Webe. Mu Dînà dya Yesu. Amen.

Nzambi akubenshe, Stanley mwânà. Nudi ne mwânà wa balume mulenga wa dikema mwaba awu.

42 Mpindyewu ndi muswe kunulombaku dingaanyishila dikese, bwa bânà bakese ne bansonga. Kadi ndi mumanye ne mbikole. Kanwena mwa kushaala anu kacya nwîmana kuulu bapûwe ntanta mule menemene to, bwalu mikolo yenu yidi yikwata tukulakaji. Kadi ndi muswe kulenga cintu kampanda diloolo edi cîntù kacya nciyiku mwanji kulenga to. Ne kudi cintu kampanda cîngîikalà mwa kwakulapu, cîntù kacya nciyiku mwanji kwelelaku meeji ne nêngààkulè pa cintu cya mushindu awu to.

43 Ki bwa cinyi, mu dinda emu, ncivwa muswe kuteeka cikondo aci kumpala kwa Diyiisha edi to, ne ncivwaku mujikije dyakula pa Cyeyemenu cyanyi aci to, ne ncyêna ngeela meeji ne ngaadyakucijikijaku to. Ndi ntekemena ne ncyakucijikijaku to. Yêyè's mmulenga mulaya!

44 Kadi, diloolo edi, nêngîikalè mwa kwakula pa cintu kampanda cîndî nciyi mumanye to. Nenu mpindyewu, abu's bwalu mbukole, bwa mwambi wamba mwikalaye mwa kwakula pa cintu cidiye kayi mumanye to. Kadi ndi ndyela mu bwalu bwa njiwu, ku dyanyi paanyi dimanya, kabidi, bwa. . . ekeleeziya ewu amone mwa kuumvwa. Ne mêmè, nansha bya munyi, ncyênaku mufwanyine kushaala mulame cintu pamutu paa kunupeeshaci to, cyôci ciikale ne dikwacisha.

45 Neashiishe, mukaba wa mêyî ewu, ndi ngeela meeji ne nsongaalume eyi yidi munkaci mwa kukwata mukaba. Kadi bu byôbi mwa kwenzeka ne upete mukaba awu, ewu yônsò udi uteeleja mukaba awu, uvuluke ne, cintu kampanda cyôci cipanda mutu, bwebe wêwè, kùcyâmbiku to anu cyôci ciikàle pa mukaba. Kwambi cintu kampanda cibengangane ne cidi pa mukaba wa mêyî to.

46 Pa nanku bààbûngî badi bamfundila mikanda, pa bidi bitangila *Dimiinu Dyâ Nyôka*, bamba ne mêmè ndi mwambe bikampanda ne bikansanga. Dya nya ngangata mukaba, ngwelulula. Nciyi mucyâmbè mu mushindu awu to. Nwamonu's, bantu badi bangata maalû mu mushindu mubi.

47 Nudi bamanye's, Yesu, musangu kampanda paanyima paa dibiika Dyende dya ku lufu, ùvwa wènda wèndela ku mwelelu wa mâyî, ne bapostolo, ne Yone uvwa mulaadile mu cyâdi Cyende awu. Ki bôbò kwamba ne: "Cyênzekelà muntu ewu ncinyi?"

Yesu kwamba ne: "Budi bukutonde mbunganyi bu yêyè mwa kushaala too ne pâNgàâlwa?"

48 "Ki kupatukaku bwalu bwa balondelangana, ne, 'Yone uvwa ne cya kushaala ne mwoyi too ne ku dimona dya Yesu ulwa.'"

49 Kadi Mufundu udi wamba ne: "Kadi paabi, Yêyè kavwa mucyâmbèku mu mushindu awu to." Nudi numona's, Yêyè—Yêyè kavwaku mwambe aci to. Wakamba anu ne: "Budi bukutonde mbunganyi bu yêyè mwa kushaala too ne pâNgàâlwa?" Yêyè



kaakambaku ne ùvwa mwa kushaala tootooto nansha. Kadi, nwamonu's, dyumvwa dibi, mbipeepele anu menemene.

<sup>50</sup> Nenku, mpindyewu, kî—kî mbwena kwamba ne ndi mpiisha muntu kampanda bwa dicyenza to. Bwalu, ntu ncyenza, mêmè mwine ewu. Ne bantu bônso batu bacyenza; piikalabi ne bapostolo, bôbò biine bààkendà ne Mukalenge abu, nyawu baakaMumvwa bibi. Ne bôbò kabaakaMumvwaku bitooke menemene to.

<sup>51</sup> Anu ku shòò, kwambabo ne: “Mona, bwa mpindyewu kaayi tuumvu. Bwa mpindyewu kaayi twitabuuji. Ne tudi batwishiiabwe ne kabylene bikengela bwa muntu nansha umwe kuKwambilaye nî ncinyi nî ncinyi to, bwalu Wêwè udi mumanye maalu ônsò.”

<sup>52</sup> Ki Yesu ne: “Mpindyewu nwtabuuji?” Nwamonu anyi? “Paanyima paa cikondo cyônso aci, nwênù ndekeelu wa byônso- . . . Ndekeelu wa byônso cyâshiishi kunupeta, nwamonu's, bwa nwênù kwitabuuja?”

<sup>53</sup> Ne aci cidi anu cya buntu's. Ne twêtù bônso tudi anu bantu, nenku netwikale anu tuumvwa bibi.

<sup>54</sup> Kadi piikalaci mu mushindu kampanda cya cipanda mutu bwebe wêwè, elulula mukaba awu. Teeleja ne ntema dîbà adi. Ndi mutwishiiabwe ne Nyuma Mwîmpè neakubuulwile.

<sup>55</sup> Nenku, nwênù bânà bakese, bu nwênù mwa kulaminyinaku “amen” yenu ayi, nwênù bânà. Anji indilaayi anu kakese ndambu, bwalu ndi—ndi muswe ne eci bàcyûmvwè anu cya bushuwa, bwalu bàâbûngî kabaakupeta mukaba wa mêmè awu to. Pa nanku, ndi muswe bwa nwikale batwishiiabwe ne nudi bacyûmvwè. Nenku tucilengaayi, munda mwa, nêngâmbè ne mmunda mwa tusunsa makumi asatu ne tutaanu, anyi makumi anaayi, biikale anu ne kaneemu kônso katudi bamanye mwa kwikala naaku aku.

<sup>56</sup> Bwalu, eci neikondo cya cikùmà cya dikema bwanyi mêmè. Mmwaba udi cintu kampanda cyenzeke, mu mushindu wa ne ndi mupange ne cya dycenza. Nwamonu anyi? Nenku ndi mwimane mu mushindu wa bwalu bukole bwa kacya mûntù nciyiku mwanji kwimana to, mu matuku a mudimu wanyi wa bwambi, ku dyanyi paanyi dimanya.

Pa nanku, twinyikaayi mitu yetu mpindyewu, kumpala kwa twêtù kulenga Dîyi.

<sup>57</sup> Taatù wa mu Dyulu, pa dîbà adi, kukaadi cikondo kampanda, ngâkayiisha pa cyena bwalu cya *Kudîcinkila*. Ne *kudîcinkila* kutu “nkudyela mu bwalu bwa njiwu kakuyi bukenji.” Nenku pâmwâpa, diloolo edi, Mukalenge, ndi mudyâmbwile bujitu bwa kuumvwija bantu cintu kampanda, nciyi mupete cikeena-kumona cya ciine cintu aci to. Bwa bwalu abu, Mukalenge, unkenketeku, mwaba udi ukengela

ne tuumaalu tukenkeciibwe awu; ukange mukana mwanyi, Mukalenge. Wèwè wàkakànga mukana mwa nyama ya ntambwe, mu bwina muvwayi ne Danyelee, bwa kayimwenzedi bwalu. Mukalenge, nyewu ndomba, ne, byòbì byenzèke ne ngiikale mwa kuumvwija cintu kampanda bibi, Wèwè uciidi anu ne bukole bwa kukanga mukana. Kadi piikalaci ne m'Bulelela, pa dîbà, Mukalenge, uBubeneshe, ne uButangalaje. Ne Wèwè uciidi mumanye maalu mudiwu ne cikaadi mene pabwipi ne ncinyi. Nenku ki bwalu kaayi ndi ndwa, nansha mu dîbà mene dya ndekeelu menemene edi, ku cyambilu eku, bwa kuteeta kuumvwija bintu ebi. Nenku ndi ndomba bwa Wèwè kutukwacishaku.

<sup>58</sup> Beneshaku kaekelèeziya kakese aka. Kasumbu aka kadi kalwa mwinshi mwa musaka ewu, kàdì kanjì kwikala neetu mu cimenga eci aka, bafumine mu matunga àbûngì. Kaa, pàkaadi mindidimbi ya diloolo yipona apa, twètù tudi ne disanka be dya kwikala ne kaaba kaa kwikala kulwa. Padi baa pa buloba mu cibwejàkàjì cinene ne kabayi bamanye mwaba udibo biimanyine apa, twètù tudi ne disanka, dya ne: “Dîna dya Mukalenge didi cibumba cikole, ne baakane badi banyeemenaMu ne basanganyibwa mu dikubiibwa.” Kaciyi anu Méyì àbûngì menemene to, kadi dibuulula kampanda!

<sup>59</sup> Pa nanku, tudi tulomba, Taatù, bu mudi Makênkè a diloolo mafwanyine kulwa, ku dibwela dya dîbà. Ne twètù tudi twitabuuja ne ki dyòdì dîbà ditudi ne mwoyi edi, ku dibwela dya dîbà. Ne tudi tuKusakidila kakuyi tuseku to, Mukalenge, byumukila munda mwa myoyi yetu bônso, bwa maalu audi Wèwè mutwènzèle. Nenku, Mukalenge, munda mwa cikondo cyônso eci, mèmè ndi nKusakidila bwa dyanza ne bikeena-kumona byúdi Wèwè mufile, cyônso cya ku byòbì abi ciikalè cipwangane anu menemene, ne dyumvwija dya ciloota cyônso ndyènzèkè anu mushindu awu menemene. Pa nanku, tudi bamanye ne bivwa mwa kwikala anu Wèwè, Mukalenge; bwalu twètù tudi baa cifwaka, bônso balela mu mpekaatu, ne kakuyiku cintu cya nsongo mu twètù nansha. Kadi, patudi twela meeji ne Wèwè uvwa mwa kwangata cintu cya mushindu awu, bu mudi muntu wetu ewu, ne kumasukula ku mâyi a Dîyì ne ku Mashi a Kilisto; kadi kwolola cyanza aci mu mushindu wa ne, muntu awu kayiku ukwata mudimu ne meeji ende yèyè mwine to, kadi ùlekela meeji a Kilisto, Yèyè udi mumanye maalu ônsò awu, kuÀlekela abwela ne akula ne akwata mudimu ne tabernacle kampanda. Twasakidila's, Taatù.

<sup>60</sup> Mpindyewu nyewu tubenesha Dîna Dyebe dya Cijila. Ne tudi tubenesha kasumbu kakese aka, diloolo edi, mu Dîna Dyebe. Tudi tubenesha mpaasata, Mwaneetu Neville, musadidi wa bukutu wa Nzambi. Tudi tubenesha balami, balubuludi, ne cidimba cyônso cya Mubidi wa Kilisto, ne apa ne mu nyungulukilu wa buloba bujima, mu Dîna dya Mukalenge Yesu.

<sup>61</sup> Kaa, patudi tumona mundidimbi mufiike, mubwucidile, ùdi ùkwàcishà bwówà ewu mwikale upona mumpala mwa bwena Kilisto, tudi tumanya ne dîbà dikaadi dyenda diseemena. Nekwikale Dyambwibwa, ne Ekeleeziya neangaciibwe muulu. Mukalenge, enzaku bwa twètù tutungunuke ne kwenda kuya, batangile kudi Mubangi ne Mujikiji, Kilisto. Enzaku nanku, Mukalenge. Nenku patudi tuya batangile kumpala mpindyewu apa, mu Dînà dya Mukalenge Yesu, bwa kwambula bujitu bwa bintu ebi bidi biteekiibwe pa myoyi yetu apa, tudi tulomba bwa Wêwè kwikala neetu ne kutukwacisha. Nenku petaaku butumbi ku ciine aci, Mukalenge, bwalu tudi tudilambula kùdì Wêwè, pamwe ne Diyì Dyebe, mu Dînà dya Yesu Kilisto. Amen.

<sup>62</sup> Mpindyewu, pawikala ne crayon ne dibeki, ndi njinga bwa wêwè kufundaku ndambu wa bintu, bu . . . anyi cyònsò ciwaswa kufunda aci. Ikala anu mulongolole byôbi abi. Ne pashiishe, kabidi, pa mukaba wa mêyi, panwikala baswe kufunda Mifundu ayi, pa dîbà kana dyònsò, bwalu ndi ngiitabuuja ne Mifundu nyidi ne mushinga.

<sup>63</sup> Mpindyewu tudi baswe kubala bidi bifunda diloolo edi, anyi kwenza dibala dya Mifundu, mu Mukanda wa Dibuuludiibwa dya Yesu Kilisto. Ne mêmè ndi ngiitabuuja ne eci n'Dibuuludiibwa dya Yesu Kilisto, mushindu udididi difundiibwe mu Mukanda. Ne dibuulula dikwabo dyònsò didi difwanyine kwikala dibengangane ne edi Dibuulula, ndifwanyine kwikala dya mashimi. Ndi ngiitabuuja ne aci mbifwanyine kwikala ne mushinga bwa . . . bwa—bwa kucyambulula. Dibuulula kana dyònsò dyabenga kukumbanangana ne edi Dibuulula, ne kufikisha edi Dibuulula ku bukênkè, ndibuulula dya mashimi. Didi ne cya kwikala dya mu Mifundu.

<sup>64</sup> Mpindyewu, mu nshapita wa 10 wa Mukanda wa Bwakabuuulwibwa bwa Yesu Kilisto, ndi njinga kubala ndambu wa mvensa ya ntwadijilu ayi, mvensa mwandamutekete ya ntwadijilu, kuumukila ku 1 too ne ku 7. Nenku teejejaayi ne ntema mpindyewu, ne nunsambidilaayi.

*Nenku mêmè kumona mwanjelo mukwabo wa bukole—mwanjelo mukwabo wa bukole utuuluka ufuma mu dyulu, muvwadika ditutu: ne mwanzankongolo mwikale kumutu kwende, ne mpala wende . . . mwenze bu ne ndîbà, ne makàsà ende bu makunji a kopya:*

*Ne mu cyanza cyende uwuwa ne mukanda mukese mubuulula: ne wakateeka dikàsà dyende dya dyabalume pa mbû, ne dikàsà dyende dya dyabakaji pa buloba bûme,*

*Ne yêyè wakeela lubila lwa diyì dikole, byenze bu mudi ntambwe ukungula: ne paakamanaye kwela lubila, mikungulu mwandamutekete yakapatula mêyi ayi.*

*Ne paakamana mikungulu mwandamutekete kupatula mèyi ayi, nkaavwa ne mfunde: ki mèmè kuumvwa dîyi difumina mu dyulu dingambila ne: Twa citampi ku maalu adi mikungulu mwandamutekete mapatule awu, ne kùàfùndu to.*

*Ne mwanjelo ùmvwà mumone mwimane pa mbù ne pa buloba bûme awu wakajuula byanza byende e kubitangija mu dyulu,*

*Ne wakadicipa mu dînà dya ewu udi ne mwoyi kashidi ne kashidi, wâkafûka maulu, ne cintu cidi mu ôwò, ne buloba, ne bintu bidîmu, ne mbù, ne bintu bidi. . . bidîmu, ne kakuvwa ne cya kwikala kabidi cikondo nansha:*

*Kadi mu matuku a dîyi dya mwanjelo wa mwandamutekete, paabangaye kwela mpungi, bwalu busokoka bwa Nzambi buvwa ne cya kujika, bu mudiye mwambile basadidi bende baprofeta.*

<sup>65</sup> Nenku cyena—bwalu cyanyi, byôbì bikengela ne ncibiikile nanku, diloolo edi, cidi nenku: *Eci Kì Cimanyinu Cya Nshîkîdîlù Anyì, Mukalenge?*

<sup>66</sup> Tudi bamanye bônso ne bwa Ekeleeziya tudi ne mwoyi mu cikondo cya—cya butumbi, kadi bwa mwena bupidya ncikondo cya cikiwacisha bwôwà. Kadi tudi ne mwoyi mu cimwe cya ku bikondo bidi bitambe kwikala bya njiwu ku byônso, byônso bikaadiku kacya, kacya buloba bwabanga. Muprofeta nansha umwe, mupostolo nansha umwe, kacypu, mu cikondo nansha cimwe, kacya katu mwanji kwikalaku ne mwoyi mu cikondo cya bwena citudi twètù ne mwoyi mpindyewu eci nansha. Eci ki nshiikidilu.

<sup>67</sup> Mbifunda mu maulu. Mbifunda myaba yônso pa buloba. Mbifunda mu cibejibeji cyônso. Eci ki nshiikidilu, bu nwènù mwa kubala mufundu wa ku cyanza. Baprofeta bavwa ne mwoyi musangu uvwa mufundu wa ku cyanza mwikale mufunda ku cimanu bwa ditunga kampanda, kadi twètù tudi ne mwoyi pakaadi mufundu wa ku cyanza mwikale usanganyiibwa ku cimanu bwa cikondo mu kaabujima. Matunga ônsò, buloba, bintu byônso, dîbà dikaadi ku nshiikidilu. Pa nanku, tudi ne cya kukenketa Mifundu, bwa twètù kujandula dîbà ditudi ne mwoyi.

<sup>68</sup> Misangu yônso, muprofeta mulelela wa Nzambi neaye anu ku Mifundu. Ki bwa cinyi yèyè mmutwishiibwe ne nebiikale mushindu awu. Mu Dipungila Dikulukulu, pavwa baprofeta bamba cintu kampanda, misangu yônso, mwaba kampanda, kuvwa anu muprofeta mwikale ne Dîyi, uvwa ushààla ne Dîyi. Úvwa utangila kudi Nzambi bwa bikeena-kumona. Kadi pavwa cikeena-kumona cyende cibengangana ne Dîyi, pa dîbà adi cikeena-kumona cyende aci civwa cya mashimi. Ki mushindu

wa Nzambi wa kufikisha Dîyì Dyende kudi bantu Bende ngwòwò awu.

69 Nudi mwa kungumvwa bîmpè menemene, nwênù bàdì paanyima pààpa abu anyi? S'ndi mupange ne paa kubangila piine's.

70 Mpindyewu, citu ndyèsè dinene bwanyi mêmè, dya kumanya ne tabernacle ewu ngutu wanyi ekeleeziya wa kumpala. Ncintu cya butumbi. Ne ncyadyakupwaku mwoyi to, nansha mudibi ne ndi. . . Yesu munenge mu mushindu wa mêmè mukiikale ne mwoyi nkama ya bidimu. Ndi mvuluka dituku dîngààkatèèkà dibwe dya mu ditumba, mu ditumba mwamwa; ne cikeena-kumona cyakampaYe mu dinda adi, cya tabernacle ewu. Ne nwênù bônso nudi bavuluke. Mbifunda mu mikanda. Ne kakuyi mpatà to mbyûle, ku dileeta ne ku dileeta, kakuyi nansha kakese kaa byôbì abi katuute ku luseke to.

71 Nenu, mpindyewu, ncyèna ngiitabuuja ne kudiku cintu kampanda cikaadiYe mwambe, mu bidimu byônso bìndi ne mwoyi ebi, cînkaadiku mwambile bantu, cidi kaciyi cyûle to. Ne bantu bààbûngì batu balwe ne biloota, bidiYe mumpeeshe, ku ngàsà Wende, mushindu wa kubyumvwijila bantu. Ne bààbûngì bakaadi balwalwalwe ne biloota ne maalu mabatonde bîmvwà nciyi ne mushindu wa kuumvwija to.

72 Kadi ncitukù muteete kunutwadila dijimbu kampanda diikale ne mandamuna ônsò to. Ntu muteete anu bwa kwikala ne meeji matooke ne bwa kunwambila cidi Bulelela, ne mvwa mwa kunwambila anu muvwaYe Yèyè mungambile. Ne pashiishe pavwaci cifika kûndì, ki pâmvwà mwa kunwambila.

73 Nenu ndi muswe kunudimwija. Mu dituku ditudi neenu ne mwoyi edi, kudi byàbûngì. . . Kî—kî nne ndi ngamba cintu bwa kulwisha bantu to. Kadi paudi umona muntu mwikale ne dyandamuna ku maalu ônsò, aci ncibengangane ne Dîyì.

74 Yesu wakamba ne: “Kuvwa beena nsudi bààbûngì mu matuku a Eliya, kadi anu umwepele ngwâkondopiibwa.” Mu bûngì bwônso bwa bidimu abu, makumi mwandamukulu anyi bipite apu, byàkalàlà Eliya abi, mwena nsudi anu umwepele ngwâkondopiibwa. Bakaji bakamba bààbûngì mu matuku a Elisha, kadi yèyè wakatumiibwa anu kudi umwepele. Nenu tudi tusangana ne kudi bintu byàbûngì bidi Nzambi wenza, kadi bidiYe kayi ubuulwila basadidi Bende to. Ne musadidi nansha umwe katu munene kutamba Mukalenge wende nansha.

75 Ne, pashiishe, Nzambi kaakwabanyanganaku butumbi Bwende ne muntu nansha umwe to. Yèyè udi Nzambi. Kadi pakaadi musadidi ufika pa kaaba kaa uteeta kwangata kaaba kaa Nzambi, pa dîbà adi Nzambi udi wangata mwoyi wende ne umuseemeja kule mu mwaba kampanda, anyi cintu kampanda. Tudi ne cya kuvuluka aci.

<sup>76</sup> Mpindyewu, mu bikeena-kumona abi ne dyumvwija dyabi, ncyèna mwa kwambaku dyumvwija dya ciloota pândi nciyi mumone kantu ne kantu, mu cikeena-kumona, mushindu uvwa ciloota aci to. Ne bààbûngi beenu mbamanye ne nukaadiku bangambilabile ciloota cyenu, ne ciine aci kuyi nansha mufwanyine kucyamba cyònsò to. Kadi pâmvwà mmona ciloota aci cingaalukidila mêmè, mvwa nkudimuka nkwambila ne kuvwa bintu byàbûngi byûvwà mushiye, pashiishe nkwambila biine byûvwà mushiyemu abi. Nudi bamanye ne aci ncyà bushuwa. Piikalaci cya bushuwa, ambaayi ne: “Amen.”...?... [Disangisha didi dyamba ne: “Amen.”—Muf.] Bintu byûvwà wèwè kuyi mungambile abi. Ki bwa cinyi, nudi numona’s, piikala... Bu mwakamba Nebukandeneesa ne: “Panwikala kanuyi mwa kungambila cîndi mulooto aci to, pa dîbà adi mmunyi mûndi mufwanyine kumanya ne nudi ne dyumvwija dyaci?”

<sup>77</sup> Kadi byònsò bya didifwikakajila ebi, katwena ne cya kubyangata kadi kwamba ne: “EMU MMUDI MUKALENGE WAMBA” nansha. Katwena ne cya kwenza aci to. Tudi ne cya kwikala ne diyi dya buludi, dyandamuna dya kudi Nzambi, kumpala kwa twêtù kwamba ne n’Nzambi. Kî ndidifwikakajila to, kî ndisaluka to, nansha ciikale citùtuka mushindu kaayi.

Udi mufwanyine kwamba ne: “Ndi ngeela meeji ne mbifwanyine kwikala mushindu ewu.”

<sup>78</sup> Kadi paudi wamba ne: “EMU MMUDI MUKALENGE WAMBA,” awu kî ngwèwè to. Tangilaayi pa cibumba cya ku cyambilu. Kacya nukaadiku bacimone cipangile anyi? EMU MMUDI MUKALENGE WAMBA ùtu mupwangane, kacya katu mwanji kupangilaku to. Nenku padici anu ne ng’EMU MMUDI MUKALENGE WAMBA, kacyena mwa kupangilaku to.

<sup>79</sup> Kadi, too ne ku mpindyewu, Yèyè utu anu mundame, bwalu ntu anu mMwindila Yèyè. Ncitu mwanji kuteetaku kukeba dimanyika, anyi butumbi bwa patupu bwa kudi bantu to. Ntu anu muteete kwenza ne mwanyi mwònsò bwa kwikala ne nsòmbelu wa mudipwekeshe, ne kwikala ne nsòmbelu wa mushindu wûndi ngeela meeji ne ngudibi bikengela bwa mwena Kilisto kwikalaye nende. Ne mêmè ncitukù mukumbane kudyzenza aci mu mêmè mwine to, kadi Yèyè ngutu mucyènzènze too ne ku leelu ewu. Bu mûndi ngamba ne, Yèyè ke Utu mundombole.

<sup>80</sup> Bintu byàbûngi mbifwanyine kwambiibwa mu mushindu ewu, kadi mbifwanyine kwangata mukûngùlù mutambetambe bule. Kadi nwènù bònsò nudi bamanye bintu ebi. Ne kabingila kamwepele kadi kenze ne nnwàmbìshìshè “amen,” katanci aka, nwènù badi bangaawile biloota, pashiishe mêmè mulwe kunwambila binuvwa bashiye, mbwalu Diyishiha edi didi dikwaciibwa pa mikaba ya mèyi. Bantu baa matunga ónsò

nebateeje cyôci eci. Kadi pumvwabo “amen” awu, pa dîbà adi nebúmvwè ne nyawu mudi mēyi kampanda muntwamu, a badi baditeeke mwinshi mwa mudimu wa bwambi ewu, biikale bamanye cidi cîmpè pamutu paa kwenza cintu cya cibi nî ncyà bishi, anyi kwamba “amen” ku cintu kampanda ciikale cya mashimi. *Amen* mbwena kwamba ne “biikale nanku.” Ndyanyisha dya bwalu abu.

<sup>81</sup> Mpindyewu, mu wanyi nsòmbelu yònsò, kacya anu pânçîvwà mwânà mutekete, kutu cintu kampanda citù anu cintacishetacishe. Nenku ntu mupete nsòmbelu anu wa pabwende menemene, mukole bwa kumuuvwa. Nansha mukajaanyi mwine pende ukaadi anu mudikoonyekoonye mu mutu ne mucyâmbàmbe. “Bill, ncyêna ngeela meeji ne kudiku muntu nansha umwe mufwanyine kukuumvwa wêwè ewu to.”

<sup>82</sup> Ki mêmè ne: “Mêmè mwine ncyêna ndyumvwa to.” Bwalu, ndi nkookela, ndilambula kudi Kilisto, kukaadi bidimu byâbúngì. Yèyè ngudi ulombola. Mêmè ncyêna nditacisha bwa kubyumvwa to. Ndi paanyi nya anu nanku kudiYe ulombola aku, ku dyanyi paanyi dimanya.

<sup>83</sup> Ndi ne kusakidila bwa mukaji mulenga wa dikema ne bânà, bwa mukajaanyi ne bânà baanyi badi ne dyeyemena dya ne ncyêna mufwanyine kubambilaku cintu kampanda cya mashimi to. Ki cidibo biitabuuja ncyôci aci. Musangu wònsò wûdì ubambila cintu kampanda, badi bashaala kacya anu baakwataku. Mbamanye ne ncyêna mufwanyine kubambilaku cintu kampanda cya mashimi to.

<sup>84</sup> Ne mêmè mwine ndiku mufwanyine kwambila umwe wa ku bânà baa Nzambi cintu cya mashimi anyi, pa dîbà adi? Kî nku bukole to. To, mukalenge. Nzambi mmuswe bwa bânà Bende kwikalabo mu ndongeshilu wa mushindu mujaalame. Nenku ikalaayi naabo ne meeji matooke, ne kwikala naabo ne bulelela, nenku Yèyè neacibeneshè, mûndì mêmè ngiitabuuja.

<sup>85</sup> Mpindyewu, mu kwenda kuya, mu lwendu lwònsò amu, kudi bintu bikaadi byenzekenzeke, bîmvwà mêmè nciyiku mwa kuumvwa to. Ne cimwe cya ku bintu bîmvwà nciyiku mwa kuumvwa, mpânçîvwà mwânà mutekete ne bikeena-kumona abi biikale bîmvwila. Ne mvwa mwa kubimona ne ngambila baledi baanyi bintu bivwa mwa kulwa kwenzeka. Bavwa bôbò beela meeji ne mvwa anu munyunguluke mutu cyanaana. Kadi, bwalu budi bukemesha budi ne, bivwa byenzeka anu muvwaCi cyambe amu.

Wêwè udi wamba ne: “Aci kuvwa nkumpala kwa dikudimuna dyebe dya mucima anyi?” Eyowa.

<sup>86</sup> “Mapà ne mabiikila kî mbya dinyingaleela to,” mudi Bible mwambe. Wêwè udi mulediibwe pa buloba apa mmu kiipacila kampanda. Ne kwêna. . . Kî nkanyinganyinga keebe kadi katwala mapà ne nansha; mmadyanjila kukulongolwela.

<sup>87</sup> Mpindyewu, mu njila wa lwendu amu, ne pângcìvwà mwânà mukese apu, dijinga dyanyi divwa. . . Mvwa ndyumvwa nciyi musankishiibwe to mu ditunga dîmvwà nsanganyiibwa adi. Mvwa njinga, mu mushindu kampanda anyi kansanga, bwa kuya ku Wesete.

<sup>88</sup> Nunku bakampandaku, paakangaasabo cingoma, pângcìvwà mwânà mutekete apu. Nunku pângààkaalukilà mu mêmè, pângààkaapàtukà mu bwanga bwa kumpala buvwabo bantwe bwa dibenga kusaamisha abu, mvwa ndyambidila ne mvwa mu mwaba wa dikengeshiibwa, ngenda mpweka mwinshi. Bwanga bwa ether abu buvwa bumpatule mu mêmè. Nunku mvwa mupatuke mu mêmè munda mwa mèbà mwandamukulu, ngeela meeji. Bôbò bavwa batacisha meeji bwa mushindu wa kumpingaja cyakabidi mu mêmè. Bavwa bangenze dipanda dinene, kabayi bantwe bwanga bwa pénicilline to. Mashi; mikolo yôsò yibidi myambe kuumushibwa ne mazaji, ku cingoma aci. Mulunda wanyi wa balume mutekete nguvwa mulekelele cingoma cyende cingaasè.

<sup>89</sup> Ki pashiishe bu ngondo mwandamutekete nanku awu paanyima, mêmè kwangata bwanga bukwabo bwa dibenga kusaamisha. Nunku pângààkapàtukà mu bwenzeji bwa bwine bwanga bwa dibenga kusaamisha abu, mêmè kwela meeji ne mvwa mwimane mu mpàtà ya mu wesete. Ne nkuruse munene wa ngòlò mwikale mu dyulu amu, ne butumbi bwa Nzambi butuminaku nsesa yaabu panshi. Mêmè mwimanepu mushindu *ewu*.

<sup>90</sup> Pa dîbà adi Bukênkè abu, bunudi numona diloolo edi mu fòtò bwabwa, bûtù bujaadikiibwe ne n’Kampanda wa mutambe mfukilu, ku bukebekebi bwa maalu a mamanya; bwanyi mêmè, buvwa m’Bukênkè bwòbù bumwebumwe bwàkashindishà Pòlò Munsantu panshi abu. M’Bukênkè anu bwòbù bumwebumwe buvwa bwenda bulombola bânà baa Izaleela abu, ciibufukubufuku. Nukaavwa bamone kaaba aka, Mwanjelo ewu anyi? “Üvwa muvwadika Ditutu.” Nwamonu’s, Yèyè awu uvwa “Ditutu mundaamuunya.” Mpindyewu, Bukênkè bumwebumwe abu.

<sup>91</sup> Bwa bantu bavwa kabayi bumvwa to, baakanji kwela meeji dyambedi ne civwa ncyà mashimi’s, ne mêmè nguvwa ucymba paanyi nanku cyanaana. Kadi kwenzekabi ne Nyuma Mwîmpè asokoke byamu bya mudimu bya mu maalu a mamanya abi, ne bantu biine abu, bu cishindikì, ne kuBukwatabo fòtò, misangu ne misangu.

<sup>92</sup> Mêmè kwamba ne: “Ndi mmona muntu mubwikila kudi mundidimbi wa lufu,” mundidimbi mufiike kumutu kwende. Kukaavwa ndambu wa mbingu yîmvwà nsanganyiibwa mu cimenga kampanda. Kadi patutu tuyiisha, kabitu–kabitu byanyishiibwe bwa kukwata maafòtò to, nudi bamanye’s,



pamvwa nyiisha kuntwaku. Ne padi. . . Cintu cimwecimwe aci cyakenzeka paakakwaciibwa yêyè awu; kadi muntu kampanda uvwa ne cyamu cya fôtô. Ki mêmè kwambila inâbànzà kampanda uvwa musômbe mwaba awu, mwenyi kûndi. . . Mvwa nsanganyiiibwa mu—mu Southern Pines. Mêmè kwamba ne: “Kudi mundidimbi kumutu kwa Mandemwazele *Kampanda* ewu.” Inâbànzà ûmwàku mêmè kacya nciyi mwanji kumona to kacya bandela. “Wêwè ewu uciidi ucifuminaku kwa ngangabuka; ne tunsere tubidi, kamwe pa dibeele kamwe pa dibeele, ne mbakulekelele. Mbakubwikile kudi cipuutu cifiike, cya lufu.”

<sup>93</sup> Ki Cintu kampanda kwambilaci mwaneetu wa bakaji mukwabo uvwa musômbe pabwîpi apu, mwikale ne cyamu cya fôtô cya cîtwa midilu, ne: “Kwata fôtô.” Kadi yêyè kayi anu muswe kucyenza to. Nansha nanku: “Kwata fôtô,” kadi yêyè kwikala anu ukandamana. Ki pashiishe kulwaci cyakabidi, ki yêyè kwambula fôtô. . . ne kukwataye fôtô. Kadi’s ki cyôci aci, ku maalu a mamanya. Cidi ku mboodi wa mamanyisha; mundidimbi mubwikila ne cipuutu cifiike.

<sup>94</sup> Pashiishe, paakiitabuuja mukaji awu ne paakenjiibwa disambila, fôtô kukwaciibwaye dyakamwe paanyima paa disambila adi, mutooke tòò. Mêmè kwamba ne: “Mundidimbi awu wamanyi kuya.” Nwamonu anyi? Inâbànzà awu udi ne mwoyi, ku ngâsà wa Nzambi.

<sup>95</sup> Nudi bumvwe cîndi muswe kwamba anyi? Paudi wamba bulelela, badi mwa kukuseka bwa cikondo kampanda, badi mwa kuumvwa bibi bwa cikondo kampanda. Kadi, Nzambi neashindike cyôci aci, bwa ne mbulelela, pawikala anu mwa kushaala naaci. Nwamonu anyi? Shaala wêwè anu kacya wakwataku. Mbifwanyine kwangata bidimu, kadi, anu muvwabi bwa Abraham ne bakwabo abu, kadi misangu yônso Yêyè neacivwije anu bulelela.

<sup>96</sup> Pavwa Mwanjelo wawa. . . Ne ndi ncinka ne, pa kuumusha mukajaanyi, kudi bantu mwaba ewu diloolo edi, baa kukaadi bidimu makumi asatu, bàvwà biimane pabwîpi apu paakapweka Cyôci aci. Kudiku muntu mu bateeleji emu mpindyewu uvwapu dîbà dîvwà Mwanjelo wa Mukalenge, mupwekele pa musulu bwa musangu wa kumpala, kumpala kwa bantu awu anyi? Elaayi byanza byenu muulu tûng. Eyo, s’mbôbò abu. Nwamonu anyi? Mpindyewu, ndi mmona Mandamu Wilson wela cyanza muulu. Úvwa mwimane mwaba mwine awu. Mukajaanyi, kwaka, uvwapu. Kadi ncyêna mumanye ne nganyi wa ku badi bashaale baa ku bôbò abu, uvwaku mwimane ku mwelelu wa mâyi mwaba ewu, kumpala kwa bantu bàâbûngî menemene, pâmvwà munkaci mwa kubatiiza pa dîbà ibidi wa mapingaja apu to.

<sup>97</sup> Nenku anu mu dyulu dya muunya wa cifyondola mbwa makoba adi, kuulu kuvwa kakuyi kuloke mvula nansha mukese kûkaavwa mbingu amu, ki Yêyè ulwâlwa ne mukungulu

ewu, wamba ne: “Anu mwàkatùmiibwà Yone Mubatiiji, bwa kudyanjidila Dilwa dya kumpala dya Kilisto, wèwè udi mutumiibwe ne Mukenji, bwa kudyanjidila Dilwa diibîdi dya Kilisto.”

<sup>98</sup> Bantu bààbûngi, baa ku beena kantu-ku-byanza, baa mu cimenga amu, bàvwà biimane ku mwelelu wa mâyi aku, kunkonkabo ne Civwa cyumvwija cinyi. Mêmè kwamba ne: “Aci kacivwa bwanyi mêmè to. Mbwenu nwênù. Mêmè ntu mwitabuujè.” Uh-huh. Ki kuyaCi. Ne pààkuumukà Mwanjelo awu, panwikala bavuluke, Wàkaya mutangile ku wesete paakayaYe wenda ùbànda apu; anu pambelu pààpa, muulu, kuulu kwa cilamba, ki kuya mutangile ku wesete.

<sup>99</sup> Pashiishe, mêmè kutuutakeena ne mulongi wa mabulunga a muulu, udi mwikale Mwena meeji. Ki kungambilabo bwa cisumbu cya mitoto yàkalwà pamwe mu cisumbu kampanda cya mitoto.

<sup>100</sup> Cikondo aci, beena meeji mu Baabulona baakamona lwà ku Palestine, mitoto yisatu eyi mu cisumbu cya mitoto. Nukaadi bangumvwe ndonda bwalu abu, misangu ne misangu. Nudi bamanye ne aci ncilwe kujaadikiibwa, mu mbingu mikese mishaale eyi, ne mbulelela anyi? Mwaneetu Sothmann, ní udi usanganyibwa penyi, udi ne cibejibeji aci diloolo edi anyi? Cidi mu cibejibeji, dibejì kampanda dya cibejibeji cya Dyalumingu, cya matuku citeema a ngondo wa dikumi ne mwibîdi, mùvwà kàmòna-kàmba kampanda muye kuntwaku, bakakalule bintu byònsò ebi. Ne patudi twakulangana apa tukaadi ne mwoyi, batujaadikile, bwa ne tudi. . . Cidimu cilwalwà eci ncyà 1970. Bidimu mwandamutekete bya dishiilangana, ku mabwe adibo bakalule, bwa kujaadika ne dibala dya cikondo kadyena mu dyòci to. Dìbà dikaadi dipite ne panudi nwênù nwelela meeji apu. Ncyèna mumone Mwaneetu Fred to, nansha nanku. Mwaneetu Sothmann, udi kaaba aka anyi? Udi ne cibejibeji aci mwaba awu anyi, Mwaneetu Sothmann? Udi naaci. Nyawu ùdi ne cibejibeji aci. Pàmwäpa maalaba diloolo nênkulòmbè bwa wacibala. Katwena ne dîbà to, bwa diloolo edi. Pa nanku, nudi mwa kumonaayi.

<sup>101</sup> Nenku, tangilaayi, anu mu cyôci's. Beena meeji abu, Beena meeji baa beena Yuda mu Baabulona mwamwa, biikale balonga mitoto, baakamona mitoto ayi yikapona mu cisumbu cyayi. Nenku paakamonabo nanku, ki kumanyabo ne Maasiya ukaavwa pa buloba. Nenku ki bôbò bàlwalwà aba, babwela mu Yelusalema, benda bimba misambu. Lwendu lwa bidimu bibidi! “Udi mulediibwe Mfumu wa beena Yuda awu udi penyi?” Bàbànda bapweka ne misèèsù. Nenku, mona's, Iz- . . .

Izaleela kadi kubasekabo ne: “Musumbà wa bakoleshi baa maalu ewu!” Bôbò kabaakamanyaku cintu nansha cimwe pa bwalu abu to, kadi Maasiya ukaavwa pa buloba. Nenku

mpindyewu nudi bamanye mùyiilè bwalu bulonda abu, cyakambabo.

Mpindyewu, netubale cyôci aci, maalaba diloolo.

<sup>102</sup> Mpindyewu, ndi mfika ku cyôci eci ne, bikeena-kumona kabitu bipangila to, bwalu mbya kudi Nzambi. Ne mu lwendu lwônsò elu, kuvwa anu cintu kampanda cinkoka, cinkoka bikole be.

<sup>103</sup> Pashiishe, Mwena meeji awu paakangambilaye maaluu aa, pâncivwà anu nsongaalume apu, mukubi wa nyama ya mwitu; anyi kumpala kwa cyôci aci, ngeela meeji ne ki muvwabi, pa miine maaluu aa. Nenu kumpabi bwôwà's, bwalu mvwa ngumvwa bwôwà bwa civwa Mwena meeji awu. Kadi pashiishe mêmè kulwa kujandula ne Beena meeji baa mu Bible abu bavwa babinge, bwalu Nzambi utu ucimanyisha mu dyulu kumpala kwa Yèyè kucimanyisha pa buloba, batangila mibidi ya mu dyulu ayi.

<sup>104</sup> “Nzambi katu ne kansungansunga kudi bantu to, baa matunga ônsò,” mwakamba Peetelo. Mpindyewu, kadi aba badi baMuciina, mu matunga ônsò, Nzambi udi ubaanyisha. [Katupa kaa mukaba wa mêyi munda mutupu—Muf.]

<sup>105</sup> Nenu tudi tusangana, pashiishe ne, ngâkateeta bwa kulekela meeji awu. Kadi, kaa, mbifwanyine kwangata mêmè, bwa kubwelamu, muvwa cyôci aci cyenda ciya ku musangu ne ku musangu mu mushindu awu, cyenda ciya mu mushindu awu. Kadi mvwa naaci bwôwà.

<sup>106</sup> Mwena meeji ewu kungambilaye ne: “Wèwè kwadyakutuutaku dyakalenga ku Esete to.” Yèyè ne: “Wèwè utu mulediibwe mwinshi mwa cimanyinu kampanda.” Ki yèyè ne: “Wèwè... Cimanyinu aci, cisumbu cya mitooto aci, paakasambakeenayi, lwà mwômò amu, dituku dya kulediibwa kwebe, yivwa milembelele lwà ku wesete. Nenu wèwè udi ne cya kuya mutangile ku wesete.”

Mêmè ne: “Pwa bwalu abu mwoyi.”

<sup>107</sup> Mêmè—mêmè ncyakakeba bwa kwikala naaci bwalu to. Kadi nansha nanku, pavwa matuku enda aya, bivwa anu ne, aci kacivwa mwa kucyumushaku mu mwoyi wanyi to.

<sup>108</sup> Pashiishe, pâmvwà nsanganyiibwa kuntwaku diloolo adi, bwa bikeena-kumona ebi. Ncivwa mwa kubyumvwaku to. Bânà beetu ba-Baptistes bavwa bangambila ne mbya dyabulu. Ki pashiishe paakamweneka Mwanjelo awu, ki Yèyè kucyela anu mu Mifundu kakuyi mpatà to, wamba ne: “Anu mwakadibi musangu awu!”

<sup>109</sup> Pavwa baakwidi munkaci mwa kukokangana pa maaluu kampanda, kabayi bamanye kantu nansha kamwe pa ne bivwa bikengela nkoozi ya mushindu kaayi yivwabo mwa kwikala bavwala, ne bilâmbà ne bikwabo byônsò, ne bakokangana pa

tuumaalu twabo tuvwa tubatapulula atu apu, Beena meeji bôbô bavwa benda balonda mutooto benda baya kudi Kilisto.

<sup>110</sup> Pavwa bayiishi bamba bôbô ne Yesu uvwa mushimakajanganyi, ne m'Beezezebula apu, démon kampanda kujjuuka e kwamba ne: “Twêtù tudi bamanye ne Wêwê ewu udi nganyi, Wa Cijila wa Nzambi. Bwa cinyi Ukaadi ulwa kutukengsha kumpala kwa dîbà?”

<sup>111</sup> Pavwa Pôlò ne Siila benda bapweka, benda bayiisha Evanjeeliyo, kakaji kakwabo keena lubuku kàvwà kasômbe mu mùsèèsù. . . Kadi bayiishi baa mu ditunga adi bavwa bamba ne: “Bantu aba mbashimakajanganyi. Badi bapandulula ekeleeziya yetu, ne bikwabo, batwisha buloba katungu, ne dinyanguka dyabo edi.”

<sup>112</sup> Kadi cyakenzeka ncinyi? Kakaji Keena meeji aku, keena lubuku aku, kaakamba ne: “Bantu aba mbantu baa Nzambi, bàdi bàtwàm bilà njila wa Mwoyi.” Ki Pôlò kutandishaye nyuma uvwa munda mwako awu. Kavwa yêyè ne dijinga dya dikwacisha kampanda bwa kufila bujaadiki bwa ne yêyè uvwa nganyi to.

<sup>113</sup> Yesu uvwa misangu yônsò anu uyambila bwa yôyì kupuwa. Kadi bidi bileeja ne, misangu mikwabo, démons yitu mimanye maalu a Nzambi kutamba bayiishi; aba bôbô batu bashaala baswikiibwe bikole ku ntendeleelu. Ki muvwabi, mu Bible, ne Nzambi katu ushintuluka nansha.

<sup>114</sup> Dîngà dituku, ngenda mpweka, kukaadi bidimu bitaanu, mfumina mwa Mwaneetu Norman, mvwa ngendesha mashinyi ngenda mpweka ne njila. Nenku mvwa mfuma ku dyenza dya disangisha kuntwaku, ki Mukalenge Nzambi kummwenekela mu cikeena-kumona. Nenku mvwa musômbe kumpala kwa ciibi cyanyi cya lupangu, lwà kwanyi kumbelu eku. Ne kuulu kuvwa kumweka kubi.

<sup>115</sup> Bààbûngì beenu nebavuluke cikeena-kumona aci. Ncifundiibwe mu mukanda wanyi wa bikeena-kumona. Ntu mubifunde bwa ngiikale mutwishiibwe ne ncibipu mwoyi to.

<sup>116</sup> Nenku mu cikeena-kumona eci mêmè kumona ne, kuvwa cintu kampanda cilwè mu njila, ne kuvwa mabwe matangalaja mu bulà mwanyi mwônsò amu. Muvwa mashinyi a dilandakaja ne a dikoona naawu buloba, njila mujima awu mu dibànda ne mu dipweka, ne mici yivwa myupudiibwe ne mijoomonyiibwe. Ki mêmè kukudimuka bwa kubwelela lwà ku ciibi aci, kadi civwa cijikakaja cyônsò kudi mabwe awu. Ki mêmè kuya, bwa kukonka muntu awu ne: “Bwa cinyi nunku ewu?”

Ki yêyè kujuula musaalala bikole, kuntwa cibwa, kwamba ne: “S’ki munutu nwênù bayiishi nanku awu!”

<sup>117</sup> Mêmè ne: “Mêmè’s ndi mukwele anu lukonko cyanaana ne: ‘Udi wenza nunku bwa cinyi?’ Wêwê—wêwê udi ulwa ku lwanyi

luseke lwa musèsù, apa. Udi mwenze nunku bwa cinyi?” Ki yêyè kwamba kunnangula dipi, kadi kuntwaye cibwa.

118 Ki mêmè kudyambidila ne: “Nëmmwambilè anu ne kî mmumanye cidiye wamba aci to.”

119 Ki Dîyì kwakula, dyamba ne: “Kwenji aci to. Wêwè udi mwambi.”

Ki mêmè kwamba ne: “Bîmpè be.”

120 Ki mêmè kukudimuka, nenku, ku dyabalume dyanyi, kumpala kwa ciibi cya lupangu aku, kùvwa kùsanganyiibwa dikaadika dya kale dibwikila dya mu mpàta. Nudi bamanyi ne ncinyi, dikaadika dibwikila, ne tubalù tuswikilaku. Nenku bitangilangane ne luseke lwa mwendeshi kuvwa mukajaanyi musòmbekù. Mêmè kutuma mèsù paanyima lwà mundekeelu, nenku bânà baanyi bavwa basòmbè lwà mwine mundekeelu amu. Mêmè kubànda mu dikaadika amu. Mêmè kwambila mukajaanyi ne: “Munanga wanyi, ngàtwàdi byònsò bîmvwà paanyi mwa kutwala abi.” Ki mêmè kukwata nshinga ne kukoka kabalù kavwa kumpala aku, ne kwasa lwendu kuya mutangile ku wesete.

121 Ki Dîyì kungambila ne: “Piikala cyòci eci cyenzeke, pa dîbà adi wàsè lwendu uye mutangile ku wesete.”

122 Mwaneetu Wood, mmwenji wa makumi a bya diibaka naabi wa mu ekeleeziya wetu ewu, ne mulubuludi. Mbanganyi badi bavuluke cikeena-kumona aci mpindyewu, bavuluke ne nkaadiku munulondeleci? Cya bushuwa. Ncifunda pa dibeji. Ki mêmè kwambila Mwaneetu Wood. . . Yêyè ngutu musumbe, kùdi ekeleeziya, citupa cya buloba cìdi pankaci pààpa naka cyacya. Nenku ùkaavwa ùjinga kwibakapu nzubu wa mabwe. Mêmè kwamba ne: “Kücyênji to, Mwaneetu Wood, bwalu kî mbafwanyineku kukupa mfranga yebe ya ku cyòci aci to. Misangu mikwabo, pàmwäpa. . .” Aci kukaadi bidimu, kukaadi bidimu bitaanu. Mêmè ne: “Bòbò, pàmwäpa, nebapicishile cilamba aci mwaba ewu, ne mabwe awu pàmwäpa adi nnzubu wanyi wa mwinshi mwa buloba udibo bataatule, ne tujila twanyi ne bikwabo, bivwà bisanganyiibwà mwómò emu.” Pamutu paa kwikalabi mabwe, bivwa mbipese bya mabwe bya nshaamenda. “Ne pashiishe nebèlè byòbi abi panshi apa, bwalu mbambe mu cibejibeji ne ki civwabo bateeta bwa kwenza.” Ee, yêyè kaakamwibaka to. Ndekeelu wa byònsò kupangadikabo, paanyima bu paa cidimu cijima nanku awu, anyi bibidi, ne bavwa mwa kucipicishilapu, cipwekela lwà *eku* nunku. Pa nanku aci kukosaci bwalu, ki paanyi kumba kucipwa ne mwoyi, ne kubilekela byenzeka’s.

123 Mpindyewu, cintu cya pabwaci ncyenzeke kukaadi bu cidimu cijima. Mvwa ngenza masangisha diloolo kampanda mwa Mwaneetu Junior Jackson mwamwa. Nyêyè udi musòmbè mwaba ewu ewu mene, mwambi wa ba-Méthodistes udi mupete

Nyuma Mwîmpè, ne mubatijiibwe mu Dînà dya Yesu Kilisto, ne ukàadi mpaasata wa umwe wa ku ekeleeziya myâna yetu ewu.

<sup>124</sup> Anu bwa kunuleeja mushindu udi Nzambi ukwata mudimu ne cisamba eci, ndi ngamba bwalu ebu ne mwoyi wanyi wônso. Ncyênàku mumanye disangisha nansha dimwe pa buloba bujima, disangisha dicikàle didyenzè cimuku, mwaba wûndi mêmè ngiitabuuja ne Nyuma wa Nzambi udi usanganyiibwa, kupita disangisha edi nansha. Badi ne twabo tulumbùlumbù. Ncyà bushuwa ne kî mbanji kufika mwaba uvwa ukengela kwikalabo to, nansha umwe wa kutudi, kadi mbasemenenangane menemene anu mudi kampanda mukwabo yônso ûndiku mumanye ewu.

Nênùleejè, bu mûndi mumanye civwa cilwa kwenzeka.

<sup>125</sup> Mwaneetu Jackson uvwa muloote ciloota. Kayiku ne mushindu wa cyôci kuumumuka to; nenku mvwa nshiyangana ne ekeleeziya wende, kadi yêyè kayiku mwa kucitwala to.

<sup>126</sup> Nkubangila dîbà kaayi kukaadici, Mwaneetu Jackson? [Mwaneetu Jackson udi wamba ne: “Mvwa muloote ciloota aci mu ngondo mwibîdî wa cidimu cya ’61, Mwaneetu Branham.”—Muf.] Mu ngondo mwibîdî wa cidimu cya ’61, muvwaye muloote ciloota aci.

<sup>127</sup> Ki kulwaye kûndi, e kwamba ne: “Cintu kampanda cidi pa mwoyi wanyi. Bikengela nkwambile, Mwaneetu Branham.”

Mêmè ne: “Tuyaaku tûng, Mwaneetu Jackson.”

<sup>128</sup> Ki kwambaye ne: “Ndi muloote ciloota.” Nenku’s ki cyôci aci! Mêmè kushaala musômbe kacya ngaapuwa, ne muteeleje ne mutangile. Kwambaye ne: “Ndi muloote kwikale kakuna kanene menemene, cyenze bu mu budimi nanku, mwikale mashinda a bleu anyi cintu kampanda.” Ki yêyè ne: “Kuulu pa lusongo lwa kiine kakuna aku, mwaba uvwa mâyi masukùle muumushe buloba awu, ne pàvwa lubwebwe lwa ku lusongo aku, kuulu pa lusongo lwa kakuna, cyenze bu lusongo lwa mukuna. Civwa ndubwebwe; kacyi mashinda to. Nenku mwaba ùvwà mâyi masukùle awu, avwa matape mifundu ya dibala mushindu kampanda pa miine mabwe awu. Ne wêwè uvwa mwimane mwaba awu, mmunkaci mwa kuumvwija mufundu ewu pa miine mabwe awu.” Ki yêyè ne: “Twètù bônso,” nenku ki mushindu uvwaye mucyâmbè ngwôwò ewu, ne, “bâna beetu baa ku Géorgie, ne baa mu nyungulukilu mwônso amu, tuvwa bônso biimane pamwe, munkaci mwa dikuteeleja pauvwa uumvwija mufundu uvwa kawuyi wumvwika awu pa mabwe awu, pa mukuna awu.”

<sup>129</sup> Ki yêyè ne: “Pashiishe wêwè kubakula cintu kampanda, byenze bu mu lupeepele nanku awu, cintu cyenze bu mulonda wa cyamu, anyi—anyi bu mbâlâminè nanku awu.” Kî mmwômò anyi, mwaneetu? “Cintu cya mushindu awu, mulonda wa cyamu, musâkisha bikole.” Ki yêyè ne: “Cyôci aci, mushindu mwine

uwàkacyènzà, ncyèna mumanye to.” Ki yèyè ne: “Wèwè kutuuta lusongo lwa mukuna alu, kulupanda ku nyungulukilu aku, kadi kujuula mùsongà wawu awu. Ûvwa ne mmwenekelu wa cipaapu cya musaka. Ki wèwè kujuula mùsongà wawu awu.” Mpindyewu, aci civwa nngondo ne ngondo ne ngondo kumpala kwa Diyiisha dya cipaapu cya musaka kuyiishiibwadi. Ki yèyè ne: “Mwinshi mwa cyôci aci muvwa dibwe ditooke, dya granite. Ki wèwè kwamba ne: ‘Muunya, anyi bukênkè, kacya kabutu bwanji kuteмена pa Cyôci eci to. Ikalaayi batangile pa Cyôci eci. Ikalaayi batangile Cyôci eci.’”

<sup>130</sup> Nenku aci ncyà bushuwa, bwalu, mu difuka dya dyulu ne buloba, dyulu ne buloba byakafukiibwa kumpala kwa bukênkè kwikalaku. Twètù bônso tudi bamanye aci. Nzambi uvwa wendela pamutu paa mâyi. Ne—ne pashiishe, ku cibangidilu, Yèyè wakaakula bwa bukênkè. Nenku, mu bufuki emu, mwônsò mwinshi amu, mu cikondo civwa difukiibwa adi dyanzeka aci, bukênkè abu kabuvwaku bwanji kulwa pa dibwe adi nansha.

<sup>131</sup> Ki yèyè ne: “Ikalaayi batangile pa Cyôci eci. Kacya Bukênkè kabutuku bwanji kufikaPu to.” Nenku bwônsò bwabo mbenze anu babanduluka, ne mêmè mbambila bwa kwikalabo batangile Cyôci aci, ki bôbò bônso kuseemenabo bwa kutangila munda amu.

<sup>132</sup> Kadi yèyè kwamba, pavwabo munkaci mwa kutangila munda amu apu, yèyè kutangidila ku katengu kaa dîsù, ngeela meeji ne ki muvwabi nanku, ne kushaalaye muntangile. Mêmè kudifindila ku luseke kampanda, ne kubanga kuya mutangile ku Wesete, mutangile kudi dîbà dibwelela; mbànda kakuna, mpweka kakuna; mbànda kakuna, mpweka kakuna; ngenda nkepa anu kukepa, too ne mûngàavu anu mêmè yônsò kumujimina ku mèsù.

<sup>133</sup> Ki kwambaye, pashiishe, pângààkenzà aci, kwambaye ne: “Pashiishe bânà beetu kukudimukabo, paanyima paa katanci, kwambabo ne: ‘Wăjîminyî anyi? Wăyi penyî?’” Ki yèyè ne: “Bamwe kuya bangate *wawa* njila; bamwe kwangata njila kampanda, ne bakwabo mukwabo njila.” Kadi, bakese menemene mbaakashaala baatangile cîmvwà mêmè mubămbile aci.

<sup>134</sup> Mpindyewu monaayaaku dyumvwija dya ciloota aci. Bwalu, ncitukù mumwambile cintu nansha cimwe to, nansha nî nganyi wa ku badi apa aba ncitu mubămbile to, nansha umwe wabo. Kadi, mêmè kwamba ne: “Eyo.” Ne mwoyi wanyi, uzakala. Mvwa munkaci mwa kutangila. Mpindyewu, mufundu uvwa kawuyi wumvwika awu. . . Indilaayi, nêngănji anu kucishiya ku luseke bwa katanci kakese.

<sup>135</sup> Abidi adi panshi aa, Mwaneetu Beeler. . . Mwaneetu Beeler utu neetu pa ciibidilu. Udi kaaba aka anyi, Mwaneetu Beeler? Eyo, paanyima apa. Billy uvwa wamba ne: “Mwaneetu Beeler

lungenyi ludi lumulubakana bikole. Mmuloote ciloota cikole mwa kucyumvwa.”

<sup>136</sup> Mémè kuya kudi Mwaneetu Beeler, ki yêyè kwamba, lwà kwende kumbelu kwaka diloolo kampanda, pâmvrhà muye ngenda nsambangana. Ki yêyè ne: “Mwaneetu Branham, ndi mulooto ciloota cikole mwa kucyumvwa.” Yêyè ne: “Ndi mulooto ngenda mpweka ne musulu wa mâyi, mutangile ku wesete. Kadi kuvwa njila ku luseke lwa dyabakaji aku. Ne mémè mvwa nsanganyiibwa ku luseke lwa dyabakaji aku, ngenda nya mutangile ku wesete mu mwine njila awu, byenze bu ne, mvwa ngenda nkebangana ne ngombe. Kadi ku luseke lwa dyabalume, kwenzabi ne mmone pânkaavwà mumane kupweka kuntwaku apu, ki wêwè ewu mwaba awu. Nenu wêwè uvwa munkaci mwa kukungwiya musumbà munene wa ngombe, ne kwikale byakudya bûngi cyanaana kuntwaku.” Ki yêyè ne: “Pashiishe wêwè kwangata ngombe ayi e kubanga kuyaaluja wenda ubànda naayi musulu awu.” Kadi, pa kutangila, mémè mvwa ne cya kwikala mumuleeje ne mutu bwa yêyè kutangila ngombe ayi. Ki yêyè ne: “Mpindyewu, nebiikale bipeepele bwa ngombe yaya, ndi mumanye ne neyilonde njila udi ne dikandamana dikese. Kadi Mwaneetu Branham mmuswe bwa yôyi kushaala ku luseke lwa dyabalume lwa musulu wawa, pa nanku mémè nêngààlukilè ngenda mbànda ne njila ewu bwa nyilame bwa kayiikadi yalwa kusabuka musulu ne kulwa luseke lwa dyamunu elu, kadi bwa nyilamine luseke lwa dyamwamwa.” Kadi, yêyè kumona ne, mémè ncyakalondaku ngombe ayi to, kadi ngâkatungunuka ne kuya, mutangile ku wesete. Yêyè ne: “Ûdi ne cya kwikala wenda ukebangana ne yidi mipambuke.”

<sup>137</sup> Kayi mwanji kujikija dyawula dya ciloota aci, mémè mumbe mucimone. Ki pashiishe, monaayi, kwambaye ne yêyè kungeelelaye ndambu wa meeji avwa kaayi anu mimpè to, pa nanku kwalukilaye bwa kutangila. Ki kwambaye ne nkaavwa mfika ku mukuna kampanda mushimate, ne dyakamwe mémè kujimina. Ki yêyè kubanga kudikonka ne ncinyi civwa kacyi mu cyôci. Kupwekaye. Ki pashiishe kupetaye kasulu kakese ku luseke lwine luvwaye alu, kavwa kapanduluke ku dyabakaji aku. Ngeela meeji ne mmwômò’s, Mwaneetu Beeler. Eyo. Ki kumonaye pa kuumukila ku . . . Nenu lwà ku lwanyi luseke aku kuvwa cibila cya cikwacisha bwôwà. Ki pa dîbà adi kudyambidilaye ne mvwa mwa kwikala mukabwele mu cibila aci ne—ne mufwe. Pashiishe kumonaye, ne kwambaye ne wakakenzakana, kumonaye ne bwenzeji bwa cibila aci, buvwa buye mu *nunku* ne bukenze ne kwikale mushimi wa mâyi a kazeeze âfûkuka, kadi mâyi awu kaayi apingana abwela mu buloba to. Kutangilaye dyamwamwa dya diboko dikese dya mâyi edi, anyi dya kasulu kakese aku, ki kumonaye tunyama tukese kampanda twikale ne maci menze a bijengu. Ki yêyè ne: “Ndi ngeela meeji ne nênkwatèku kamwe.” Ki kusabukaye dyamwamwa.



138 Pashiishe kubangaye kwela meeji bwanyi mêmè. Ki yêyè kubànda pa kakunakuna kakese, bwa kukenzakana ne kumona ne kuvwa kaadibwe kakese kasomoke, kakese menemene, kabumbakane, nudi bamanye's, pâmvwà mêmè mwa kwikala mwendele kadi kunyunguluka. Kadi, yêyè ne: "Kakuvwa cintu nansha cimwe to." Ki meeji kubangawu kumulubakana. Yêyè ne: "Cyènzèkèdì mwaneetu ki cinyi's? Ndi ndikonka cidi cyenzekele Mwaneetu Branham?" Kadi paakakwacikaye bwôwà, ki kungumvwaye ngaakula. Nenku mvwa mwimane pa lusongo lwa mukuna. Ne mvwa ngambila Mwaneetu Beeler dyumvwija dya ciloota kampanda dîmvwà mumupe kakuyi kwanji kwenza ntanta to, ne mmwambila bwa kwindilaye Mukalenge, ne dîngà dituku nêntuutakeenè nende mu cisanga kampanda. Kadi's ki yêyè uvwa mwaba awu awu.

139 Mpindyewu, dyumvwija dya ciloota aci didi nunku: Mushindu uvwa musulu awu mwalabale awu, uvwa mmusulu wa mwoyi. Mvwa ngendelapu mutangile ku wesete, ne yêyè pende; bwalu, yêyè uvwa wenda ulonda njila kampanda, uvwa ûshààla mukese... wenda upweka ne mwine njila ewu. Kadi ku luseke lukwabo kuvwa mashinda àbûngì, kadi bikùtùkùtù byàbûngì bya mici, ne mingonga, ne bisuku; kadi mwômò amu muvwa mashinda àbûngì. Nenku mushindu awu ki utudi twenda tukebanganana ne Mukalenge, ne Cyakudya cya Mukalenge, tupicila mu ntatu. Dikungwija dya ngombe, civwa ng'ekeleeziya ewu, kubalamina luseke lwa dyamwamwa. Mu bushuwa bwa bwalu ngombe neyijinge kwendela mu njila munefuke, dingumba, yôyi ne mushindu; mbwena kwamba ne, njila awu uvwa uleeja dingumba. Mvwa mumwaluje bwa kwenda kubàndayè ne njila, bwa kutangilaye ne kumona ne kayiikadi yavwa kuya ku dingumba kampanda.

140 Mu mushindu wakamonaye cimanu kaciyiku mushindu wa kupita, ciikale cimpangisha bwa kuya ku wesete, civwa ncilumbu cya citadi aci ne mbulamataadi. Muntu nansha umwe kêna mwa kuumvwa mushindu wûndi mupatukemu to. Civwa ncimanu civwa cinjike, kadi Mukalenge kumpicishilamu, ne mêmè kulwa kushaala nkaadi dyamwamwa. Nêntwilanganè neebe, wêwè Mwaneetu Beeler, mu cisanga amu.

141 Pa nanku mpindyewu, pashiishe, dyakamwe paanyima paa cyôci aci, Mwaneetu Roy Roberson. Mwaneetu Roy, udi kaaba aka diloolo edi anyi? Eyo, ndi—ndi ngeela meeji... Cinyi? [Mwaneetu kampanda udi wamba ne: "Lwà ku luseke kwaka"—Muf.] Lwà ku luseke kwaka. Yêyè uvwa mumbiikile, ne uvwa muloote ciloota. Nenku yêyè kuloota twêtù biikale tukungwija ngombe. (Mpindyewu, aci nciisâtù.) Tukungwija ngombe. Nenku kuvwa mashinda, mayifikile ne mu difu, cyakudya bûngì cyanaana. Twêtù bônso bânà beetu tuvwa basangile pamwe. Nenku twêtù kulwa ku kaaba kampanda bwa didya dya mundaamuunya, ki Mwaneetu Fred Sothmann

kujuukaye e kwamba ne: “Eliya, muprofeta munene, neakwile kaaba aka lelu ewu, mu nkankala.” Kadi pashiishe tudi benze anu tumana kudya didya dya mundaamuunya adi, muntu ne muntu udyela nyêye uyaaya wawa, nenku kudikonkaye ne mbwa cinyi kabaakindila bwa kuteeleja Cyôci aci bacyamba.

<sup>142</sup> Mpindyewu, monaayi mudi aci cipetangana anu menemene ne cya Mwaneetu Jackson! Nwamonu’s, aci cidid cîlenga anu menemene, menemene, civwà Mwaneetu Beeler mwawule! Muntu nansha umwe kaakindila, bwa kumanya ne bwalu bwine buvwa cinyi to.

<sup>143</sup> Monaayi, dyakamwe paanyima paa cyôci aci. Mwaneetu wa bakaji Collins, udi kaaba aka anyi? Mwaneetu wa bakaji Collins mmuloote ciloota mwikale usanganyibwa apa mu ekeleeziya emu, ne kuvwa dibaka divwa pabwîpi ne kwenzeka. Ne paakamonaye, kumonaye Mubaki ubwela, mupwangane; kadi Mukaji-musela yêye kavwa mupwangane menemene to, cibî ùvwa m’Mukaji-musela; mpindyewu, ki Ekeleeziya nyêye awu. Nenku bivwa bu ne kuvwa meesa a Mukalenge, anyi—anyî mudimu kampanda wenzeka apa, cyenze bu didya dya mundaamuunya diikale dilongolodiibwa. Ne cyakenza ndambu bu cyamupicidi bwalu Mwaneetu Neville nguvwa wabanya didya kampanda dya mundaamuunya mu ekeleeziya amu, kadi mwaneetu wa bakaji awu kwambaye ne civwa n’Cyakudya cya citambe bwîmpè cya kacya yêye wamonaku. Ûvwa ne nzala ya dikema mimuvwambule. Kadi kudyambidilaye pâmwâpa ne, mu ciloota amu’s, ne kabivwa bikengela bwa yêye mwaneetu wa balume awu kuCyabanyaye to, nenku yêye ne Mwaneetu Willard bavwa mwa kuya ku Ranch House bwa kadyabo. Nenku mbenze anu baya, Bukênkè budi ku luseke lwa dyabalume bumba bujima. Mpindyewu, nudi bamanye ne Cyôci aci ncinyi.

<sup>144</sup> Mpindyewu, Cyakudya. Mukaji-musela kî mmupwangane to, kadi Mubaki Yêye mmupwangane. Mukaji-musela kî mmwanji kwikala mupwangane to, kadi Cyakudya civwabo munkaci mwa kufila aci kacivwa ncyakudya cyetu cyena diînà eci to, n’Cyakudya cya nyuma cinutu nupeta, kwine kwônso aku eci.

Ngânji ngiimanyinebi mwaba ewu pa ciloota ciînâyî aci, bwa katanci kakese.

<sup>145</sup> Kanwenaayiku nuvuluka anyi, Mwaneetu Sothmann, Mwaneetu Banks Wood, patuvwa mu Arizona mwamwa cidimu cishaale, patuvwa baye katwa buluwà bwa ngulube ya diitu, nenku Mukalenge kwakula? Kanwenaayiku bamanye bintu bidiYe mwenze anu mu byôbi menemene abi, uleeja civwà mwa kwenzeka, patuvwa twenda tuya mu njila apu anyi? Piikalabi ne ncyà bushuwa, nwênù bânà beetu baa balume babidi abu ambaayi ne: “Amen.” [Bânà beetu baa balume babidi abu badi bamba ne: “Amen.”—Muf.] Kacyakacya kacitu cipangilaku to.

146 Ki mêmè kumona mu cikeena-kumona patuvwa twendesha mashinyi, dîngà dituku, ci—cikeena-kumona cya Mukalenge kulwaci kûndi, paanyi mwikale ndilongolola, pa diine dîbà adi, pâmvwà ngaalukila kwanyi kumbelu apu, bwa kuya dyamwamwa dya mbû. Nenku pângààkayà dyamwamwa dya mbû, ee, mêmè kumona pa mazuwa a mâyi. . . anyi ku luseke lwa mbû kampanda, kûvwà mazuwa aashila lwendu aku. Nenku kuvwa muntu, mukese mwîpî mwaba awu, ki kwambaye ne: “Ndi mukulongolwele bwâtù, Mwaneetu Branham.” Kadi kavwa nkaabwâtù kakese menemene, kaa bule bwipacila—bwipacila dikàsà dimwe, kadi kiikale katooke zee bu nêjè. Ki kungambilaye ne: “Ebu ki bwa wêwè kusabuka naabu.”

“Kaa,” mûngààkambà, “kî—kî—kî nkakumbane to.”

147 Yêyè ne: “Nebunyeeme kilomeeta makumi asambombo ne yinaayi ku dîbà dimwe, mu dibànda ne mu dipweka mu *nunku* ewu.” Mbwena kwamba ne, mu dibànda ne mu dipweka dya ku mwelelu kwa mâyi.

“Kadi,” mûngààkambà, “kôkò aka kakaakumfikisha dyamwamwa to.”

148 Ki pa dîbà adi yêyè kutangila panshi, e kwamba ne: “Nda muyaayabo bôbò amu.” Ki mêmè kutangila, nyawu kuvwa Mwaneetu Sothmann ne Mwaneetu Banks Wood, basômbe mu bwâtù bulaaba mukubu wa mâyi a matamba, biikale ne nshinga kampanda ya dyasa naayi cituudilu miteeka paanyima paabu apu. Mwaneetu Banks mwikale ne cifulu cibunyina muulu mushindu *ewu*; Mwaneetu Fred mwikale ne kende kaakèpî kabunyina pa kaamwînù apu. Ki yêyè ne: “Nda muyaayabo bôbò amu.”

Mêmè ne: “To. Ncyakuya to.”

149 Ki muntu awu kubambilaye bôbò, muntu mukese awu, kwambaye ne: “Nwênù aba nudi biici baa mâtù anyi?”

Mwaneetu Banks ne: “Eyo.” Mwaneetu Fred ne: “Eyo.”

150 Kadi mêmè kwamba ne: “Kî mmwômò to. Mêmè ntu mwici wa bwâtù, kadi ndi mumanye ne ncyèna mufwanyine kuya anu bwa nanku to, ne ndi mutwishiibwe ne ncyèna mufwanyine kuya mushindu awu to.”

Yêyè ne: “Kwêna muswe kuya naabo anyi?”

Mêmè ne: “To. To.”

151 Ee, ki mêmè kukudimuka. Nenku, pângààkakùdimukà, muntu mukese uvwa ku dilobo awu kwenzekabi ne uvwa mmwaneetu mwîmpè, Mwaneetu Arganbright.

152 Ki mêmè kwalukila mu cikeena-kumona aci, nenku kuvwa nzubu mukese, muleemule. Ki pa dîbà adi Dîyi kungambila. . . Ne nwênù bônsò nudi bavuluke cyôci eci, anyi, bààbûngì baa kunudi. Dîyi kungambila ne: “Lwâ wêlèmu Cyakudya.

UCikungwijilemu. Awu ki mushindu umwepele wa kubalamina mwaba ewu, ngwa kubapa Cyakudya.” Ki mèmè kwelamu, nkaavwa mwelemu, bipanza binene menemene byûle tente ne maakarotè a matambe bwîmpè ne bisekiseki bya bitambe bwîmpè, ne bikwabo, bya kacyapu ngaamona. Nudi nuvuluka mpindyewu anyi, cikeena-kumona aci?

<sup>153</sup> Mpindyewu, ki mèmè kulwa kunwambila pashiishe civwà dyumvwija. Mvwa ne cya kuya ku Zurich, mu Suisse, ne Mwaneetu Arganbright, bwa masangisha a mulongolongo a maloolo ataanu. Mèmè kwambila bânà beetu kumpala kwa kwenzekawu ne: “Ncyakuya to.” Nenu mvwa nsanganyibwa ne Mwaneetu Welch Evans kuntwaku, pàvwà Cyôci aci cifile dyumvwija.

<sup>154</sup> Diloolo kampanda, ngeela meeji ne m’Mwaneetu Welch wâkalwa kungangata, tuvwa ne cya kuya mu lwendu lwa dikaloba, ki kwambaye ne Mwaneetu Arganbright uvwa umbiikila. Mèmè kwamba ne: “Eyo, ki cyôci eci. Nebanguumushe mèmè.” Ne misangu yâbûngi . . .

<sup>155</sup> Kabivwa bya kupicila ku Mwaneetu Miner to; awu yêye ngumwe wa ku balunda baa batambe bwîmpè. Kadi misangu mikwabo, bu bôbò anu mwa . . . Bôbò anu beele meeji ne neuyiishe cintu kampanda cibengangane ne dilongesha dyabo, badi bamba anu cyanaana ne newikaluku, bwa kufikishabo balunda beele ku dikûya. Ki kwambabo ne . . .

<sup>156</sup> Mwaneetu Arganbright kumbiikila e kwambaye ne: “Mwaneetu Branham,” anu civwa Nyuma mwambe menemene. Yêye ne: “Lwâku, ulwe wêwè ne mukajeebe,” yêye ne, “bwalu kabyakukengela bwa wêwè kuyiisha bikole to,” yêye ne, “bwalu ndi ngeela meeji ne badi bakwangata anu bwa diloolo dimwepele cyanaana.” Ki yêye ne: “Udi mufwanyine mene kubenga kuyiisha diine diloolo adi.”

Ki mèmè ne: “To.”

<sup>157</sup> “Ee,” yêye ne, “lwâku’s, wêwè ne mukajeebe, lwâyi bônso, wamonu’s, nenku nwênù balwe, mèmè ki wanwangata bwa kunyunguluka neenu. Kaa, mukajaanyi, mukajeebe, ne bônso abu, netwendakane mu Suisse mwônso amu, tuya too ne mu Palestine.”

Mèmè ne: “To.”

<sup>158</sup> Mvwa ne dyumvwija. Mèmè kwambila Mwaneetu Welch, anyi Mwaneetu Fred ne bakwabo abu ne: “Nënnwâmbilè mu dinda, kadi bikengela mukajaanyi änjì kwamba pende dîyì.” Nenu pângâäkamubiikilâ, ki kubengaye bwa kuya. Mèmè ne: “Ki cyôci eci.” Nwamonu anyi?

<sup>159</sup> Mpindyewu, kaabwâtù kakese katooke aku, divwa ndisangisha dimwepele adi. Bidi anu bîmpè bwa kuya mwaba kana wônso muneemu emu, ku mwelelu wa mâyi, ne disangisha

dimwepele, kadi kî ndikumbane to, nansha muvwako katooke ne kimpè amu, bwa kumbiikila dyamwamwa dya mbû.

<sup>160</sup> Mwaneetu Fred, ne mwaneetu wawa, bàvwà bàleejà mpala mu cikeena-kumona abu, bavwa baleeja ne: “Nda bu mwena lwendu lwa dibandila dya myaba, bwa kuumusha luteetuku.” Kadi ncyakacyuka bwa kwenza aci to. Ne kubenga kwa ne bôbô kî mbiici baa mâtù aku, civwa ciswa kwamba ne kî mbayiishi to. Kadi, mêmè mvwa muyiishi.

<sup>161</sup> Ne pashiishe Cyakudya mu nzubu mukese, muleemule awu. Ncyakaya dyamwamwa dya mbû to; kadi ngâkaalukila ku nzubu mukese ewu, ne twâkawkwâta mikaba ya mêyì makumi ne makumi, pa bipaapu bya misaka ne bikwabo byônsò, bwa kuleeja bantu dîbâ ditudi ne mwoyi.

<sup>162</sup> Mpindyewu fwanyikijaayaaku nansha aci ne bikwabo abi, biloota abi. Eci cyôci civwa ncikeena-kumona. Cyakudya aci, s’ki Cyôci eci. Ewu ki mwaba mene.

<sup>163</sup> Monaayi pa dîbâ adi cidi cyenzeke. Ne dyakamwe paanyima paa cikeena-kumona ciiñâyì aci cimane kulwa, anyi ciloota ciiñâyì aci bamane kucingaawila, ki kulwaku Mwaneetu Parnell. Yêyè awu udi kaaba aka, mu mwaba kampanda, kaaba aka mene. Kadi Billy kavwa apa to, kadi muntu awu uvwa mubinduluke. Yêyè ngwa mu Bloomington, ngeela meeji, anyi wa mu Bedford? [Mwaneetu wa balume kampanda udi wamba ne: “Lafayette.”—Muf.] Lafayette, wenza masangisha. Nenuk yêyè ki kuloota ciloota, ne kulwaye kudi Mwaneetu Wood. Ki yêyè ne: “Ncyêna anu mwa kulekela eci ciya paaci anu nanku to. Bikengela ncyâmbè, bikengela ngambile Mwaneetu Branham. Cidi cintacisha be.”

<sup>164</sup> Nenuk Nzambi ngudi mumanye, kakuyiku ciloota nansha cimwe munkaci mwabi amu to. Mbilwe anu, cimwe, bibidi, bisatu, binaayi, bitaanu, bisambombo.

<sup>165</sup> Mwaneetu Parnell kwambaye ne: “Ndi muloote ciloota cidi kaciyi cyumvwika to. Ndi muloote mêmè nya bwa kwenza disangisha kuntwaku. Kadi mu mushindu kampanda anyi kansanga, kudi disangisha kampanda kaaba aka mu ekeleeziya mupyamupya, bu nanku awu.” Ki yêyè ne: “Ekeleeziya mupyamupya ewu,” mushindu wakapatukaye, ne kudikonkaye ne mbwa cinyi kayivwaku ne dikwacishangana mu midimu munkaci mwayi yôyi yibidi, anyi cintu kampanda cya mushindu awu. Ki kwambaye ne ûkaavwa mwimane apa, too: “Ee, nkaadi mumane anu kubwela muneemu’s. Nêngǎnji anu kushaala mwindile, nenuk nêndondè disangisha.” Ki yêyè ne: “Muntu kupicilaye mu citanda amu, muvwale nkooci mufiikuluke, mukwate mukanda. Ngeela meeji ne ùvwa munkaci mwa kufunda.” Ki yêyè awu kwambila Mwaneetu Parnell, ne: “Edi disangisha kî ndya bantu bônsò to. Didi anu bwa balami ne balubuludi nkaayaabo.” Ee, ki kudyumvwaye ndambu anu

bu bamwakidile bibi's. Pa nanku yêyè kupatuka pambelu paa ekeleeziya mupyamupya awu, ekeleeziya ukaavwâbo biibake awu, anyi ewu uvwabo balongolole, mwakaja bîmpè awu. Kadi paakatukilaye pambelu, kuvwa nêjè mwikale uloka, kuulu kubi, mu movù wa mashika.

Kadi nansha umwe wa ku bantu aba kavwa mumanye kantu nansha kamwe pa cyòci eci to.

<sup>166</sup> Kadi mmwenze anu upatuka pambelu paa ciibi apu, ki mêmè ewu mwimane mwaba awu, mutangile lwà ku wesete. Mêmè kwamba ne: “Kùdyũmvù bu bakwakidile bibi to, Mwaneetu Parnell. Mêmè nênkulombòlè, bwa cidì cikengelà wêwè kwenza.”

<sup>167</sup> Nanku Mwaneetu Parnell, ne yònsò wa ku bakwabo abu, bavwa bamanye ne ncivwaku mubâmbile dyumvwija kampanda to. Bidi mmpindyewu mene; nansha nanku, mwikale ncimona pavwabo mwa kucyawula apu. Uvwa mumone mushindu wîngââkapâtukâmu lukasalukasa awu anyi, Mwaneetu Parnell? Mbwa ne ncilu kukwambila to. Nanku mêmè kutungunuka ne diya, nciyiku mwa kwambila Mwaneetu Wood anyi nî nganyi mukwabo kantu nansha kamwe to, muntu nansha umwe. Mêmè kucishiya anu nanku, bwalu mvwa muswe kumona kuvwaci cilombola aku. Nukaadiku bangumvwè ngamba matuku aa ne: “Ndi mutacishiibwe” anyi? Ki civwa bwalu ncyòci aci.

<sup>168</sup> Ki pashiishe, Mwaneetu Parnell, kwambaye ne ngâkamwambila ne: “Mwaneetu Parnell, asaaku lwendu. Ne mwaba wa kumpala uwafika nepiikale Seforah.” Seforah, “Seforah,” cidì ciswa kwamba ne katwangaji, anyi cituudilu, anyi cintu kampanda. Mêmè kwamba ne: “Kushaadidi apu to. Pashiishe uye, mwaba wâlondâ, neusangane mukaji mununu; nenku pa dîbâ adi kwimanyinyi apu to. Wâsè cyakabidi lwendu, neusangane mukaji mununu menemene; kwimanyinyi apu to.” Ne dîbâ dyònsò ditwakenza adi, dîmvwâ ngaakula adi, tuvwa twenda twendela mu nêjè. Ki mêmè kwamba ne: “Uye too ne pawasangana Mukajaanyi. Nanku pawasangana Mukajaanyi, wimanyine mwaba awu!” Ki yêyè kwamba ne wâkatângila, nenku tukaavwa bapatuke mu nêjè amu, biikâle mu cipeela. Nanku mêmè nkaavwa mujimine. Ki kutangilaye paanyiima, e kumonaye mukajende ukoka mâyi ne mpompi ku ciina kampanda cya mâyi, ne mwambi kampanda mwikale umukoka, umukoka bwa kuumusha ku mpompi awu. Mukaji awu uvwa yêyè anu kacya wamutangila ne mêtù. Kì kutabulukaye.

<sup>169</sup> Dyumvwija dya ciloota cyebe ndyòdi edi. Nanku mvwa mwa kwikala mukwambile, diine diloolo adi, kadi mêmè kukudimuka anu cyanaana. Pa bidi bitangila Seforah awu, ne ewu uvwa mukaji mununu awu, ne mukaji mukwabo mununu menemene, mununu menemene awu, ng'ekeleeziya ayi. Nwamonu anyi? Ne bu mudibi mu bushuwa bwa bwalu ne Seforah uvwa mmu—

mmukaji wa Mòsà, Seforah, ne tudi tumona ne ngákamwambila bwa kiimanyinyi myaba yivwabo ayi to, nansha biikale banunu baa bishi. Avwa mmalongolodi. Kanwimanyinyi myaba yidiwu ayi to. Akaadi majikile matuku. Kadi padiye ufika padi wanyi Mukaji, udi mwikale Ekeleeziya wanyi kudi Yesu Kilisto muntune, wa mu dituku dya ndekeelu edi ewu, nenku ki Yèyè ewu: “Wimanyine mwaba awu!” Nenku nkaavwa muye ku wesete.

<sup>170</sup> Pashiishe Mwaneetu wa bakaji Steffy. Yèyè udi mwa kwikala kayi kaaba to, bwalu uvwa mubwele mu lupitaadi. Ncyèna mumanye ne nkwèpì. . . Mwaneetu wa bakaji Ste- . . .? Eyo, nyèyè ewu. Mwaneetu wa bakaji Steffy uvwa mulwe kwanyi kumbelu bwa disambila, kumpala kwa kuyaye ku lupitaadi bwa kumupandabo, bwa Nzambi amukwacishe ne amubeneshe. Ne Yèyè mmumukwacishe anu cya bushuwa.

Nenku yèyè kwamba ne: “Ndi muloote ciloota cya kaciyi cyumvwika to, Mwaneetu Branham.”

Mêmè ne: “Eyo?”

<sup>171</sup> Ki yèyè ne: “Ndi muloote nsanganyiibwa ku Wesete. Nenku mêmè. . .” Aci’s ki ciisambombo. Ki yèyè ne: “Ndi muloote nsanganyiibwa ku Wesete, ciikale citupa cya buloba cya bikunakuna. Nenku ndi mwenze ntangila, lwà pa kakuna, pavwa piimane muntu mununu bikole mwikale ne mwedi mule, mutooke, ne nsuki yivwaye naayi yivwa mimubwikile too ne mu mwisù. Ne ùvwa mudjìngile mùpàlala wa cilàmbà citooke, cintu kampanda, civwala,” yèyè kwamba ne, “lupepele lwikale luwunyungisha.” Ngeela meeji ne mmwòmò’s, Mwaneetu wa bakaji Steffy, mushindu awu. Ki yèyè ne: “Mêmè kutungunuka ne kwenda kuseemena pabwìpì menemene. Yèyè uvwa anu kacya wimana, kuulu pa lusongo lwa mukuna, mutangile ku esete.” Ki yèyè ne: “Mêmè kudikonka ne: ‘Ewu muntu mununu nganyi?’” Ki kwikalaye wenda useemena, wenda useemena lwà pabwìpì menemene. Kadi mmwenze anu ufika pabwìpì menemene, ki kujingululaye ne yèyè awu uvwa nganyi. Uvwa ng’Eliya udi kayi ufwa awu, muprofeta, mwimane lwà kuulu aku mutangile ku Esete.

<sup>172</sup> Yèyè ne: “Ndi ne cya kumumona.” Ùvwa ne dijinga kampana. Kubàndayè kakuna aku lubilu ne kudyupwilaye panshi mwaba awu, bwa kwakulaye nende, mu dìnà dya Eliya. Nenku kwambaye ne, paakaakula mwaneetu wa bakaji awu. . . Kuumvwaye dīyì, dyamba ne: “Udi ukeba cinyi, Mwaneetu wa bakaji Steffy?” Nenku uvwa mmêmè.

<sup>173</sup> Ciloota cyebe cyakuula anu mwine mwaba awu, Mwaneetu wa bakaji Steffy. Bwalu, dyakamwe paanyima paa cyòci aci, ngákaya ku Louisville. Civwaye ukeba civwa ndisambila. Nwamonu anyi? Ki kuumvwaye bîmpè anu bya menemene ebi, mu lupitaadi amu; nenku cimanyinu cya mêmè mwikale nya ku

wesete, mutangile lwà ku esete, bwa kutangila cisumbu cyanyi cya mikooko. Monaayi. Pàkaavwà. . .

174 Mvwa muye ku Louisville. Nenku pângààkaalukilà, mèmè kwenza bu wâbwelèdì ku ciibi cya lupangu, kadi ki mpoopu nyôyì ayi myasa muntwamu, luseke lukwabo lwa ciibi cyanyi cya lupangu aci. Mukalenge Goynes, wa mu midimu ya misèèsù ya cimenga muneemu emu, ùvwa wènda ùbànda ne njila. Kwambaye ne: “Billy, vwilabi apa.” Yèyè ne: “Bikengela utentemune biibi byebe bya lupangu ne bikwabo, lupangu, lupangu lwa mabwe alu ne biibi.”

Mèmè ne: “Ee, eyo, Bill.” Mèmè ne: “Nê—nêncyènzè. Dîbà kaayi?”

175 Yèyè ne: “Nênkwabîlè. Nênkumanyîshè ne ndîbà kaayi.” Mèmè ne. . . “Anu ku mbangilu kwa cidimu, nkwabangabo kucyenza.”

Mèmè ne: “Eyo.”

176 Pa nanku mèmè kubanga dyalukila cyanyima mu nzubu, ki mukajaanyi kwambaye ne: “Bikengela nye kasumba byakudya ne lukasa lwònsò.” Ki mèmè kupweka ne njila. Ki nsongaalume kampana, Raymond King, ùtu maanyimeela wa cimenga. Mvwa mèmè misangu yònsò mmubiikila anu ne “Dici dya Bitoci.” Bwalu, patucivwa bânà batekete, twowela bònsò pamwe, yèyè kwasa muntu mukwabo cimoto cya bitoci mu dici. Nenku tukaavwa misangu yònsò anu tumubiikila ne, “Dici dya Bitoci.” Ùtu musòmbèle anu kwînshi kwa njila wanyi aku, bu—bu ciibi ciibidì nanku awu kwînshi kwa Mwaneetu Wood.

Ki mèmè kwamba ne: “Bitoci, anji vwilabi apa kakese.”

Yèyè ne: “Eyo, Billy.” Ki kulwaye mwaba awu.

Mèmè ne: “Dyadya dikunji dinwajiiki didi bishi?”

177 Yèyè ne: “Billy, cidi ne, nebangate cintu cyònsò eci.” Yèyè ne: “Mici yònsò eyi, mpangu eyi, ne bikwabo byònsò, bikengela bitentemunyiibwe.”

178 Mèmè ne: “Ee, maanyimeela mmungambile ne lwanyi lupangu ndumate munkaci mwa mùsèèsù.”

179 Yèyè ne: “Eyo, kadi nebaalabaje njila. Nebalwèlèmu, nansha bishi.” Yèyè ne: “Nansha lwanyi paanyi.”

180 Mèmè ne: “Ee, Mwaneetu Wood’s utu—utu mwibaki wa bimanu bya mabwe, ne,” mèmè ne, “nê—nêmmwabîlè anu alusemeje paanyima.”

181 Yèyè ne: “Billy, kukulengi wèwè to. Lekela mwenji wa makumi a bya dyasa naabi ènzè yèyè cyòci aci. S’ncisòmbedi cya mpaasata, kî mmwômò anyi?”

Mèmè ne: “Eyowa’s, mukalenge.”

Yèyè ne: “Ulekele yèyè awu àcyènzè.” Yèyè ne: “Wèwè’s udi mumanye cîndi muswe kwamba aci.”



Mêmè ne: “Eyo.”

<sup>182</sup> Ki mêmè kukudimuka e kuya, nenku, ne lukasa lwônsò mushindu *ewu*, cintu kampanda kundengaci. [Mwaneetu Branham udi utuuta cishonto—Muf.] Mêmè kwalukila kumbelu, kubwela mu nzubu wanyi wa mudimu, kwambula mukanda awu, nenku ki cyôci aci’s. Kacivwa cya madyoto a nshaamenda to; civwa cya mabwe. Mêmè kwamba ne: “Meda, dilongolole.”

<sup>183</sup> Biloota bisambombo bilondangane, ki pashiishe cikeena-kumona kubyoya. “Padi anu bintu ebi byenzeka, ùkudimukè ùye ku wesete.”

<sup>184</sup> Mêmè kubiikila ku Tucson. Mwaneetu Norman ukaadi mupete mwaba. Ncyêna mumanye kûnyaaya kwine to. Ncyêna mumanye cya dyanza to. Ndi paanyi anu mu. . . Ndi mwimane. Ncyêna mumanye cya dyanza to. Ndi nshiya nzubu udi kayi ukengela mêmè kufucila to. Difutu dyanyi ndya ndola lukama ku lumingu. Ne bidi bikengela mêmè kwikala mfuta ndola mitwe ku lukama ku ngondo bwa nzubu. Ndi apa mene ne bâna beetu baa balume ne baa bakaji, mwaba udibo bannange. Kadi nyawu nya, nciyi mumanye ne nkwèpì kwine aku to. Nciyi mumanye ne mbwa cinyi ciine to. Ncyêna mwa kunwambila ne mbwa cinyi to. Kadi kudi cintu anu cimwepele cîndi mumanye, ncyâ kulonda cidiYe wamba bwa kwenza. Ncyêna mumanye, ncyêna mumanye ne bidi bikengela kukudimukila njila kaayi to, ncyêna mumanye cya dyanza to. Aci kî ncintangileku mêmè. . .

<sup>185</sup> Ngeela meeji ne mushindu awu ngwàkadyûmvwà Abraham paakamwambilaYe ne: “Sabuka, uye dyanwamwa dya musulu.” Kavwa yèyè mumanye cya dyanza to pa kuumusha anu disòmbela dya mwômò amu, diditapulula. Mêmè ncivwa mumanye cya dyanza to.

<sup>186</sup> Mu dinda dya diisambombo dishaale, lumingu lumwe kuumukila ku makeelela awu, bu pa dîbà isatu wa bufuku nanku awu, mvwa mujuuke ne munweku ndambu wa mâyi, ne mukabwikile Joseph mbulankete, mu cibambalu cyende. Ne pashiishe mêmè mwalukile, ne mwanji kwikala anu mulaadile panshi. Mêmè kuya mu tulu. Ne pângàayi mu tulu. . . Ndi ndonda tuubiloota twa tukesetukese etu ne tuntu tukwabo, bwa nufike ku dimona nshindamijilu wa bindi ndilongolola bwa kwamba ebi. Mêmè—mêmè kubwikila Joseph mbulankete, kadi kwalukila e kulaadila panshi, ne kuya mu tulu. Ki mêmè kuloota ciloota.

<sup>187</sup> Ki mêmè kuloota mmona muntu uvwa ne cya kwikala taatù wanyi, nansha muvwaye muntu munene menemene amu. Ne mêmè kumona muntu mukaji uvwa ne cya kwikala maamù wanyi, cibi kavwa mufwanangane ne maamù wanyi to. Kadi muntu ewu uvwa ne lwonji lwâbûngì be kudi mukajende awu. Nenku ùvwa ne dikombo dya mitu yisatu, kuvwaye mupandile citupa cya mucì eci. Nenku civwa cyenze. . . Nudi bamanye’s, citupa cya mucì cikosa, cicyamakaja mu mucì, nudi bamanye’s,

cidi cyenza dikombo dya mitu yisatu. Ne musangu wónsò uvwa anu mukaji ewu ne abange kujuukila kuulu, uvwa anu ùmupyà mu nshingu kadi kumubòkotadi ku mutu, ne ùmwela panshi bya kaciyiku mwa kunyunga to. Nenku pa dîbà adi uvwa ùshààla kacya wàlààla panshi mwaba awu, wela bulaku eku ùdila mwadi, ne pashiishe ùbanga cyakabidi kujuukila kuulu. Mulume awu uvwa mwa kwikala watwa eku watwa eku, ùdyùmvwà maleela, mutadike cyâdi, muntu munene wa katanku. Ne pavwa mukaji awu uswa kujuukila cyakabidi kuulu, uvwa ùmupyà mu nshingu, wàngata dikombo dya mitu yisatu adi, ùmubòkotadi ku mutu, ùmubyànkula panshi. Wàlukila cyanyima mutadike cyâdi, byenze anu bu ne mmwenze cintu kampanda cya cinene.

<sup>188</sup> Nenku mêmè mvwa mwimanyine pa bule, mbandila ciine aci. Mêmè kudyambidila ne: “Mêmè ncyêna mwa kubundula wawa muntu to. Mmutambe bunene. Ne, pashiishe, yêyè nyawu ní m’papa wanyi, kadi kí m’papa wanyi to.” Ki mêmè kwamba ne: “Yêyè kêna ne bukenji bwa kusubisha mukaji wawa mushindu wawa to.” Ki mêmè kwenza bu wàmubindulukidi ndambu. Nenku, pashiishe, dyakamwe, mêmè kupeta dikima dikumbane, ne mêmè kuya too ne kuvwaye aku, kumupya mu nkoolo wa muteelu kadi kubanga kumunyungulula. Ki mêmè kwamba ne: “Kwêna ne bukenji bwa kumutuuta nansha.” Nenku ndi mwenze anu ngamba nanku anyi, mapùndà a mu maboko kadi kumpatawu anu patapata. Mêmè kumweka anu bu muntu wa mpolondo’s. Nenku muntu awu mmwenze anu utangila mapùndà a mu maboko awu, pa dîbà adi kungumvwaye bwòwà. Ki mêmè kwamba ne: “Udidinge anu umutuute kabidi, kadi ubwelakane naanyi umanyinepu.” Ki yêyè kwelakana bwa kumutuuta cyakabidi. Ki pa dîbà adi mêmè kutabuluka.

<sup>189</sup> Ki mêmè kwanji kushaala mulaadile panshi apu ndambu. Mêmè kudyambidila ne: “Neinyi ciine aci? Kabyena byumvwika to mùndi mufwanyine kuloota pa bidi bitangila mukaji wawa.” Nenku katanci kakese naka, Yêyè pende umba ulwa. Mêmè kupeta dyumvwija.

<sup>190</sup> Mukaji awu udi uleeja ekeleeziya wa pa buloba, leelu ewu, wa buloba bujima. Ntu mulediibwe anu mu bukooya ebu mene, kadi’s ki mêmè ewu. Yêyè udi ne cya kwikala maa—maamù mu mushindu kampanda wa...piikalabi ne uvwa mmamwëndè wa ndumba, kadi nansha nanku mwómò amu’s ki mùndi muleediibwe. Ne...Bayende mmangumba adi amukookesha awu. Dikombo dya mitu yisatu divwaye naadi adi, ndibatiiza dya busatu dya mu mênà a mashimi adi, bwa ne, musangu wónsò udiye ubanga kujuukila kuulu, disangisha, bwa kuCiitabadi, ùdi ùmutuuta naadi ùmubyànkula panshi. Nenku, mu bushuwa bwa bwalu, bu muvwaye yêyè awu munene menemene, mêmè kukudimuka, mvwa mmuumvwà bwòwà ndambu. Kadi pashiishe mêmè kudyela mudiye, nansha nanku, nenku mapùndà a mu maboko awu avwa mmapùndà

a diitabuuja. Aci kumfikishaci ku didyambidila ne: “Piikalabi ne Nzambi udi naanyi, ne mwikale mwa kumpa mapùndà a mu maboko, ngǎnji kulwangana bwa mukaji ewu. ‘Lekela kumutuuta wê!’”

<sup>191</sup> Tuvwa ne cya kwikala pa dîbà dikumi wa mu muunya, pakaavwa mukajaanyi uteeta bwa kubwela mu cibambalu amu, ki cintu kwenzeka. Mêmè kubwela mu cikeena-kumona mu dinda amu, ki mêmè mu mushindu kampanda anyi mushindu kansanga . . . Mpindyewu, vulukaayi ne, kacivwa nciloota to.

<sup>192</sup> Kudi dishiilangana pankaci paa biloota ne bikeena-kumona. Biloota mpaudi muye mu tulu. Bikeena-kumona, mpaudi kuyi muye mu tulu to. Tudi balediibwe mushindu awu. Muntu wetu yônsò wa ciibidilu ewu, padiye uloota, cidì mmu kandondo kende. Ne kandondo kende aku kadi kule menemene nende. Byumvwilu byende bidi mu mudimu, padiye mu ngiikadilu wende wa kumpala wa umanya bidi bipitakana apu. Mu mwine ngiikadilu wa umanya bidi bipitakana ewu, wêwê, udi anu mùtù pa ciibidilu amu; udi umona, ulabula, ulenga, ununkila, umvwa. Kadi paudi mu kandondo keebe, mu tulu, kwêna nansha umona, anyi ulabula, anyi ulenga, anyi ununkila, anyi umvwa to. Kadi kudi cintu kampanda, paudi uloota, cidì cyenza ne walukile ku ngiikadilu wa umanya bidi bipitakana ewu. Kudi civulukilu, cidì cyenza ne uvuluke cintu kampanda cyûvwà muloote aci, kukaadi bidimu. Mushindu awu ki udi muntu wetu wa ciibidilu ewu.

<sup>193</sup> Kadi padi Nzambi udyanjila kulongolola cintu kampanda, kandondo aka kakeena kule menemene ne mwab’ewu to, bwa mwena lùmònò, kadi ngiikadilu ayi yidi anu kaaba kamwe. Kadi mwena lùmònò yêyè, mu cikeena-kumona, kêna uya mu tulu to. Yêyè udi anu mu byumvwilu byende abi, kadi ucimona.

<sup>194</sup> Mwva ngumvwija bangangabuka kampanda cyôci aci, dîngà dituku. Ki kujuukabo e kwamba ne: “Bilenga be. Kacya katutuku nansha banji kwela meeji ku cintu cya mushindu awu to.” Pavwabo bangaena diteeta dya tujilujilu twa mu bwongo, ki bôbò kwamba ne mvwa . . . Kacya kabavwaku banji kumona cya nankwee. Nwamonu anyi? “Ee,” mwakambabo, “kudi cintu kampanda cidì cikwenzekelà.” Ki mêmè kwamba. Mêmè kucilonda. Yêyè ne: “Ki cyôci aci’s, menemene.” Nwamonu anyi?

<sup>195</sup> Ngiiikadilu yônsò yibidi ayi yidi anu mitwangane pamwe. Kî ncintu cîndiku mêmè mufwanyine kwenza to, kadi kaciyena cyenza ne ngiikale mutambe muntu mukwabo yônsò ewu to. Cidi anu, Nzambi ngudi mucyenzè mushindu awu. Kuyi uya mu tulu to. Udi wêwê anu apa mene, byenze anu bu mulaale tulu. Udi mwimane kuulu apa, mutangile kumpala, mushindu ewu.

<sup>196</sup> Ne nwênù bônsò nukaadi bacimonemone, pa buloba bujima. Kuyi uya mu tulu to. Mwimane pa cibumba cya ku cyambilu apa, ngaakula ne bantu, nutu nungumvwa mbwela mu bikeena-kumona ne ngaalukila. Pândi ngendesha mashinyi

mwikale neebe, anyi mwaba kampanda mukwabo kana wònsò, mwikale nkwambila bintu biikalà ne cya kwenzeka; kabiyiku bipangila to, kacya kabituku bipangile to. Kudiku muntu ukaadi mucimone cipangile anyi? [Disangisha didi dyamba ne: “To.”—Muf.] To, mukalenge. Kacyena mwa kupangilaku to. Kacyakupangilaku to, bu mudibi ne n’Nzambi. Monaayi, anu pa cibumba cya ku cyambilu apa, binunu, kumpala kwa bantu binunu makumi, nansha mene mu myakulu mikwabo yîndi mêmè nciyi nansha mwa kwakula to, kacyna anu cipangila to. Nwamonu anyi? N’Nzambi!

<sup>197</sup> Mpindyewu, mu cikeena-kumona eci, anyi anu bu mûmvwà ngamba, mêmè kutangila ne kumona cintu cya kacyi cyumvwika to.

<sup>198</sup> Mpindyewu, bivwa byenze anu bu ne mwanaanyi wa balume mukese ewu, Joseph, ùvwa ku luseke lwanyi. Mvwa ngaakula nende. Mpindyewu, bu nwênù mwa kutangila cikeena-kumona aci ne ntema menemene, nenumone bwa cinyi Joseph uvwa mwimane mwaba awu.

<sup>199</sup> Nenku mêmè kutangila, kuvwa cipuka cinene. Ne pa cipuka apu, mu—mu cisumbu cya nyuunyi, tunyuunyi tukese menemene, twikale bule bwipacila centimètre umwe ne citùpà, ne butumbuke bwa cyabibidi cimwe cya cyâlà. Twòtò atu tuvwa tunkolomu tukese. Tuumasala twatu tukese atu twikale tupwekesha. Nenku kuvwa bu tubidi anyi tusatu pa ditamba dya ku lusongo, tusambombo anyi mwandamukulu pa ditamba divwa dilonda, ne dikumi ne tutaanu anyi makumi abidi pa ditamba divwa dilonda; twikale twenda tupweka mu mmwenekelu wa cipaapu cya musaka. Nenku tulumyana tukese atu, tuumisanjeela tukese atu, tuvwa tucyoke bikole bya menemene. Ne tuvwa tutangile lwà ku esete.

<sup>200</sup> Ne mêmè mvwa nsanganyiibwa mu Tucson, Arizona, mu cikeena-kumona amu, bwalu byakenzeka mu mushindu wa ne Yèyè kaakaswa bwa mêmè kupanga kumona ne pavwa mpenyi to. Mvwa munkaci mwa kudituula mpoopu, ya mu cipeela amu. Ki mêmè kwamba ne: “Mpindyewu, ndi mumanye ne cintu eci ncikeena-kumona, ne ndi mumanye ne ndi nsanganyiibwa mu Tucson. Ne ndi mumanye ne tunyuunyi tukese twatwa tadi tuleeja cintu kampanda.” Ne twòtò atu tuvwa tutangile lwà ku esete. Ki dyakamwe kupetatu meeji a kubuuka, nenku ki twòtò tûyaayà twatwa, tutangile ku esete.

<sup>201</sup> Nenku ntwezendè anu tùmuka tûya, cisumbu cya nyuunyi mipite yòyi ayi ku bunene kulwaci. Yivwa mifwanangane ne nkuci, ne mapwapwa masongoloke, myenze bu ya diikala dya dikunzubile, diikala ditookoloke ndambu kupita dya tuumisanjeela tukese twa kumpala etu. Ne yivwa yenda ilwa mitangile ku esete, lubilu.

202 Ne mmyenze anu yinjimina kwîsù, mêmè kukudimuka cyakabidi bwa kutangila ku wesete, kadi ki cintu kwenzeka's. Mu bushuwa bwa bwalu kwakenzeka dikubakuba—dyakanyukusha buloba bujima.

203 Mpindyewu, eci kacinupici to. Ne nwênù, badi bateeleja mukaba wa mēyì, ikalaayi batwishiibwe ne nudi bumvwe bwalu ebu bîmpè.

204 Kumpalampala, dikubakuba. Ki mêmè kudyambidila ne dyakadila bu cimanu cipumbishi cya dîyì, mwônsò munutu nucibiikila amu patu ndeke yisambuka mutooyi apu, kadi mutooyi walukila mutangile panshi pa buloba. Kunyukushadi anu naka, bu, ku mukungulu wadi, bintu byônsò. Pashiishe, civwa cifwanyine kwikala kâpatâ ka—ka—kanene kaa mukungulu, ne mukenyi, bu nanku's; ncyakamona mukenyi to. Ngâkumvwa anu dikubakuba dinene dyâkatuutâ adi, dyâkadilâ byenze bu ne bivwa nku sud, pa kuumukila mwaba wûmvwâ mêmè nsanganyiibwa awu, mutangile ku Mexique.

205 Kadi, dyakanyukusha buloba. Ne paakenzadi nanku, mêmè mvwa anu kacya ngaatangila ku wesete. Ne kule menemene lwâ mu Cyendelele, mêmè kumona cisumbu cya bintu kampanda cyenda cilwa. Civwa ne mmwenekelu wa cifwanyine kwenza bu tutoba tukese. Katuvwa tufwanyine kwikala tushaadile ku tutaanu, ne katuyi tupite pa mwandamutekete to. Kadi, Tûvwa mu mmwenekelu wa cipaapu cya musaka, muvwa tuumisanjeela etu tûvwâ tûlwa amu. Nanku paakenzeka aci, Bukole bwa Nzambi wa Bukole bwônsò kuntuntumuna e kuya naanyi bwa mêmè katuutakeena naaBo.

206 Ne ndi mwa kuCimona. KaCitu cyanji kunguumukaku to. Kukaadi kupite matuku mwandamukulu, kadi nciyiku mwa kucipwa mwoyi to, ne leelu. Kacya ncitu mupeteku cintu cya cintacishe bu cyôci aci to. Famiye wanyi ûdi mwa kunwâmbila.

207 Mvwa mwa kumona Banjelo abu, mapwapwa masongoloke maaluja paanyima awu, balwa lubilu lukole kupita lutu dîyì mwa kuya alu. Bavwa bafumina mu Cyendelele, mu katupa, byenze bu mu mubunyi wa dîsù. Bya kuyi nansha mwa kupodya to, anu mu mubunyi wa dîsù cyanaana, Bakaavwa mwaba awu. Ncyakapeta dîbâ dya kubala to. Ngâkapeta dîbâ anu dya kutangila cyanaana. Banjelo baa Bukole, banene, baa ngulu, batooke bu nêjè; mapwapwa matadika, ne mitu. Nanku Miiikale enza ne: “Hyu-hyu!” Nanku paakenzekaci, mêmè kwangaciibwa muulu e kubwela mu cipaapu cya musaka cya bisumbu abi aci.

208 Ki mêmè kudyambidila ne: “Mpindyewu, Bwanyi bwatûuku's.” Mêmè kushaala mukwacike tukulakaji mubidi mujima. Ki mêmè kwamba ne: “Kaa, ekelekele! Eci's cidi cyumvwija ne nekwikale dikubakuba dyâanshipâ's. Nkaadi ku ndekeelu wa njila wanyi mpindyewu. Ncyêna ne cya kwambila beena famiye wanyi to, piikala cikeena-kumona eci cinguumuke.

Ncyêna muswe bwa bamanye bwalu ebu to. Kadi, Taatù wa mu Dyulu nyewu wamanyi kummanyisha mpindyewu ne cyanyi cikondo cyajiki. Nenku ncyakwambilaku beena famiye wanyi to, bya bafwanyine kuditacisha bwanyi mêmè ne: ‘Bwalu, yêye nyawu ùkaadi pabwîpi ne kuya.’ Nenku Banjelo aba mbamvwile mêmè, nenku nênshipiibwè anu abidi adi panshi aa mpindyewu mu dikubakuba dya mushindu kampanda.”

<sup>209</sup> Ki kumvwilabi, pâmvwà nsanganyibwa mu cisumbu aci ne: “To, kî nnanku to. Bu ne civwa cikushipe wêwè, nunku’s ncishipe Joseph.” Kadi mvwa mwa kuumvwa Joseph umbiikila.

<sup>210</sup> Ee, pa dîbà adi mêmè kukudimuka cyakabidi. Mêmè kudyambidila ne: “Mukalenge Nzambi, eci cikeena-kumona cidid cyumvwija cinyi?” Ki mêmè kushaala ndikonka.

<sup>211</sup> Ki pa dîbà adi kumvwilabi ne, (kaciyi dîyì to) bimvwile paabi anu nanku. “Kaa! M’Banjelo baa Mukalenge, balwe bwa kumpa mudimu wanyi mupyamupya muntuma naawu.” Nenku ndi mwenze anu ndyambidila aci, mêmè kwela byanza byanyi muulu, kwamba ne: “Éyi Mukalenge Yesu, Udi muswe bwa ngéngè cinyi?” Ki cikeena-kumona paaci cyumba cinshiya. Bu munda mwa dîbà dijima nanku awu, ncivwa mwa kuumvwa bu bôbô mwa kundenga to.

<sup>212</sup> Mpindyewu, nwênù’s nutu bamanye mùtù mabenesha a Mukalenge. Kadi, Bukole bwa Mukalenge bùtu bwôbô bushiilangane anu bikole menemene, Bukole bwa Mukalenge mu myaba ya mushindu wawa. Mêmè nkaadiku muBûmvûmvwe, misangu yâbûngì menemene, kumpala kwônsò aku, mu bikeena-kumona, kadi kabiya bya mushindu wawa to. Bùtu buumvwika bu diciina cya cijila. Mvwa mukwacike ne bwôwa mu mushindu wa bu mukwacike tukulakaji mubidi mujima, mu bwikadi bwa Bifukiibwa ebi.

<sup>213</sup> Ndi ngamba Bulelela. Anu mwakamba Pôlò ne: “Ncyêna ndinga nansha.” Kacya kanutuku banji kunkwata ngamba cintu cya mashimi pa bidi bitangila cintu kampanda cya mushindu awu to. Cintu kampanda cidid pabwîpi ne kwenzeka.

<sup>214</sup> Pashiishe, paanyima paa katanci, mêmè kwamba ne: “Mukalenge Yesu, piikalabi ne nênshipiibwè, ummanyisheku, bwa ncyambidi beena famiye wanyi bwalu ebu to. Kadi piikalabi ne ncintu kampanda cya cyanaana, ungambile.” Kadi, cintu nansha cimwe kacyakandamuna to.

<sup>215</sup> Paanyima paa Nyuma mumane kunshiya, bu citupa cijima cya dîbà nanku awu, ngeela meeji, anyi cipite apu, mêmè kwamba ne: “Mukalenge, piikalabi nanku, pa dîbà adi, ne nênshipiibwè, ne Wêwè wâmanyi kujikijangana naanyi pa buloba, ne—ne nêngàngaciibwè nye Kwetu mpindyewu; byôbî biine, byôbî nanku, s’mbilenga. S’bidi anu bîmpè. Pa nanku,” mêmè ne, “byôbî nanku, ummanyisheku. Tumaaku cyakabidi Bukole Bwebe pambidi paanyi, pa dîbà adi nêmmanyè mwa

kubenga kwambila beena famiye wanyi anyi nî nganyi nî nganyi yônsò pa bwalu ebu, bwalu Wêwè nyewu ukaadi mudilongolole bwa kulwa kungangata bwa kuya naanyi.” Ki mêmè. . . Kadi cintu nansha cimwe kacyakenzeka to. Ki mêmè kwindila katanci.

216 Pashiishe mêmè kwamba ne: “Mukalenge Yesu, piikalabi ne kacivwa cyumvwija aci to, kadi ciikàle cyumvwija ne Wêwè ngudi ne cintu kampanda Cyûdi muswe bwa mêmè kwenza, ne necibuuludiibwe kûndi pashiishe, nanku tumaaku Bukole Bwebe.” Kadi ki Bwôbò kwamba kunguumusha ne mu cibambalu amu’s!

217 Mêmè kudisangana, mwaba kampanda, lwà mu ditumba. Mvwa mwa kuumvwa mukajaanyi, mu mwaba kampanda, uteeta kunyungisha ciibi kampanda. Ciibi cya mu nzubu wa bulaalu civwa cikanga ne nsapi. Nenku mvwa ne Bible mubuulula, kadi yêyè. . . Mwikale mbala, ncyêna mumanye to, kadi civwa, ngeela meeji, mmu Loomo nshapita wa 9, mvensa wa ndekeelu ne:

. . . *Monaayi, Ndi nteeka mu Siona* dibwe dya mu ditumba, *dibwe dya cilendwishi*, dibwe dya mu ditumba dya mushinga mukole, *ne ewu yônsò wâmwitabuuj*a *kaakufwishiibwa bundu to.*

218 Ki mêmè kudyambidila ne: “S’mbwalu budi kabuyi buumvwika to bwa mêmè mufwanyine kwikala mbala aci.” Nyuma pende’s nkacya anu wankwata, mu cibambalu amu! Mêmè kubwikila Bible ne kujuukila kuulu mwaba awu.

219 Mêmè kuya ku dididiishi. Tukaavwa pa dîbà bu dikumi nanku awu wa mu muunya, anyi dipite. Ki mêmè kwela byanza muulu, e kwamba ne: “Mukalenge Nzambi, ncyêna ngumvwa to. Edi dituku ndya pabwadi, bwanyi mêmè. Ne ndi mupatuke mu mêmè, bu nanku.”

220 Mêmè kwamba ne: “Mukalenge, aci cidì cyumvwija cinyi? Enzaku mbale cyakabidi, piikalabi ne ng’Wêwè.” Mpindyewu, eci ncimweke anu cya bwânà’s. Ki mêmè kwambula Bible awu, kumubuulula. Ki cyôci aci cyakabidi, mu mwaba umweumwe awu, Pôlò wambila beena Yuda ne bavwa bateeta. . . wambila beena Loomo muvwa beena Yuda bateeta kuCiitaba ku byenzedi, paabi ku diitabuuj nkutudi tuCiitabuuj.

221 Ee, cikaadi cikondo cya cikwacisha bwôwà, kubangila anu apu. Mpindyewu s’nudi numona mwaba wûndi mwimane. Ncyêna mumanye ne cidì munkaci mwa kwenzeka ncinganyi to. Ndi mupange ne cya kwamba’s.

222 Kadi mpindyewu ndekelaayi, mpindyewu, kubangila ku mpindyewu, bwa tusunsa tudi tulonda etu, tutwe ku dikumi ne tutaanu, anyi makumi abidi, ndekelaayi nteeteku bwa kwamba cintu kampanda mwaba ewu mpindyewu. Vulukaayi ne, kacyakacya musangu nansha umwe bikeena-kumona abi kabituku byanji kupangila to. Mpindyewu nêngàngatè Mifundu

bwa katanci, bu nwênù mwa kumona, mu Bwakabuulwibwa nshapita wa 10. Mpindyewu lekelaayi ngâmbè eci nunku. Piikalabi ne cikeena-kumona aci ncyà mu Mifundu, cidi mwa kuumvwijiiibwa anu ku Mifundu. Nenku ndi muswe nutwangajaayi byòbì ebi pamwe.

<sup>223</sup> Nenku, mpindyewu, nwênù badi apa aba, ne nwênù badi bateeleja mukaba, ikalaayi batwishiiibwe ne nudi nwamba eci mushindu wûndì mêmè ncyamba ewu, bwalu ncifwanyine kwikala cya bantu bumvwa bibi anu bipeepele bya menemene.

<sup>224</sup> Nudi mu dilwijakaja anyi? [Disangisha didi dyamba ne: “To.”—Muf.] Eyo. Anu. . . Ndi nwwela twasakidila bu munudi biikale batuuje, lenga be.

Mpindyewu, mwanjelo wa mwandamutekete. . .”

<sup>225</sup> Mpindyewu, bakalenge wa yaaya, (mûndì mwambe cyôci eci mu cyena-bwalu) eci ki cimanyinu cya nshiiikidila anyi’s? Mpenyi patukaadi ne mwoyi apa? Tukaadi dîbà kaayi dya dituku? Bu mudi mulwanganyi wa mvita ya bibula muzengele, bufuku bujima, ujuuka umunyika ku ntanku, bwa kutangila ne kumona ne ndiiba kaayi, uteemesha bukênkè. Disambila dyanyi didi ne: “Nzambi, enzaku bwa tuteemeshe Bukênkè.”

<sup>226</sup> Ndi mwimane mu mwaba wa bwalu bukole be, bu nwênù nanshà mwa kucimanya’s. Vulukaayi ne, ndi nwwambila mu Dînà dya Mukalenge ne, ndi munwâmbile bulelela, ne cintu kampanda cidi pabwîpì ne kwenzeka.

<sup>227</sup> Ncyêna mumanye to. Mpindyewu, nwênù badi bateeleja mukaba ewu, ikalaayi bumvwe cyôci aci. Ncyêna mumanye to. Mêmè nêngiikale mwa kuteeta. Cidi cimvwile, makeelela awu, pâmvwà musòmbè mu nzubu wanyi wa mudimu aci, ncyêna ngamba ne eci mbulelela to; civwa anu ncintu kampanda cinyungakana munda mwa mwoyi wanyi, pâmvwà ngenda ngendela panshi apu.

<sup>228</sup> Mvwa—mvwa ne cya kupweka, kuyaku ndambu wa dîbà ne kupweka ne Charlie, ne kuya katwa nende buluwà dituku kampanda, kumpala kwa twêtù kutapulukungana nende.

<sup>229</sup> Itabaayi ngâmbè, ne, kî nne mbwalu nyaaya ku wesete, nanku ndi nshiya tabernacle ewu to. Ewu ng’ekeleeziya utu Mukalenge Nzambi mumpeeshe. Apa ki cyanyi ciimamwëndè wa bukalenge. Apa ki pândi musòmbèle. Nyaaya anu mu ditumikila dya diyi dituma dimpeesha ku cikeena-kumona. Mwananyi wa balume, Billy Paul, neatungunuke ne kushaala anu kaleeleki wanyi. Birô byanyi nebiikale anu apa mene ku ekeleeziya ewu. Ku dikwacisha dya Nzambi, nêngiikalè apa piikalà. . . cintu eci cijike, bwa kuyiisha pa Bitampi Mwandamutekete. Ne mikaba yònsò ya mêyi yîndì nkwata, anyi nî ncinyi cikwabo cyònsò, nebyenjiibwe anu apa mene ku ekeleeziya ewu. Nenku anu apa mene, ku dyanyi dimanya, ki mwaba wûndiku mwa kuyiisha ne budiikadidi bwònsò kutamba mwaba mukwabo kana wònsò



pa buloba bujima, bwalu kudi cisumbu cya bantu mwaba ewu badi biitabuuje, ne biikale ne nzala ne batungunuke anu kacya baakwata. Ne apa mpândi ndyumvwa bu kwetu kumbelu, bwanyi mêmè. Apa ki mwaba mene. Ne bu nwênù mwa kumona, biloota mbyambe cintu cimwecimwe aci, nwamonu's, mwaba wa Cyakudya.

<sup>230</sup> Mpindyewu, kadi, ncyêna mumanye cidì cisanganyibwa mu matuku acilwalwa to, kadi ndi mumanye Ewu udi mukwate matuku acilwalwa. Ki cintu cya mushinga ncyôci aci.

<sup>231</sup> Mpindyewu, Nzambi, piikalabi ne ndi mutupakane, wamfwilakù luse, ne pashiishe wakànga mukana mwanyi, Mukalenge, ku cyônsò cidì cifwanyine kwikala kaciyi diswa Dyebe Wêwè. Ndi ngenza cyôci eci anu bwalu ndi mu dikacila, Mukalenge. Swaku bwa bantu bûmvwè; ndi anu mu dikacila.

<sup>232</sup> Cidì cyenza bwa ngèlè meeji ne dyumvwija kî ndilwe dyakamwe, civwa nku budishikaminyi bwa Nzambi, bwalu ndi ngiitabuuja ne ncifundiibwe mu Bible emu bwanyi mêmè. Ne pashiishe piikalaci cya mu Mifundu, anu Mifundu nyidi mwa kucyumvwija. Nenku piikalabi ne eci ncyà bushuwa, mwaneetu wa balume, mwaneetu wa bakaji, ncyêna ne meeji a kukukwacisha bwôwà to, kadi mbîmpè twikale batalame bikole bwa mpindyewu. Tukaadi pabwîpî ne. . . Cintu kampanda cidì pabwîpî ne kwenzeka. Ne ndi ngamba bwalu ebu ne kaneemu ne diciina dya Nzambi. Ne nwênù nudi nwela meeji ne ndi mufwanyine kwikala mwimane mwaba ewu. . . Ne nwênù nudi mene nungiitabuuja bu muprofa; kî mmêmè udi ucyamba to.

<sup>233</sup> Disaluka divwa dingenze divwa ndyôdi edi. Matung-. . . Cidimu cishaale, mvwa mwambe ne: "Ndi. . . Cintu cimwepele cîndi mumone ncyà ne, ditabuluja dikaadi dijike, mu matunga, anyi, mu ditunga edi, nansha bishi." Ndi mwenze lwendu lwa dinyunguluka lwa butangadiki. Bààbûngî baa kunudi mbayaayaaye naanyi bakamfilemu. Kaa, bivwa anu bîmpè. Tuvwa bapicisha bikondo bya dicyonkomoka, masangisha malenga, misûmbà ya bantu bûngî cyanaana, kadi kabyena anu bikalenge kiipacila to.

<sup>234</sup> Cidimu eci, ndi ngenza lwendu lwa dinyunguluka bu missionnaire. Pândi anu mpeta mushindu, nyaaya ku Afrike, ku Inde, ne mu buloba bujima, mêmè mupete mushindu, mu lwendu lukwabo lwa dinyunguluka bu missionnaire.

<sup>235</sup> Aci kaciyi cikumbane to, pa dîbà adi ncyêna ngangata nî mmâyî nî ncyakudya to, nenku ndi mbànda pa umwe wa ku mikuna mitumbuke yidi kuntu kwaka yaya, ne nkashaalaku too ne padi Nzambi wandamuna mu mushindu kampanda. Ncyêna mwa kwikala ne mwoyi mushindu ewu nansha. Ncyêna anu mwa kutungunuka to.

<sup>236</sup> Eci ncidi mwa kwikala dyandamuna mwaba ewu. Ncyêna mumanye to. "Too ne piikalaye munshintulule," nudi bavuluke

cikeena-kumona cya kukaadi mbingu yisatu, cya “mwimane mu dîbà, nyiisha beena mu disangisha” aci anyi? Nwênù bônso nuvwa mwaba ewu mu dyalumingu dishaale. Maadyalumingu àbûngi, nwênù badi mwaba ewu bàdì bàpetà mikaba ya mēyì aba, ne—ne bàdì apa padiyi yikwaciibwa abu, nudi nuumvwa maalu aa. Bwalu, mpindyewu nêndengè anu myaba eyi, nenku nucitangilaayi. Nansha kantu ne kantu kônso kaa ku bidi byambiibwe abi, kadi kabwela mu cyôci eci bu cifwanyikijilu, pa nanku ki cidi ne cya kwikala dyumvwija. Ncyêna mumanye to. Ki bwa cinyi ndi ngamba ne: “Bakalenge, ki cyôci eci anyi?”

<sup>237</sup> Ndi ngiitabuja ne “mwanjelo wa mwandamutekete” wa mu Bwakabuulwibwa 10 awu nyêyè musanjeela wa cikondo cya mwandamutekete cya ekeleeziya wa mu Bwakabuulwibwa 3.14 awu. Nwavulukaayi. Mpindyewu lekelaayi mbale. Tangilaayi mwaba wûndi mwa kubala. Mpindyewu, ewu uvwa mmwanjelo wa mwandamutekete.

*Kadi mu matuku a diyì dya mwanjelo wa mwandamutekete, (mvensa wa 7) paabangaye kwela mpungi, bwalu busokoka bwa Nzambi budi ne cya kujika, bu mudiye mwambile basadidi bende bapofeta.*

<sup>238</sup> Mpindyewu, numonaayi ne, ewu uvwa mmwanjelo. Ne yêyè ki mwanjelo mutumina cikondo cya mwandamutekete cya ekeleeziya awu, bwalu mbambe apa ne, udi “mmwanjelo wa mwandamutekete,” wa cikondo cya mwandamutekete cya ekeleeziya. Jandulaayi cyôci aci, panwikala baswe kumona ne nganyi. . . ne mwanjelo awu udi penyi, Bwakabuulwibwa 3.14, cidi ne: “Mwanjelo mutumina ekeleeziya wa Laodikiya.”

<sup>239</sup> Mpindyewu, nudi bavuluke pavwabi byambiibwe mwaba awu, banjelo ne bikondo bya ekeleeziya. Nenku mpindyewu, mu cyôci eci, necinwangane ne Bitampi Mwandamutekete bitwalwa kwakulapu ebi. Ne Bitampi Mwandamutekete bitwateeta bwa kwakulapu abi, paalwabi ewu musangu, m’Bitampi mwandamutekete bifunda. Nenku Bitampi Mwandamutekete ebi, bu munudi bamanye, bidi anu dimweneshiibwa dya banjelo mwandamutekete baa ekeleeziya mwandamutekete; kadi, kudi Bitampi mwandamutekete bikwabo bidi paanyima paa Mukanda, Bidi pambelu paa Bible. Monaayi. Netufikeku mu katanci aka.

<sup>240</sup> Mpindyewu, kumpala kwa mêmè kubanga eci, nukaadi bacyo ke anyi? Nudikù baswe bwa kujuukila kuulu, bwa kushintululaku mushindu wa diikala anyi? [Disangisha didi dyamba ne: “To.”—Muf.] Teelejaayaaku ne ntema mpindyewu.

<sup>241</sup> Mwanjelo wa mwandamutekete wa Bwakabuulwibwa 10.7 nyêyè awu musanjeela wa cikondo cya mwandamutekete cya ekeleeziya. Nwamonu anyi? Tangilaayi mpindyewu. “Nenku mu matuku. . .” Mpindyewu tangilaayi mwaba ewu:

*Kadi mu matuku a dîyi dya mwanjelo wa mwandamutekete, paabangaye kwela mpungi, bwalu busokoka bwa Nzambi budi ne cya kujika, . . .*

<sup>242</sup> Mpindyewu, kwela kwa mpungi, musanjeela ewu, mwanjelo wa mwandamutekete ewu ngudi wela mpungi wa Mukenji wende kudi ekeleeziya wa Laodikiya. Monaayi mushindu wa wende Mukenji. Mpindyewu, kacivwa bwa mwanjelo wa kumpala to, kî nyêyè wâkapèeshiibwa Aci nansha; mwanjelo mwibîdi, mwisâtù, mwinâyi, mwitânù, mwisambombo. Kadi mwanjelo wa mwandamutekete nguwwa ne Mukenji wa mushindu ewu. Civwa ncinyi? Tangilaayi numone mushindu wa wendè Mukenji: “Kujikija maalu masokoka ônsò a Nzambi, adi mafundiibwe mu Mukanda awu.” Mwanjelo wa mwandamutekete ngudi utwa cishindaayi ku maalu masokoka ônsò adi mashaadile mu njila, ônsò a mu malongolodi ne mangumba aa. Mwanjelo wa mwandamutekete yêyè ngudi uakûngwija, ne ujikija bwalu busokoka bwônsò nkòong. Ke cidi Bible mwambe ne: “Ûjikija bwalu busokoka bwa Mukanda mufunda.”

<sup>243</sup> Mpindeywu tufundaayi ndambu wa maalu masokoka aa, panwikala baswe kuafûnda. Dyâmbedimbèdi, nêngàngatè cidi Scofield wamba mwaba ewu, mu Maataayi 13 emu eci. Pawikala muswe kufunda amwe a ku ôwò, pawikala kuyi ne Bible wa Scofield to, udi mufwanyine kubala cidiye wela yêyè meeji ne ki cidi maalu masokoka awu aci. Mpindyewu, mu mvensa wa 11:

*Nenku yêyè wakandamuna ne wakabambila ne: Bwalu nwênù ki badi bapeeshiibwe (bayiidi Bende), bwalu nwênù ki badi bapeeshiibwe bwa kumanya maalu masokoka a bukalenge bwa mu dyulu, kadi kî mbòbò nansha, kadi kî mbapeeshiibwe bòbò nansha.*

<sup>244</sup> Maalu masokoka, “bwalu busokoka” mbwòbò ebu. Bwalu busokoka m’Mufundu, m’Bulelela budyanjila kusokoka bwikale mpindyewu bubuulula kudi Nzambi, kadi (bwikale) kaacintu katambe-mfukilu kacikàle anu kashaale nansha dibuulula diikaleku. Maalu masokoka adi matambe bunene ne maalu masokoka manene ngòwò aa:

<sup>245</sup> Nomba wa kumpala, bwalu busokoka bwa Bukalenge bwa mu Dyulu. Ki bwine butudi twakulapu mpindyewu ebu. 13, Maataayi 13.3 too ne ku 50.

<sup>246</sup> Mpindyewu, bwalu busokoka bwibîdi mbwalu busokoka bwa difofomijiibwa dya Izaleela munda mwa cikondo eci. Loomo 11.25, ne bìdi bìmushîndikijà.

<sup>247</sup> Bwisâtù, bwalu busokoka bwisâtù mbwalu busokoka bwa ditentemunyiibwa dya bansantu badi ne mwoyi ku nshiikidilu wa cikondo eci. Kolinto wa Kumpala 15, kabidi ne Tesalonika 4.14 too ne ku 17.

<sup>248</sup> Bwinâyi, bwalu busokoka bwa Ekeleeziya wa Dipungila Dipyadipya bu Mubidi umwepele mwenza ne bônsò babidi aba,

beena Yuda ne baa Bisamba dya bende. Efeso 3.1 too ne ku 11, Loomo 16.25, kabidi ne Efeso 6.19, Kolosaayi 4.3.

249 Bwalu busokoka bwitânù mbwa Ekeleeziya bu Mukajimusela wa Kilisto. Efeso 5.28 too ne ku 32.

250 Bwalu busokoka bwisambombo mbwa Kilisto mwikale ne mwoyi, umwèumwè awu makeelela, leelu, too ne kashidi. Galatiya 2.20, ne Ebelu 13.8, ne myaba yàbûngì ya nanku awu.

251 Bwalu busokoka bwa mwandamutekete mbwa Nzambi, Kilisto mene bu kaabujima kaa Bunzambi bwandamuke mubidi bubwele mu mubidi, mu Yèyè mwikale lungenyi lwònsò lwa Nzambi. . .

. . . ne difwana dya Nzambi ndyalujulwila muntu.

252 Bwalu busokoka bwa citeema mbwalu busokoka bwa bubu, busanganyiibwa mu Tesalonika Mwibîdì, ne bikwabo.

253 Bwalu busokoka bwa dikumi mbwa mitooto mwandamutekete ya mu Bwakabuulwibwa 1.20. Twafumu ku dilonga cyôci aci ne: “Mitooto mwandamutekete ya ekeleeziya mwandamutekete, baamisanjeela mwandamutekete,” ne bikwabo.

254 Ne bwalu busokoka bwa dikumi ne bumwe m’Baabulona bwalu busokoka, mukaji wa masandi awu. Bwakabuulwibwa 17.5 too ne ku 7.

255 Awu ki amwe a ku maalu masokoka kudi mwanjelo ewu ne cya kutwa cîshîndaayi, “bwalu busokoka” bwònsò, maalu masokoka ônsò a Nzambi.

Ne makwabo:

256 Swayi ngâmbèku eci ne kaneemu, kadi nciyi ngamba bwanyi mêmè mwine to, kadi ngamba bwa Mwanjelo wa Nzambi.

257 Dimiinu dya nyoka, òwà diikale bwalu busokoka bùwà busokoka adi, munda mwa bidimu byònsò ebi.

258 Ngâsà, moololola; kacyi dibùlà dya ngâsà to, kadi ngâsà wa cya bushuwa, mulelela.

259 Kakuyi cintu paaci ne ny’iferno wa Cyendelele, wa uteema kapyà to. Newoshike munda mwa millyô ya bidimu. Kadi, cyònsò civwa cya Cyendelele, kacivwaku ne ntwadijilu anyi ne ndekeelu nansha; kadi iferno yèyè wakafukiibwa.

Maalu masokoka ônsò aa!

260 Bwalu busokoka bwa dibatiiza dya Nyuma Mwîmpè, kayi ne disaluka to, kadi Mupersona wa Kilisto mwikale wenza munda mwebe byenzedi bimwebimwe byakenzaYe abi.

261 Bwalu busokoka bwa dibatiiza dya mu mâyi. Mwaba awu, dilongesha dya busatu dya dyèla ne nsèkà ndikabubweje mu myânzù ya “Taatu, Mwânà, Nyuma Mwîmpè.” Kadi bwalu busokoka bwa Bunzambi bwikale bùle mu dibatiiza dya mu Dîna

dya “Yesu Kilisto,” bilondeshile Mukanda wa Bwakabuulwibwa, divwà dikèngelà bwa Ekeleeziya mu cikondo eci kwakidilaye.

Ki amwe a ku maalu masokoka ngôwò awu.

<sup>262</sup> Dikunji dya Kapyà diikàle dyàlukila. Amen! Ki cintu cidì ne cya kwenzeka ncyòci, ne twètù nyewu tucimona.

Kaa, mushindu mwine utudi bafwanyine kutungunuka, twenda tuteela maalu masokoka’s we!

<sup>263</sup> Tumona Dikunji dya Kapyà dyàkalombolà bânà baa Izaleela, Dyôdi dimwedimwe dyàkashindishà Pòlò panshi mu njila wa ku Damaseke adi! Ne Dyôdi dimwedimwe adi diikàle dilwa, ne Bukole bumwebumwe abu, dyenza bintu bimwebimwe abi, ne dibuulula Dîyi dimwedimwe adi, dishaala ne Bible ku Mwaku ne ku Mwaku!

<sup>264</sup> Dyela dya mpungi, mbwena kwamba ne mpungi wa “Evanjeeliyo.” Ne dyela dya mpungi kampanda, mu Bible, mbwena kwamba ne: “Dilongololaayi ku mvita ya Mifundu.” Nudi munkaci mwa kucifunda anyi? Mvita ya Mifundu!

<sup>265</sup> Pòlò mmwambe, panwikala baswe kufunda eci, Kolinto wa Kumpala 14.8. Pòlò mmwambe ne: “Piikala mpungi upatula mwadi mulubidile, muntu neamanye mwa kudilongolola ku cinyi?” Ne yèyè kayi upatula mwadi wa mu Mifundu, mushindika, di—di—dishindikiibwa dya Dîyi dya Nzambi dimweneshiibwe, netumanye munyi ne tukaadi ku cikondo cya nshiikidilu?

<sup>266</sup> Piikalaye wamba ne badi biitabuuja ne Yesu Kilisto udi umwèumwè awu makeelela, leelu, too ne kashidi, kadi bavila bimanyinu ne maalu a kukema bivwa cipaapu cijima cya mu bufuki ciMwitabuujile ku byôbì ebi, ne Ekeleeziya mujima muMwitabuujile ku byôbì ebi, mmunyi mutwamanya mwa kudilongolola?

<sup>267</sup> Muntu kampanda mmulwe ne mboodi kadi kucizola cyònsò; ki muntu kampanda kupatuka, ne cikwabo cintu, ne kuzolaye cyònsò eci, cibengangana ne eci. Kampanda upatuka kadi kwamba ne eci ki Cyòci, walukila ku eci. Ne bakwabo bafunde mikanda, ne bintu bya mushindu awu.

<sup>268</sup> Kadi, Nzambi udi ulwa mu Bukole bwa dibiika Dyende dya ku lufu! Kadi wâkula pende ubengangana ne Cyòci aci ki nganyi? Piikalabi ne Yesu Kilisto udi umwèumwè awu makeelela, leelu, too ne kashidi, Yèyè’s udi wenza cimwecimwe cyakenzaYe makeelela, leelu, too ne kashidi. Ki cyòci aci cidì mwanjelo ewu ne cya kwenza, kwangata maalu masokoka awu, maalu adi mashaadile mu njila padi bantu balalukile apu.

<sup>269</sup> Monaayi, piikalaye upatula mwadi mulubidile, kawuyi wa mu Mifundu to, udi mwa kudilongolola ki nganyi? Kadi, mpungi, ne nukaavwa bamone, cyònsò cya ku bikondo abi, mushindu wûmvwà munwâmbile bwa ekeleeziya uvwa ubwela awu, kuvwa

mpungi wediibwa, Citampi cikangudiibwa. Ne mpungi mbwena kwamba ne mvita. Piikalaye kayi upatula mwadi wa mu Mifundu to, citwamba ncinyi pa mpungi awu?

Kadi lekelaayi nuvulwije bwalu ebu. Mpindyewu eci kacinupiciku to.

<sup>270</sup> Monaayi, cikondo ne cikondo cyônsò cya ekeleeziya civwa ne musanjeela waci. Tudi bamanye aci. Pôlò nguvwa musanjeela wa kumpala. Nenu paakadila mpungi wa kumpala, ne paakakangudiibwa Citampi cya kumpala, Pôlò nguvwa musanjeela wa kumpala, bu mutwasanganyi, kadi cyakenzaye ncinyi? Wakakutula mvita ne (cinyi?) ekeleeziya wa Orthodexe, bwa dibenga kwitabuujwa cimanyinu cya Maasiya civwa Yesu mubaleeje. Mona's, s'bivwa bikengela kwikalabo bacimanye. Bivwa bikengela kwikalabo baMumanye.

<sup>271</sup> Vulukaayi ne, Pôlò wakalwa kundekeelu kwa cikondo. Baamisanjeela bônsò bavwa balwa kundekeelu kwa cikondo. Ku cikondo cya nshiikidilu, nkudi bintu ebi bi—bitwadiibwa.

<sup>272</sup> Pôlò, mwikale mumanye Mifundu, ne mumanye ne Yesu nguvwa Maasiya, ki yêyê kutonokela nsunàngòngà ayi, ku mwaba ne ku mwaba, ne Mifundu, kadi wakiipaciibwa mu yônsò wa ku yôyi. Mu mushindu wa ne, ndekeelu wa byônsò, kutuutulaye lupwishi lwa mwinshi mwa makàsà ende ne kukudimukilaye kudi baa Bisamba bya bende. Civwa ncinyi aci? Mwadi wa mpungi; mwanjelo kampanda, musanjeela, mwimane mwaba awu ne Dîyi! Kaa, ekelekele! Mpindyewu aci kacinupiciku to. Dîyi! Nenu Pôlò, mwikale ne dyumvwija dya Dîyi dya Nzambi divwa kadiyi disambakaja, wakatonokela umwe ne umwe wa ku nsunàngòngà ayi. Cyakamukebela lufu.

<sup>273</sup> Mushindu mwine utudi bafwanyine kupweka too ne ku Irénée, yêyê awu, musanjeela wa cikondo cya ekeleeziya cyàkalondà!

<sup>274</sup> Nenu Martin Munsantu, cikondo cya ekeleeziya cyàkalondà aci, paakabangabo kwangata dilongesha dya beena Nikalawu, paakabangabo kubwelamu. Nenu baakatonokela cikondo aci. Martin Munsantu ngwâkatonokela cikondo cyende aci.

<sup>275</sup> Nenu pashiishe Luther, musanjeela mwiitânù, yêyê ngwâkatonokela ekeleeziya wa Katolike awu, ne Dîyi dya Nzambi. “Mwakane neikale ne mwoyi ku diitabuujwa,” mwakambaye. “Ne eci kî mmubidi mwena diinà wà Kilisto to,” ki kwimanshaye kaakoomunyo aku panshi, ne wakapatuka ne kutonokela ekeleeziya wa Katolike awu. Mpungi awu wakadila anu mu byôbi. Ncya bushuwa anyi?

<sup>276</sup> John Wesley kujuukaye, mu matuku a ekeleeziya wa ba-Anglicans. “Mona's,” mukaavwabo bamba, “kakucyena kabidi kabingila kaa kwenza matabuluja to,” nenu aci ki kupangilaci bukole. Kadi John Wesley wakajuuka, ne mukenji wa mudimu mwibidi wa ngàsà, dijidiibwa, ki kutonokelaye ekeleeziya wa

ba-Anglicans awu ne mpungi wa Evanjeeliyo, mudilongolole ku mvita. Ncya bushuwa. Yèyè ngwâkacyenza.

<sup>277</sup> Mpindyewu tudi mu cikondo cya Laodikiya, mukaadibo badyènzè cyakabidi mangumba; ba-Méthodistes, ba-Baptistes, ba-Presbytériens, ba-Luthériens, beena Mpenta. Kadi tudi bindile bwa muprofeta kulwaye, bwa kutonokelaye cikondo eci, bwa kubakudimuna ne kubuumusha ku bubi bwabo.

<sup>278</sup> Mpindyewu, piikalabi ne ki muvwabi byendè nanku, mu cikondo cyònsò cijima, Nzambi neashintulule lwendu Lwende mu dituku edi anyi? [Disangisha didi dyamba ne: “To.”—Muf.] Kêna mwa kumushintululaku to. Bikengela alame anu mushindu wa ciibidilu wa kwenda awu.

<sup>279</sup> Nenku vulukaayi ne, musanjeela ewu nguvwa mwanjelo wa mwandamutekete, ne buvwaye naabu mbwa kwangata maalu masokoka ônsò ne kuâkungwija. Monaayi ne, bivwa bikengela bwa mwanjelo wa mwandamutekete awu atonokele ekeleziya wa Laodikiya, mubanji awu. “Ndi mubanji, mudivudijile bintu, ne ncyêna dijinga ne cintu nansha cimwe to.” Yèyè kwamba ne: “Ûdi mukengeledi wa luse mwena dikenga, mupele, mpofo, mwikale butaka, kadi kuyi mucimanye to.” Mukenji wende uvwa ngwôwò awu.

<sup>280</sup> Éyì Nzambi wa yaaya, tûtùmìnèku muprofeta wa kayi ne bwôwà mwikale ne EMU MMUDI MUKALENGE WAMBA's, bwa Dîyì dya Nzambi dishindika dyamona mwa kupicilamu ne kujaadika ne yèyè mmutumiibwe kudi Nzambi. Ne paalwaye, neatonokele bikondo abi. Ki cyenzaye bushuwa. Yèyè neènzè ne ekeleziya wa Laodikiya awu amulwisha. Ncya bushuwa ne, ki cyenzaye. Batu bacyènzènze mu cikondo ne cikondo cikwabo cyònsò. Aci kacyakushintuluka mu eci cikondo nansha. Bikengela ciikale anu cyôci cimwecimwe aci.

<sup>281</sup> Monaayi, mpindyewu, ekeleziya wa Laodikiya. Musanjeela (neajikije) wa Laodikiya awu, mwanjelo wa mwandamutekete awu, ki wâjikija maalu masokoka ônsò àvwà majimija mu mvita, kumpala, milwila Bulelela.

<sup>282</sup> Luther wakajuuka, kadi kavwa ne Bulelela bwònsò to. Ûvwa yèyè anu ne dibingishiibwa nkaayaadi. Cya bushuwa.

<sup>283</sup> Pashiishe kulwaku musanjeela mukwabo, dînà dyende John Wesley, mwikale ne dijidiibwa. Kavwa naaBu bwònsò to. Ki cidi Bible mwambe. Ekeleziya wa Filadelefiya.

<sup>284</sup> Pashiishe kulwaku cikondo cya ekeleziya wa Laodikiya, ciikale ne dibatiiza dya Nyuma. Kadi bôbô kuMubwejakaja yònsò, ne kwalukilabo buludi mu mmwenekelu wa kwîsûkwîsû anu mwakenzabo ku cibangidilu.

<sup>285</sup> Padibi ne: “Bikengela Yèyè abadiibwe bu Alpha ne Omega,” cyanza Cyende ciikàle citèèka mu mushindu *kampanda*, ne mu mushindu *kansanga* ne: “Wa kumpala ne Wa ndekeelu.”

Nyuma Wende wakapona mu Dituku dya Mpenta ne wakuuja kasumbu aku.

<sup>286</sup> Wākaya wenda ushaala munda mutupu ku ndambu ku ndambu, too ne mwakafikabi ku bikondo bya mîdimà. Citeekelu cya Myëndù Mwandamutekete cya Ngòlò, bikondo mwandamutekete bya ekeleeziya, cya ndekeelu ncivwa citambe kwikala kule menemene Nende. Civwa ncinun- . . . bidimu bitwe ku cinunu bya cikondo cya mîdimà, bya ekeleeziya wa Katolike.

<sup>287</sup> Luther ngwâkabanga kutwala bukênkè buvwa bùlondà, buseemenenganekumu ndambu ne Dîyi.

Bukênkè bwâkalondà, kulwabu buseemenenganekumu ndambu.

<sup>288</sup> Bukênkè bwâkalondà, bwa Laodikiya. Pashiishe kwalukilabi muvwabi, ku cibangidilu, kuyabi kule ne kubwelabi mu cibwejakaji cimwecimwe civwabi ku cibangidilu aci. Kanwenaayiku numona cîndi muswe kwamba aci anyi?

<sup>289</sup> Mpindyewu tangilaayi. Kudi Bulelela bûngì cyanaana budi bujimine mwaba awu, (bwa cinyi?) mwaba uvwa bakwabo badye cibanga pa Bulelela awu. Kadi mwanjelo wa mwandamutekete ewu kèna yêyè uduya cibanga pa cintu nansha cimwe to. Yêyè udi ukungwija maalù ônsò adi mashaadile mu njila awu, ûakûngwija ônsò. Nenku ku dyela dya wende mpungi: “Bwalu busokoka bwônsò bwa Nzambi budi ne cya kujika.” Kaa! Nzambi, mutumeku’s. Maalu masokoka ônsò àvwà masokoka awu akajika pavwaye, yêyè, pààkabuuludiibwaCi kùdiye. Kùdi cinyi? Piikalabi ne maalù masokoka miine aa avwa masokoka, ne bikengela bwa muntu awu ikale muprofeta. Ne twètù biine katwenaku bafume ku dilonga ne ku dimona ne muprofeta mwine awu, mwine uvwa mwa kulwa mu cikondo cya ndekeelu awu, uvwa ne cya kwikala Eliya munene utudi munkaci mwa kwindila awu anyi? Bwalu, maalù masokoka adi masokoka aa, adi masokoka beena teoloji aa, neikale ne cya kubuuludiibwa; kudi Nzambi. Ne Dîyi ditu dilwa anu kudi muprofeta nkaayende. Ne twètù tudi bacimanye. Yêyè neikale Eliya mwibîdi, bu mwakalayiibwabi. Kaa, ekelekele! Mukenji watwalaye yêyè—yêyè newikale malu masokoka, ônsò, bintu byônsò ebi.

<sup>290</sup> Tudi ne dibatiiza dya mu mâyi. Bakaadi badibwejakaje dyônsò. Neya bushuwa. Ewu umyaminangana mâyi; ewu pende upongolwelanawu. Ewu wangata “Taatu, Mwânà, Nyuma Mwîmpè.” Ewu wangata *cikampanda*. Ewu ubatiiza misangu yisatu, cyâdi panshi; bwalu, umwe bwa Nzambi kampanda mwinyika ne “Taatu,” mukwabo bwa Nzambi kampanda mwinyika ne “Mwânà,” mukwabo bwa Nzambi kampanda mwinyika ne “Nyuma Mwîmpè.” Mukwabo yêyè mmwambe ne: “Udi mupiile. Bikengela abatiize cyâdi muulu, misangu yisatu, mushindu *ewu*.” Nenku, kaa, cibwejakaji kaayipu’s we!



<sup>291</sup> Kadi cintu cyònsò mu kaabujima cikaadi cimana kutwa cishindaayi, bwalu kudi Nzambi anu umwepele, ne Dinà Dyende n'Yesu Kilisto. “Ne kakwena dîngà dînà mwinshi mwa Dyulu mudi bantu ne cya kusungidiibwabo to.” Kakwenaku kaaba kafunda nansha kamwe mu Mifundu, kaaba nansha kamwe mu Bible, kadi muntu nansha umwe ukaadiku mubatijiibwe mushindu mukwabo pa kuumusha mu Dinà dya Yesu Kilisto to. Musangu nansha umwe muntu wa mu Ekeleeziya mupyamupya, anyi wa mu Ekeleeziya wa Yesu Kilisto, kacya katuku mumyaminangane mâyi, mupongolwelangane mâyi, anyi mwenze nî ncinyi cikwabo to. Kacyapu musangu nansha umwe kakutuku kwanji kwenjiibwa mushîngà paawu ne: “Ndi nkubatiiza mu dînà dya Taatù, Mwânà, Nyuma Mwîmpè” to. Ayi ntwitabaayi ne bikwabo.

<sup>292</sup> Ne mu mvita ya dilwila Bulelela, bitù bishaadileshaadile mu njila abi byakajimina, kadi Nzambi wakamba ne nebyalujuludiibwe mu dituku dya ndekeelu. “Nêngààlujululè,” mudi Mukalenge wamba. Tudi balonge aci, abidi adi panshi aa, *Muci Mukàji-Musèla*. Nebikengele muprofa. Bible udi wamba ne yèyè awu neikaleku. Neya bushuwa. Maalaki 4, ngudi wamba ne yèyè awu neikaleku, ne twètù tudi twitabuuja ne neikaleku. Tudi bamwindile. Ne tudi bindile dimweneshiibwa dyende, ne netumone Dîyi dya Nzambi dishindika.

<sup>293</sup> Nekwikale anu bakese menemene bààCyūmwà. “Anu mwakadibi mu matuku a Noa, ki mwikalabi kabidi ku dilwa dya Mwânà wa muntu.” Cyàkasungidiibwà ncinyi? Misuuka yitaanu. . .Mu matuku a Lota, kuvwa bulelela anu basatu mbààkasungidiibwà. Mukaji wakaasa lwendu e kupatuka, kadi wakajimina. “Ki mwikalabi kabidi ku dilwa dya Mwânà wa muntu.” Nekwikale anu bakese menemene bààsungidiibwà, bààtentemunyiibwà mu ciine cikondo aci; bumwe bwa ku maalu masokoka awu, bwa Ekeleeziya awu wîkala mwa kwangaciibwa muulu. Anu mwakangaciibwa Lota, anu mwakapatudiibwa Lota, muumushiibwe; Noa wakangaciibwa muulu; ne Ekeleeziya neangaciibwe muulu, yèyè pende. Umwe wakabwela; ne umwe wakapatuka; kadi mukwabo Yèyè udi ùbànda muulu. Nwamonu anyi? Bidi anu menemene, bipwangane.

<sup>294</sup> Dîyi didi dilwa. “Mukanda ùdì mufunda munda,” udi pa dîbà adi ujikijiibwa piikala cyôci eci, maalu masokoka ônsò aa mamane kujika bu mwadi wa mpungi. Mpindyewu lekelaayi ngânji kucibalulula, mpindyewu, bwa nwikale batwishiibwe. Mpindyewu tangilaayi:

*Kadi mu matuku a dîyi dya mwanjelo wa mwandamutekete (mwanjelo wa ndekeelu awu), paabangaye kwela mpungi, bwalu busokoka bwa Nzambi budi ne cya kujika, . . .*

<sup>295</sup> Mpindyewu, “bwalu busokoka bwa Nzambi” ncinyi, bumwe bwa ku ôwò awu? Pòlò mmwambe, mu Timote wa Kumpala 3, ngeela meeji ne muvwa mmwômò amu, mmwambe ne: “Kakuyi dikokangana to bwalu busokoka bwa difwana dya Nzambi mbunene: bwalu Nzambi wakamweneshiibwa mu mubidi (twètù kuMulenga, kuMumona), wakangaciibwa muulu mu Butumbi, mufidila bujaadiki kudi Banjelo, mushindikiibwe panu pa buloba.” Nzambi’s! Bushuwa, mbwalu busokoka bunene, kadi bukaadi bwònsò bumana kufidila dyandamuna. Kaciyi “Taatu, Mwànà, ne Nyuma Mwîmpè,” Nzambi yisatu to; kadi, Nzambi umwepele mu midimu yisatu. BuuTaatu, mu cikondo cya Mòsà; buuMwànà, mu cikondo cya Kilisto; Nyuma Mwîmpè, mu cipungu eci. Bipungu bisatu bya Nzambi umwèumwè awu; kaciyi Nzambi yisatu to. Bwalu busokoka bwamanyi kujika mpindyewu. Bible ngudi mwambe ne buvwa ne cya kujika. Piikala . . .

<sup>296</sup> Mvwa mumone, dituku adi, mwaba udi maalu a mamanya ateeta bwa kwamba maalu abengangana naanyi, mu civwabo ne ciibidilu cya kwamba, pângàakambà ne: “Muntu yònsò uvwa witabuuja ne Eva wakadya cimuma cya pomme awu!” Patudi twakulangana apa’s maalu abo miine a mamanya awu akaadi amba, nuvwa bamone mu cibejibeji dituku adi, cyena-bwalu cinene ne: “Wakadyà cimuma cya abricot.” Lukutukutu naanyi we. Aci ncifwanyine—aci ncifwanyine kwambisha mukaji anyi? [Disangisha didi dyamba ne: “To.”—Muf.] Ncya bushuwa ne kî mmwômò to. Nwamonu anyi? Badi anu . . . Aci’s—aci’s ncyàkadyambidilà Kaayina, nudi bamanye’s, ki kwalujaye cintu cimwecimwe aci, kadi Nzambi kaakaanyishaku mulambu wende awu to. Kadi Abele, mwakane awu, cyakabuuludiibwa kudiye ne: “Civwa mmashi,” ki kutwalaye mashi.

Éyi Nzambi wa yaaya, ekeleeziya ewu ne cikondo citudi ne mwoyi’s!

<sup>297</sup> “Mukanda ùdì mufunda munda” udi dîbà adi mujikijiibwe padi mwanjelo ewu ulekela, (mpindyewu swayi nûmvwèku bwalu ebu), padi Mukenji wa mwanjelo wa mwandamutekete ujikijiibwa; bwalu busokoka bwa Bunzambi, bwalu busokoka bwa dimiinu dya nyoka, maalu masokoka makwabo ônsò aa a bintu byònsò ebi.

<sup>298</sup> BuuMwànà bwa Cyendeleele, mudibo bamba amu. Mmunyi mudiYe mwa kwikala Mwànà wa Cyendeleele, padibi ne kacya Cyendeleele kacituku cibange ne kaciyiku cijika; padibi ne mwànà utu ncintu kampanda cilela? Bidi mwa kwikala bya meeji mushindu kaayi?

<sup>299</sup> Mmunyi mudiku mwa kwikala iferno wa Cyendeleele, padibi ne iferno utu mufukiibwe? Mèmè ntu ngiitabuuja iferno wa uteema mudilu. Ncya bushuwa ne, Bible utu mwambe nanku. Kadi, s’mbwa kubutula. Bible mmwambe ne: “Wa disanka

ng'ewu wíkala kayi mwa kupicila ku lufu lwibìdì.” Nwamonu anyi? Nwamonu's, kwakubutudiibwa ku lufu lwibìdì to. Lwa kumpala ndwa mubidi. Lwibìdì ndufu lwa nyuma, paajika maalu ònsò. “Musuuka ùdì wènza mpekaatu, musuuka awu ki wafwa.” Neunyookiibwe bwa mpekaatu yebe, pàmwápa munda mwa nkama ya bidimu, binunu bya bidimu. Kadi kakwena mwa kwikala iferno wa Cyendeleele to, bwalu Bible mmwambe ne iferno wakafukiibwa. Mmunyi mudiye mwa kwikala mufukiibwe kadi kwikala wa Cyendeleele? Bu ne kuvwaku. . . Bible mmwambe ne: “Iferno wakafukiibwa mbwa dyabulu ne banjelo bende.” Nenku ewu, piikalaye mufukiibwe, kèna mwa kwikala wa Cyendeleele to. Bwalu, wa Cyendeleele, cintu kampanda cya Cyendeleele, kacituku ne ntwadijilu anyi ne ndekeelu to.

<sup>300</sup> Mushindu awu ki udibi ne twètù katwena mwa kufwaku to, bwalu tuvwa anuku. Tudi citupa cya Nzambi, mutoloku wa Nzambi, ne Yèyè ki cintu cimwepele cidìku cya Cyendeleele. Amen. Wèwè kwènàku mwa kufwa to anu mudi Nzambi kayi mwa kufwa, bwalu wèwè udi wa Cyendeleele, pamwe Nende. Amen! Lufu lwine lùlwe! Aleluuyah! Nzubu wa kale wa beena cikupi ewu's ukaadi anu bu mubange kutondangana, twamb'eku twamb'eku.

<sup>301</sup> Monaayi: “Mukanda mufunda,” padi mwanjelo ewu ujikija midimu yònsò ya bwambi ya maalu adi mashaadile mu njila mu mvita yivwabo balwangane, yivwa Luther mulwangane, ne yivwa Wesley mulwangane, ne yivwa beena Mpenta balwangane ayi. “Kadi kulwalwa kampanda,” mudi Bible wamba, “mu matuku a dyela dya wende mpungi, maalu masokoka ònsò aa. . .” Bu-unitaire mbunyeemene ku Dìnà dya Yesu; bu-trinitaire mbunyeemene ku Taatù, Mwànà, Nyuma Mwimpè, anu mwakenzabo ku Nsangilu wa Nicée, cintu cimwecimwe aci; bubidi bwabo bavwa mu ntipakanyi. Kadi, mpindyewu, munkacinkaci mwa njila awu, mu Mifundu, mmudi Bulelela busanganyiibwa. Nudi numona patukaadi anyi? Mwanjelo wa Mukalenge!

<sup>302</sup> Monaayi Bwakabuulwibwa 5.1. Teelajaayaaku eci mpindyewu:

*Ne nâkamòna mu cyanza cya dyabalume cya ewu uvwa musòmbè pa nkwasà wa butumbi mukanda mufunda munda (mifundu yivwa munda) ne paanyima, mutwa bitampi mwandamutekete.*

<sup>303</sup> Mpindyewu, kudi mifundu munda mwa Mukanda awu. Kadi, paanyima pavwa Bitampi Mwandamutekete, paanyima paaWu, yivwa kayiyi mifunda mu Mukanda awu to. Mpindyewu, mubuuludi nyèyè udi wakula ewu, Yone. Mpindyewu, vulukaayi ne, kaCivwa cifunda mu Mukanda awu to. “Kadi mu matuku a diyi dya mwanjelo wa mwandamutekete, bwalu busokoka

bwônsò bùdì bufùnda munda ebu budi ne cya kujika.” Bivwa bikengela babutangile, mu diine dituku adi. Mpindyewu nudi numona cîndi muswe kwamba aci anyi? [Disangisha didi dyamba ne: “Amen.”—Muf.] Nudi nundonda anyi? [“Amen.”] Pa dîbà adi ki cikondo ncyôci aci bwa mêyi mwandamutekete a Bwakabuulwibwa 10 kubuuludiibwawu. Padi Mukanda ujika, nkushaale cintu anu cimwepele, mmêyi mwandamutekete a mikungulu adi kaayi umvwika avwa mafunda paanyima paa Mukanda, avwabo bakandike Yone bwa kufunda awu. Ngânji ncibalebi.

*Nenku mêmè kumona mwanjelo kampanda, mwanjelo wa bukole utuuluka ufumina mu dyulu, muvwadika ditutu: ne mwanzankongolo uvwa kumutu kwende, ne mpala wende uvwa bu...dîbà, ne makàsà ende mafwanangane ne makunji a kapyà:*

*Ne mu cyanza cyende uvwa ne mukanda mukese mubuulula:... (Nwamonu’s, mpindyewu tangilaayi eci.)...ne wakateeka dikàsà dyende dya dyabalume pa mbû,...dyende dya dyabakaji...pa buloba bûme,*

*Ne wakeela lubila lwa dîyi dikole, byenze bu mudi ntambwe ukungula: ne paakamanaye...kwela lubila, mikungulu mwandamutekete yakapatula mêyi ayi. (Tangilaayi.)*

*Ne paakamana mikungulu mwandamutekete kupatula mêyi ayi, nkaavwa ne mfunde:... .*

304 Kwakambiibwa cintu kampanda. Kacivwa anu mutooyi cyanaana to. Cintu kampanda cyakambiibwa. Yêyê ukaavwa ne afunde.

*...ki mêmè kuumvwa dîyi difumina mu dyulu dingambila ne:... .*

305 Tangilaayi numone kuvwa mêyi awu aku, Mikungulu ayi. Kî mmu Dyulu to; pa buloba! Mikungulu ayi kayaakadila bifumina mu maulu to. Yakadila bifumina pa buloba.

*...nenku nkaavwa ne mfunde: pa dîbà adi mêmè kuumvwa dîyi difumina mu dyulu dingambila ne: Twa Citampi (dileeta dinene C-i-t-a-m-p-i), Twa Citampi ku maalu adi mikungulu mwandamutekete mipatule awu, ne kuâfundu to.*

306 Adi paanyima, pakaadi Mukanda mumane kujikijiibwa. Yêyê kaakamba ne: “Lwà kumpala” to. Wākamba ne: “Luà paanyima,” paanyima paa Wôwô wônsò mumane kwenjiibwa, kujikijiibwa. Pa dîbà adi, mêyi a Mikungulu Mwandamutekete aa ki cintu cimwepele, cidi cilamate ku Mukanda awu, adi kaayi mabuulula to. Kî mmufanda nansha mu Mukanda awu to.

307 Kaa, ekelekele! Mvwa mwa kujinga kulenga cyôci aci, bwa bantu baafika bushuwa...Kanupangidi to. Kanupangidi,

kanupangidiku to. Bu nwênù mwa kuswa kanupangidiku to, bwa ewu musangu. Ndi pabwìpi ne kunushiya. Kanupangidi to. Piikalabi ne nukaadiku bateeleje kacya, teelejaayi!

<sup>308</sup> Bitampi ebi bidi lwà paanyima paa Mukanda awu. “Kadi mu cikondo cidi mwanjelo wa mwandamutekete wela mpungi, maalu masokoka ònsò adi mafunda mu Mukanda awu ajikijiibu.” Ne dyakamwe Mukanda awu, ùvwà mubuulula ne mufunda munda awu, mmubwikila: “Maalu masokoka a Nzambi ajiki.” Nenku’s ki maalu masokoka a Nzambi ngôwò aa: diya dya Ekeleeziya, ne bintu bikwabo byònsò abi. “Maalu masokoka ajiki.” Peela mwanjelo wa mwandamutekete awu mpungi wa bwalu ne bwalu busokoka bwònsò, kwajiki. Nansha yèyè mwa kwikala nganyi, nansha cifwanyine kwikala cinyi. Dìyì dya Nzambi kadyena mwa kupangilaku to. Ne Yèyè mmwambe ne:

*Kadi mu matuku a dìyì dya mwanjelo wa mwandamutekete, paabangaye kwela mpungi, bwalu busokoka bwa Nzambi budi ne cya kujika, bu mudiye mwambile basadidi bende bapofeta.*

<sup>309</sup> Bintu byònsò abi, bu mudi, kaa, Loomo mwikale mu—mukaji wa masandi, ne ekeleeziya yònsò ya cyena Mishòònyi ayi, mangumba adi enda adivwija mangumba miikale amutentula yèyè awu, mmilwe ndumba milela kudiye yèyè. Nwamonu anyi? Maalu masokoka ònsò awu, akambabo kudi bapofeta awu, neabuuludiibwe mwaba ewu mene mu díbà dya ndekeelu edi.

<sup>310</sup> Nenku paajuuka mwanjelo wa mwandamutekete ewu mu cikondo cya Laodikiya ne paabangaye kwela Mpungi mulelela, bu mwikalaCi cibengangane, kabaakuCiitabuujaku to. Ncya bushuwa ne kabaakuCiitabuujaku to. Kadi, yèyè neikale muprofeta musonsola, bwalu kakwena mushindu wa kudifwanyikijilaCi to.

<sup>311</sup> Bantu badi bateeta kudifwanyikijila busatu, too ne mudibo bamena mvyu ku mitu ne bapaala mikupa. Muntu nansha umwe kèna mwa kucyumvwa to. Bacidi anu biitabuujana ne Eva wakadya cimuma cya pomme, ne bintu byònsò abi. Bwalu, ncilele cidi bantu bakwate kacya baalamataku, anu mwàkasanganàYesu ekeleeziya amu.

<sup>312</sup> Kadi nebikengele bwa kwikalaci muprofeta mulombola kudi Nzambi, bwa Dìyì dya Nzambi dilwe kudiye, mwikale ne dyumvwija dilelela dya dibuuludiibwa dya Yesu Kilisto. Nenku, pashiishe, bi—bikengela bwa biikale mushindu awu. Nzambi atukwacisheku!

<sup>313</sup> Mpindyewu: “Padiye wela mpungi,” mpindyewu, aci cidi EMU MMUDI MUKALENGE WAMBA. Tudi bacyümvwè bitooke tòò. Peelaye mpungi wa Mukenji wende, udi ukutula mvita; anu mwakenza Pòlò ne ba-Orthodoxes, bu mwakenza bakwabo bònsò, bu muvwa Luther, Wesley, balwishangana ne bulongolodi. Paakutulaye mvita, ne paabambilaye ne: “Badi

badinga, ne kî m'Bulelela to! Ne badi baseeswisha bantu!" Peelaye mpungi wa Cyôci aci, kanwena mwa kupangilaku to. KaCyakupangilaku to, bwalu yêyè neikale mushindika kudi Dîyî dya Nzambi. Nenumanye anu menemene ne Cyôci aci ncinyi. Nenku penzaye aci, peelaye mpungi, bwa kubikilangana bwa kupatuka mu Baabulona ne: "Patukaayi munda mwende, nwênù bantu baanyi, bwa kanulu kwikala baabanyanganyi nende baa mpekaatu yende to." Nzambi, umutumeku's! Kacinupiciku to.

<sup>314</sup> Mpindyewu: "Paabangaye kwela mpungi, bwalu busokoka nebujike." Mpindyewu, tangilaayi, dîbà adi ki cikondo bwa mêyi a Bitampi Mwandamutekete, a Bwakabuulwibwa 10 awu, bwa kubuuludiibwawu. Nudi bumvwe anyi? [Disangisha didi dyamba ne: "Amen."—Muf.] Piikala maalu masokoka ônsò a Mukanda awu majikijiibwe! Ne Bible mmwambe, mwaba ewu ne, yêyè ki wâjikija maalu masokoka awu.

<sup>315</sup> Paabi, bantu baa kale baa mu bikondo bikwabo abi's baakalwangana mvita bwa Bulelela. Baakalwangana mvita bwa dibingishiibwa. Baakanji kuya ndambu wa mutanci. Dijidiibwa! Baakalwangana bwa *cikampanda*, ne baakalwangana bwa *cikansanga*. Baakalwangana bwa *cikankenga*. Cyakenzabo ncinyi? Kukudimukabo kadi kudyenza bulongolodi mwômò amu, cintu cimwecimwe aci. Beena Mpenta, ne ba-Baptistes, ba-Presbytériens, ba-Luthériens, umwe ne umwe, kwenzabo cintu cimwecimwe aci, bakùdìmùke kadi kwenza anu cintu cimwecimwe aci.

<sup>316</sup> Ne Bible mmwambe, mu Bwakabuulwibwa 17 ne, ke civwabo mwa kwenza, maamù mukaji wa masandi wa kale ne bânà bende baa bakaji ne: "BWALU BUSOKOKA, BAABULONA." Bible mmwambe, mwaba ewu ne, neciikale bumwe bwa ku maalu masokoka avwa mwa kubuuludiibwa. Beena Mishònyì, bakaji baa masandi, "benda masandi a mu nyuma," balombola bantu ku mangumba, ne "lupanza lwabo lwa bubu," lwa dilongesha dikwatakaja kudi bantu; biikale babakoka babuumusha ku mpokolo mùle ne Mashi, mudi Bukole bwa Nzambi wa Bukole bwônsò bupongolokela naka kabuyi bwa difucila mushinga bwa kumwenesha Yesu Kilisto. Ncya bushuwa. Pashiishe, Nzambi neCitwe nyama ku mikolo, ne ki cidìYe mwenze, ne Yêyè neatungunuke. Kadi, pènzekà cyôci aci, Dîyî dyajiki.

<sup>317</sup> Mpindyewu nkushaale cintu anu cimwepele, m'Mikungulu Mwandamutekete, yitudi katuyi bamanye ayi. Kadi yôyì miine kayivwa ne cya kwikala mikungule anu bwa cyanaana to.

<sup>318</sup> Nzambi katu wenza cintu kampanda anu bwa kunaya to. Twêtù tutu tunaya ne twenza maalu a dikutakana, kadi kî n'Nzambi to. Cintu cyônsò kudi Nzambi cidì "Eyo" ne "To." Yêyè katu ukutakanaku cyanaana to. Katu wela bilele to. Yêyè udi wamba wambilamu cidìYe wamba aci. Ne Yêyè katu wamba

cintu nansha cimwe to padiku kakuyi cintu kampanda, ciikale ne dyumvwija kampanda.

<sup>319</sup> Nenku Mikungulu Mwandamutekete, anu mu dibuuludiibwa mene mwaba ewu dya Yesu Kilisto, Cidi mmbwalu busokoka kampanda. Bible kênàku wamba ne *Eci* cidi “Dibuuludiibwa dya Yesu Kilisto” anyi? Mona’s, nanku awu, kudi bwalu busokoka kampanda, bwa Cyôci aci. Hum! Cyôci aci ncinyi? Mikungulu Mwandamutekete ayi nyidi miCilame. Bwalu, Yone ukaavwa anu ne afunde, ki Dîyi kufuminadi mu Dyulu, dyamba ne: “KuCifundu to. Kadi, uCitwe citampi. UCitwe citampi. UCiteeke paanyima paa Mukanda awu.” Cidi ne cya kubuuludiibwa. Mmaalu masokoka.

<sup>320</sup> Mpindyewu, tudi bafile dyandamuna ku maalu aa, ku Nyuma Mwîmpè, mutwâmbile ne: “Kacivwa bimuma bya pommes to. Civwa mmasandi.” Mutwâmbile maalu aa. Kakwena nansha umwe udi mwa kushaala mwimane kumpala kwa Cyôci aci to. Kacya nci tu mêmè mwanji kumonaku muyiishi, kacya bandela, uCiitaba to. Kadi, nkaadi anu mubakonkekonke.

<sup>321</sup> Nudi bamanye’s, mu Chicago, patwakiimana kumpala kwabo, bayiishi batwe ku nkama yisatu ne makumi ataanu, nwênù bakaji baa mu Chicago badi mwaba ewu aba, nuwapu, nwâkacyûmwva.

<sup>322</sup> Ki Mukalenge kungambila, mafuku asatu kumpala kwa ciine aci, ne: “Nebakwelele buteyi.” Yêyè ne: “Imanyina lwà ku dididiishi eku kadi Nkuleeje.” Yêyè ne: “Mukalenge Carlson ne—ne Tommy Hicks nebatwilangane neebe maalaba mu dinda, bakeba bwa nuye ku didya dya mu dinda. Nenku wêwè wambile Tommy bwa kushalaye. Kadi,” ne, “mmwenekelu wikalabi nende nyêyè ewu. Ûbâmbilè ne kabaakwenzela disangisha adi mu mwaba udibo bôbô beelele meeji awu to. Nebiikale mu mwaba wa cyanaana.” Yêyè ne: “Kuciinyi to. Mêmè nêngiikalè neebe.” Aci’s ncilenga cikumbane bwanyi mêmè.

<sup>323</sup> Paakacyabu mu dinda, Mukalenge Carlson, mfumu wa Beena Kantu-ku-byanza baa Evanjeeliyo mu Kaabujima, kulwaye, kwambaye. . . kumbiikilaye, wamba ne: “Mwaneetu Branham, ndi muswe kuya neebe ku didya dya mu dinda.”

<sup>324</sup> Mêmè ne: “Mbilenga.” (Mêmè ne: “Tangila umone ne Tommy Hicks neikalèku, yêyè pende.”)

<sup>325</sup> Twêtù kupweka ku Town and Country, ki yêyè kwamba ne: “Ee, Mwaneetu Branham,” yêyè ne, “kaa, eci’s ngumwe. . .”

Mêmè ne: “Tommy, udi mwa kungaanyishilaku bwalu anyi?”

“Cya bushuwa’s, Mwaneetu Branham.”

Mêmè ne: “Ndi ndikonka ní udiku wêwè mufwanyine kwakula pa kaaba kaanyi?”

Yêyè ne: “Kaa, ncyêna—ncyêna mufwanyine kwenzaku aci to.”

326 Mémè ne: “Bwa cinyi? Mémè ewu’s ndi anu mulongi wa kalaasa kaa mwandamutekete, nenku nê—nêngâmbè ne... Ndi mufwanyine kwamba *empire* [“mfumu wa bukalenge bwalabale”—Muk.] pamutu paa *umpire* [“mwedi wa kashiba”]. Wamonu anyi? Ncitu mumanye mwa kwakula kumpala kwaka to. Bya bwalu nyawu nekwikale Nsangilu wa Bambi wa Chicago Munene kuntwaku. Nêngâàkulè kumpala kwabo aku munyi, ne kaanyi kalaasa kaa mwandamutekete kândi mulonge aka, Tommy? Wêwè ewu’s udi Docteur wa Bunzambi paudi apa.” Mémè ne: “Wêwè’s ngudi mufwanyine kumanya mwa kwakula. Kî mmémè to.”

Yêyè ne: “Mwaneetu Branham, ncyêna mufwanyine kwenza aci to.”

327 Mémè ne: “Bwa cinyi? Mémè ewu’s nkaadiku mukwambulwishe mu maalu âbûngî.” Ki mémè kucilekelela anu pwakalakaa.

328 Ki Mwaneetu Carlson kwambaye ne: “Kaa, Mwaneetu Branham, yêyè kî mmufwanyine kwenzaku aci to.”

Mémè ne: “Bwa cinyi?”

Yêyè ne: “Ee, yêyè, kùdî—kùdî—kùdî—kùdî. . .”

329 Mémè ne: “Nudi bamanye ne mbwa cinyi? Nwênù’s nudi anu bamanye ne mbwa cinyi, kadi kanuyi baswe kungambila to. Mbandongolwele buteyi.”

330 Ki mémè kwamba ne: “Mwaneetu Carlson, nudi bangate cibambalu cya cilaala-beenyi aci, s’mmwômò, mutuvwa badiile didya dikwabo adi amu?”

“Eyo.”

Mémè ne: “Kanwakucipeta to.”

331 Yêyè ne: “Ee, Mwaneetu Branham, s’nkaadi mumane kucifidila ndambu wa mfranga.”

332 Mémè ne: “Cyûkaadi mwenze nansha ciikale cinganyi. Kacyakwikalaku to. Ncibambalu cilaaba mukubu wa diikala dya mâyi a matamba. Netwikale mu cibambalu cya diikala dya difiikuluke. Mémè nêngîkadilè paanyima mu ditumba. Docteur Mead neikale musòmbèle lwà ku dyabalume. Mwaneetu wa balume wa bafiike awu ne mukajende nebiikale basòmbèle lwà *apa*, ne *kampanda ne kansanga*. Nekwikale mwakwidi wa cyena Bouddha musòmbèle ku luseke lwanyi lwa dyabalume kwaka menemene,” ne bilâmbà biikalabo bavwale.

333 Ki mémè kwamba ne: “Wêwè’s udi mumanye cîdiku, Tommy. Wêwè ewu’s udi. . .Nsangilu wa Bambi wa Chicago Munene neangeele kadyombo pa ‘dibatiiza dya mu Dîna dya Yesu Kilisto.’ Nsangilu wa Bambi wa Chicago Munene neangeele kadyombo pa ‘cileejî cya Nyuma Mwimpè,’ dyakula dya mu myakulu.



Nebangeele kadyombo pa ‘dimiinu dya nyoka,’ ne pa diyiisha dya ‘ngàsà.’”

334 Tommy kutangila talalaa, kwambaye ne: “Luse we! Nzambi wanyi!” Yèyè ne: “Ncyèna ngeela meeji ne nènnyemù mene to.”

Mèmè ne: “To, wèwè lwâ anu kulwa.”

335 Ki paakacyabu, muntu uvwa mwangate ndambu wa mfranga yikaavwabo bafile ayi awu, kumwalujilaye ndambu wa mfranga awu, wamba ne: “Tudi bapete cisumbu cya bimbi baa misambu. Cibambalu aci tukaavwa bacyângâcile mfranga, kadi nyawu tukaavwa bapwe bwalu abu mwoyi ne bajimije ne ciine cintu aci. Nenku bivwa bikengela bwa twètù kucifila kudi cisumbu cya bimbi baa misambu aci, pa nanku nwènù kanwena mwa kucyangata to.” Ki twètù kupatuka e kuya ku Town And Country.

336 Tubwelamu, mu dinda adi, ki bôbò abu biimane bônso mànzàlànzàlà mwaba awu. Pângàakasombà paanyima paa cibasa civwa paanyima apu aci, mèmè kushaala mwindile, paanyima paa bôbò bamane kudya cyakudya cya mu dinda aci, mèmè kukenzakana mboosha dîsù mushindu ewu. Twètù kudiila cyakudya cya mu dinda aci mu cibambalu kampanda. Tupatuka, kusomba mwaba awu, ki Nsangilu wa Bambi wa Chicago Munene awu mwaba awu. Mèmè kukenzakana e kuboosha dîsù. Muntu ne muntu wa kudibo uditeeja muvwaye Docteur Ph.D., L.L., Q.U.S.T., ne bintu bya mishindu yônso abi mushindu awu. Mèmè kushaala musombe anu patupu mbateeleja bôbò, too ne mwakalwabo kujikija. Ki Mwaneetu—Mwaneetu Carlson kujuukaye. Kwambaye ne: “Balumyana . . .”

337 Ne nwènù bônso nutu bamanye Hank Carlson. Nenku, mwaba awu, nwâmukonkaayi. Ee, nudi naabi pa mikaba ya mèyî mwaba ewu mene. Pawikala muswe kusumba mukaba wa mèyî, ùdi apa. Bânà baa balume aba badi naawu.

338 Yèyè ne: “Balumyana,” yèyè ne, “ndi nnuleeja, pashiishe, Mwaneetu Branham.” Yèyè ne: “Nwènù nudi bafwanyine bônso kubengangana nende pa bidiye wamba, pa Dilongesha dyende, kadi anji lekelaayi nwwâmbilèku cintu kampanda. Kukaadi matuku asatu, tuvwa basombe mu mwaba kampanda, kadi muntu awu yèyè kayi mungambile byônso bidi bipitakane mu dinda emu ebi to, mbwena kwamba ne mèmè ncyèna mwimane mwaba ewu to. Mmungambile munudi bônso badilongole bwa kumwela nkonko pa Dilongesha dyende. Kabidi mmungambile mûmvwâ ne cya kulekela mukwabo mwaba wawa, ne kwikala mwaba ewu. Kabidi mmungambile anu menemene mwaba uvwa Docteur Mead ne bantu aba mwa kwikala basombèle, anu mu byôbî menemene, kadi’s mbôbò aba.” Yèyè ne: “Nudi bafwanyine kwikala babengangane nende pa bidiye wamba, kadi, nêngâmbè cintu cimwepele eci ne, yèyè kèna uciina bwa bidiye wela meeji nansha.”

Yèyè ne: “Mpindyewu, Mwaneetu Branham, ki cyalu eci.”

<sup>339</sup> Mémè kwamba ne: “Kumpala kwa twètù kubanga...” Mémè kubala cingààbadì mu dinda emu eci ne: “Ncyakashikuka ku cikeena-kumona cya mu Dyulu to.” Mémè ne: “Tujikijaayaaku bwalu ebu mpindyewu. Mpindyewu, nwènù bônso nyawu nwakula nwamba munudi ba-Docteurs mu Bunzambi; kadi mémè ndi mwimane apa nkaayaanyi.” Mémè ne: “Piikalabi ne bidi nanku, nudi baswe kungeela nkonko, pa dibatiiza dya mu Dîna dya Yesu. Netwânjì kubanga ne cyôci aci. Ndi muswe bwa umwepele wa kunudi aku atwale Bible wende alwe imane mwaba ewu ku luseke lwanyi eku, pa cintu kana cyônso cîndi mulongeshe.” Mémè ne: “Imane mwaba ewu ku luseke lwanyi eku, nenku, mwikale ne Dîyì dya Nzambi, ajaadike ne Cyôci aci ncyà mafi.” Mémè kushaala mwindile. Bônso kushaala matama bu byâtà. Mémè ne: “S’ki mémè udi ulomba bwa muntu kampanda wa kunudi aku kulwaye kwimana ku luseke lwanyi eku awu.” Mémè ne: “Mbwalu kaayi ebu kunudi? Pa nanku, umushaayi mukolo mu wànyì, panwikala nuciina bwa kwimana ku luseke lwanyi eku.”

<sup>340</sup> Udibo baciina awu kî mmémè to; m’Mwanjelo wa Nzambi wa Bukole bwônso awu. Aci, mbamanye ne, piikalabi ne Yèyè uvwa mwa kudyanjila kungambila bwa kulwa... Bôbò mene’s bavwa ne meejì matwe kutamba ne mûmvwà mémè ndyambidila ne mmuvwabo naawu. Bavwa bamanye ne bivwa bitambe bwîmpè bwa kubenga kuya kiimana mwaba awu. Uh-huh. Nudi bamanye’s, nukaadiku anu basanganyiibwe mu bikondo kampanda, mu bikondo bya mushindu awu, nwènù peenu. Kadi kabakacyenzaku to. Mbwalu kaayi ebu, piikalaci cinene nanku awu, ne bôbò bamanye ne ncilelela mushindu awu?

<sup>341</sup> Ndi mucyèlè pa mikaba ya mêyì, ne myaba mikwabo yônso; ndi mudilongolole bwa kuciyiikilangana, mu mushindu wa bwena Kilisto, ne mwaneetu kana yônso. Ncyakukokangana ku mêyì ne muntu nansha umwe to; kadi ndi muswe bwa wèwè kulwa, kujaadika nî ncinyi nî ncinyi cyônso cya ku Cyôci aci ne ncyà mafi, ku Dîyì. Kadi, kî nku kakanda keebe kaa dilongeshangana naaku aku to; kî mbidi Docteur *Kampanda*, anyi Munsantu *Kansanga* mwambe to. Ndi mémè muswe kumanya cidì Nzambi mwambe. Aci ki cidì nshindameenu. Ndi mémè muswe kumanya cidì Cyôci aci. Bôbò kabeena bacyenza to.

<sup>342</sup> Mpindyewu, tangilaayaaku, paakumbana dîbà bwa mêyì mwandamutekete awu. Pa dîbà adi ki dîbà dya mêyì mwandamutekete awu, pàdì Mukanda awu ujikijiibwa, bwa Bwakabuulwibwa 10 kubuuludiibwaye. Mpindyewu monaayi. Teelejaayi.

<sup>343</sup> Mpindyewu, ncyakunulama mukùngùlù mupitepite bule to. Ndi mumanye ne ndi nnucyokeshà, mwaba ewu. Tukaadi

dìbà dikumi kushaale tusunsa makumi abidi. [Disangisha didi dyamba ne: “To. Tungunuka!”—Muf.] Teelejaayaaku ne ntema mpindyewu. Ndi mumanye ne, nudi biimane kuulu, ne nwènù bônso nukaadi nwenza kwimana mukolo mule ne mwîpì ne bikwabo. Nèngìikalè ne disanka pàngààmònà ekeleeziya mumana kulongolola mu mushindu wa kabiyi bikengela bwa twètù kwikala bapayamike nenku to. Tudi mwa kwangata dituku dijima bwa kuCiyiisha.

<sup>344</sup> Mpindyewu monaayaaku. Mpindyewu fundayyi nulame. Mèyi mwandamutekete awu avwa mmikungulu, makubakuba.

Nzambi, watùkwàcishakù. Mémè mutupakane, Mukalenge, wamfwilaku luse.

<sup>345</sup> Nyewu ntwela lukonko elu. Civwa cituute dikubakuba dya mukungulu, pavwa dìyi edi didile apu. Nuvwaku bamone, ne, pavwa Bitampi Mwandamutekete bidi bilonda bikondo mwandamutekte bya ekeleeziya abi, paakakangudiibwa Citampi cya Kumpala, kuvwa mukungulu anyi? Citampi cya Kumpala mu Mukanda awu paakakangudiibwaci, kuvwa mukungulu; Citampi cya Kumpala cya pambelu paa Mukanda eci kî ncifwanyine kukanguka mushindu umweumwe awu anyi? Nzambi katu ushintulula ndongamu Wende nansha. Tubuululaayaaku mu Bwakabuulwibwa 6.

*Ne ngâkamòna paakamana Mwânà wa mukooko kukangula cimwe cya ku bitampi, ne ngâkumvwa, bu ne civwa mutooyi wa mukungulu, ne umwe wa ku nyama yinaayi ayi wakamba ne: Lwâ umone.*

<sup>346</sup> Mpindyewu, kakuvwaku mukungulu mukwabo to. “Ne Citampi cya ndekeelu cyakakangudiibwa, kwakiikala mu Dyulu katanci kaa cinyaanya kaa cyabibidi cimwe cya dìbà.” Kadi, Citampi cya kumpala paakakangudiibwaci, kuvwa dikubakuba dya mukungulu.

<sup>347</sup> Kaa, ekeleeziya, ki cidi cifwanyine kwikalaku anyi? Tukaadi bakafike ne kwòkò aku anyi? Balunda baanyi, elanganaayi meeji. Pàmwäpa’s. Ndi ntekemena ne kî ncyôci to. Kadi àpu nî ncyôci? Dikubakuba adi divwa ncinyi? Ne kumpala kwa Nzambi, ne Bible mubuulula ewu, ncyèna nshimaku to. Dikubakuba, divwà dinyùkùshe buloba!

<sup>348</sup> Nenku Citampi cya Kumpala, cya ku mwandamutekete bivwa bikangudiibwe mu Bible abi, paakalwaci, anu Dimwe cyanaana, kadi dikubakuba divwà dinyukùshe cintu cyòsò mu kaabujima; mukungulu. Ne pashiishe pavwa Bitampi bidi paanyima mwa kukanguka, kacivwa cifwanyine kwikala paaci mukungulu anyi, cyôci aci? Ncyèna mumanye to. Ncyèna mwa kwamba to.

<sup>349</sup> Kuvwa mukungulu, Citampi cya Kumpala, ne Citampi aci civwa mukungulu. Mpungi uvwa mukanguke pa diine dìbà adi.

Ne Mpungi wakeediibwa dya Mpenta, mu bushuwa bwa bwalu. Ncyêna muswe kubwela mu aci to.

<sup>350</sup> Mpindyewu, piikalabi ne cikeena-kumona aci civwa cya mu Mifundu; cikeena-kumona cîndi munkaci mwa kwamba eci, ncîmvwà mumone mu diisambombo mu dinda aci. Kukaadi lumingu lujima, patudi twakulangana apa. Piikalabi ne, vulukaayi mpindyewu mwaba ewu, piikalabi ne cikeena-kumona aci civwa cya mu Mifundu, cidi ne cya kumvwijibwa ku Mifundu, anyi ntungunukilu wa Mufundu wôwò umweumwe awu. [Mwaneetu Branham udi ushaala mwanji kupuwa—Muf.] Mvwa mwanji anu kwindila cyanaana, bwa aci cibwele bîmpè. Piikalabi ne. . .

<sup>351</sup> Eci cîndi mumone eci, civwaci, ncyêna mumanye to, kadi ndi ne bwôwà bwa mufwanyine kufwa. Kwêtù nkumane kujika anyi? Tukaadi kundekeelu anyi? Vulukaayi ne, Mwanjelo ewu wakamba, paakenzeka bwalu ebu apu, Yêyè wakadicipa ne: “Kakwakwikala kabidi cikondo nansha.” Ndi ndikonka ní tudi tuumvwa bulelela eci nunku.

<sup>352</sup> Wêwè nyawu wamba ne: “Ee, mbyenze anu bu ne Cyôci aci ncifwanyine kwikala cituuta makubakuba eku ne ek- . . .” Mwaneetu, Yêyè’s udi ulwa mu kasunsa kaudi kuyi welela meeji. S’neùCyûmvwè bwa musangu webe wa ndekeelu.

<sup>353</sup> Mpindyewu nCitooke anyi? Paakakangudiibwa Citampi cya Kumpala, Bitampi bivwa munda mwa Mukanda abi, maalu masokoka avwa dîyî dya mpungi dyele patooke aa: dibingishiibwa, dijidiibwa, ekeleeziya wa Katolike wa cyena Loomo, beena Mishònyî! Nunku tumvita twabo twa tukeseketukese atu paakashiyatu maalu avwa mashaadile mu njila aa mu Dîyî dya Nzambi, mwanjelo wa mwandamutekete udi ulwa ubikungwija byônsò ne ubyumvwija. Nwamonu anyi? Ne pashiishe, udi ujikija, Mikungulu Mwandamutekete paayi yumba yidila.

<sup>354</sup> Pakaavwa anu Yone ne afunde, kwambaye ne: “KuCifundu to. Kadi, uCitwe citampi.”

<sup>355</sup> “Nenku Citampi cya Kumpala cyakakangudiibwa,” cya ku Bitampi bivwa munda mwa Mukanda abi, Cyakakanguka ne mukungulu. Uh!

<sup>356</sup> Piikalabi ne eci ncyà mu Mifundu, cidi mwa kwikala anu. . . Piikala Mufundu kana wônsò mwikale. . . Cintu kana cyônsò cidi ne cya kwikala cya mu Bible. . .

<sup>357</sup> Cidi anu bu, kwêna mwa kungambilaku ne kutu paaku cintu ne “mpurgatoriyo” ne bintu bya mushindu awu to. Kakwenaku Mufundu nansha umwe mu Bible bwa kucitwa nyama ku mikolo to. Kwêna mwa kungambilaku bwa bintu ebi, bu mudi mukanda wa ba-Maccabées, nansha mudibi bifwanyine kwikala anu bilenga. . . “Ne Mukanda mwinâyî wa Danyeke awu, mudibi ne Mwanjelo wakamukwacila ku nsuki ya ku mutu,

ne wakamba . . . wakamusòmbesha panshi.” Kakutu cintu bu nanku nansha cimwe cikaadiku mene cyenzeke mu Bible to, mudibi ne: “Yesu wa mu Nazaleeta wakafwimba kanyuunyi kakese kaa diima, ne kukaasa tukolo, kwamba ne: ‘Hyu! Buuka ndaaku, kanyuunyi wetu,’” aci’s ndukutukutu. Kakwena cintu nansha cimwe mu Bible bwa kutwa cya nanku nyama ku mikolo to. Pa nanku kacyna cikutakaja . . . Ba—bakudimunyi, Nzambi ukaavwa mumane kutabaleela ciine aci bwa ne bakudimunyi kabasakididi nansha mêyi maswika awu ne lukutukutu alu to. Bavwa bafwanyine kwikala bantu balenga, bânà beetu baa ba-Maccabées abu. Ki civwabo bôbò. Ncyêna ngamba ne kabavwa bantu balenga to. Kadi kabivwa bya mu Mifundu to.

<sup>358</sup> *Eci* ki dibuuludiibwa mu kaabujima dya Yesu Kilisto. “Cintu nansha cimwe kacyna mwa kusakidiibwaKu anyi kuumushiibwaKu to.” Nenku twêtù beele aci mu Cyôcì munda amu, kacyna cikumbanangana ne mikwabo Mifundu to. Kudi Mikanda ya Bible ewu makumi asambombo ne yisambombo, ne Diyì nansha dimwe kadyena dibenganganaku ne Dikwabo to.

<sup>359</sup> Neashiishe, piikalabi ne edi ki ditungunuka, bwa dyela dya mpungi ya ndekeelu eyi, anyi Mikungulu Mwandamutekete ya ndekeelu yilwalwa eyi, maalu masokoka aa, Bitampi bya ndekeelu abi, nebikengele bwa Cyôcì kulwangana, anyi kunwângana, ne mikwabo Mifundu. Ne piikalabi ne Byôbi bya kumpala abi mwômò amu byakakanguka ne dikubakuba dya mukungulu, Biibîdi nebikanguke anu nanku, byôbi paabi, bidì paanyima abi. Tangilaayi numone cidì cyènzekà. Piikalabi ne cikeena-kumona aci civwa Mufundu, nanku’s cidì ne cya kuumvwijiibwa ku Mifundu, anyi ditungunuka dya Mufundu umweunwe awu.

<sup>360</sup> Monaayaaku, Bwakabuulwibwa, 3 ne 4, “Mikungulu Mwandamutekete.” Mikungulu Mwandamutekete, neashiishe monaayi, 3 ne 4, neashiishe (cinyi?) mucipu wa Mwanjelo wa bukole awu, ne: “Cikondo cyakajika.” Mikungulu eyi, nudi numona’s, paakatwalayi mêyi aayi, pa dîbà adi ki Mwanjelo . . .

<sup>361</sup> Anji elayibi anu meeji pa bwalu abu! “Mwanjelo, muwadika ditutu, ne cipungidi cya mwanzankongolo kumutu Kwende.” Mona’s, s’nudi bamanye ne Yêyè awu nganyi. “Wakateeka dikàsà dimwe pa buloba bûme, ne pa mbû, ne wakeela cyanza Cyende muulu ne wakadicipa, ne: ‘Pavwa Mikungulu Mwandamutekete ayi mipatule mêyi aayi apu,’ ne, ‘cikondo kacyakwikalaku kabidi to.’”

<sup>362</sup> Nenku piikalabi ne mudimu wa bwambi wa maalu masokoka a Nzambi mmujike, twâmbè bishi piikalabi ne aci ki maalu masokoka mwandamutekete àlwalwà awu? Ne kaekeleeziya kadîpwekèshe, kakese bu mudi keetu twêtù aka, mùdi Wa bukole bwònsò mulwe e kutangila ngiikadilu mushaadile wa cisamba Cyende emu! Wèwè udi wamba ne: “Cinyi? Mèmè ncyêna

ngeela meeji nanku to.” Mbifwanyine kwikala kabiyi nanku to. Kadi àpu ne bidi nanku? Nanku’s cikondo cyàjiki. Ukààvwaku mukwèlèle meeji anyi? Angata maalu ne dîsù dikole. Dîbà didi mwa kwikala diye kupita mutudi twètù twela meeji amu.

<sup>363</sup> Mitooto yìdì yìpòna mu cisumbu cyayi kuntu kwaka eyi! Mwanjelo awu mulwe, mwambe ne: “Anu muvwa Yone mutumiibwe bwa kutwa cìshindaayi ku Dipungila Dikulukulu ne kutwala dileejibwa dya Kilisto, Mukenji kampanda newutwe cìshindaayi ku maalu adi mashaadile mu njila ne newuleeje Maasiya pabwîpi menemene ne Dilwa Dyende, Mukenji wa matuku a ndekeelu.”

<sup>364</sup> Monaayi, Mwanjelo wa bukole awu wakadicipa, ne mucipu, ne: “Cikondo kacyakwikalaku kabidi to.”

<sup>365</sup> Mpindyewu, ncyèna muswe kunulama ntanta mupitepite bule to. Anji elanganaayi anu meeji pa bwalu ebu, katanci kakese mpindyewu.

<sup>366</sup> Mpindyewu teejeaayaaku. Mwanjelo ewu wakatuuluka ufumina mu Dyulu. Nwamonu anyi? Bakwabo, banjelo mwandamutekete baa ekeleeziya mwandamutekete abu, bavwa mbaamisanjeela baa pa buloba. Kadi ewu Mwanjelo... Mukenji wònsò wajiki; mwanjelo wa mwandamutekete udi utwa cìshindaayi ku cintu cyònsò nkòong. Ne Mwanjelo ewu kèna ulwa pa buloba to; Yèyè kî mmuntu wa pa buloba to, bu mudi baamisanjeela baa bikondo bya ekeleeziya abu; abi mbimane kujika. Kadi, ewu Mwanjelo udi utwala dimanyisha didi dilonda. Ne *mwanjelo* mbwena kwamba ne “musanjeela.” Ne Yèyè udi utuuluka ufumina mu Dyulu, muvwadika Dikunji dya Bukènkè adi, Ditutu, mwikale ne mwanzankongolo kumutu Kwende. Ne mwanzankongolo ncipungidi. Ûvwa n’Kilisto: “Ne dikàsà dimwe pa buloba bùme, ne dikwabo pa mbù, ne wakadicipa, ne: ‘Cikondo kacyakwikalaku kabidi to.’”

Tukaadi penyi, bakalenge? Biine byònsò ebi mbya bwalu kaayi? Nwènù’s mbàndi nkonka aba.

<sup>367</sup> Banjelo bakwabo abu bavwa mbaamisanjeela, bantu baa pa buloba. Kadi ewu Mwanjelo...Aba, mbambe ne: “Kudi mwanjelo wa ekeleeziya wa Laodikiya,” “Kudi mwanjelo wa ekeleeziya wa Efeso” abu, mbaamisanjeela baa pa buloba; nwamonu’s, bantu, baamisanjeela, bapofeta, ne bikwabo, batùmina ekeleeziya.

<sup>368</sup> Kadi, ewu Yèyè kaakafuma pa buloba to. Wakatuuluka ufumina mu Dyulu, bwalu bwalu busokoka mbumane kujika bwònsò. Nenku padi bwalu busokoka bujika, Mwanjelo wàmbi ne: “Cikondo kacyakwikalaku kabidi to,” ki Mikungulu Mwandamutekete kupatulayi mèyi aayi patooke.

<sup>369</sup> Àpu nî ncintu kampanda bwa kutumanyisha mushindu wa kubwela mu Diitabuuja dya Dyambwibwa? Ncyòci anyi? Netwikale tukaadi twenda tunyeemakana mbilu, tutupikila

pa bimanu anyi? Nenku kudi cintu kampana pabwîpì ne kwenzeka, nenku mibidi ya kale, minyangukangane, mibyãmìbyalè eyi neyishintuludiibwe anyi? Mêmè ndiku mwa kushaala ne mwoyi too ne ku dicimona anyi, Éyì Mukalenge? Cìkaadi pabwîpì menemene mu mushindu wa ne mêmè ewu nêncimònèku anyi? Elu lukongo ki lwòlò lwine anyi? Bakalenge, bânà beetu, tukaadi dîbà kaayi? Tukaadi penyi?

<sup>370</sup> Tutapaayi dîsù ku dîbà dya ku diboko, ku kabala-matuku, bwa tumone ne tukaadi ne mwoyi mu dituku kaayi dya ngondo. Izaleela ukaadi mu Palestine, mu buloba bwende. Dibendela, mutooto wa Davidi wa matumba asambombo awu (dya kukaadi bidimu binunu bibidi awu, eyowa, kukaadi bidimu bitwe ku binunu bibidi ne nkama yitaanu), dibendela didi ditambe kwikala dya kalekale adi, dikaadi dipeepa. Izaleela ukaadi mwalukile mu buloba bwende. “Muci wa mfigi paapatulawu ntonga yawu, lukongo elu kalwakufwa to, kalwakupita, kujika to, maalu ônsò aa kaayi makumbane.”

Matunga akaadi apanduluka, Izaleela nyewu utabuluka,  
Bimanyinu byàkadyànjlà baprofeta kwamba;  
Matuku a baa Bisamba bya bende mmabala,  
mûle tente ne bintu bidi byenza bwôwà;  
“Alukilaayi, Éyì nwênù badi batangalajiibwe,  
kudi baa kwenu.”

Dituku dya bupikudi didi pabwîpì,  
Myoyi ya bantu ki kufwayi ne bwôwà eku;  
Ujìibwāyi ne Nyuma, ikalaayi ne myêndù yenu  
milongolola ne misukula,  
Bandulukaayi, bupikudi bwenu bukaadi  
pabwîpì!

Baprofeta baa mashimi badi badinga, badi  
bavila Bulelela bwa Nzambi,  
Bwa ne Yesu Kilisto udi Nzambi wetu.

Nwênù's nudi bamanye ne Cidi Bulelela! Eyowa's.

Kadi twêtù netwendele myaba yàkadyatà  
bapostolo.

Bwalu dituku dya bupikudi didi pabwîpì,  
Myoyi ya bantu ki kufwayi ne bwôwà eku;  
Ujìibwāyi ne Nyuma, ikalaayi ne myêndù yenu  
milongolola ne misukula,  
Bandulukaayi, bupikudi bwenu bukaadi  
pabwîpì!

<sup>371</sup> Ndifwanyine kwikala pabwîpì kutamba mùdi wêwè udyelela meeji amu. Mêmè mbinkwacishe bwôwà. Kaa, ncyèna ne cîndi mwenze cikumbane to. Tukaadi penyi?

372 “Cikondo kacyakwikalaku kabidi to.” Ûdi ùmanyisha ne cikondo ncijike. Cìdì cyènzekà ncinyi? Cìdì cyènzekà ncinyi? Mbifwanyine kwikala nanku mpindyewu anyi, bânà beetu? Elaayi meeji biikale ne dîsù dikole. Piikalabi ne bidi nanku, nanku’s cipaapu cya musaka cikaadi cyashiibwe mùsongà kudi Mikungulu Mwandamutekete.

373 Nudi bavuluke Dyiisha dya pa cipaapu cya musaka anyi? N’Dibwe dya mùsongà. Ncinyi cyakenzaDi? Nyuma Mwîmpè wakaasa muntu nkaaya mùsongà ne wàkakùtwa citampi, patwakasakidila ku diitabuuja dyetu; bwakane, ne difwana dya Nzambi, ne diitabuuja, ne bikwabo, ne batungunuke anu ne kukùsàkidila too ne patwakapeta bintu mwandamutekete. Ne cya mwandamutekete civwa ndinanga, didi diikale Nzambi. Mushindu awu ki udiYe wenza muntu nkaaya, umwasa mùsongà ne umutwa citampi cya Nyuma Mwîmpè.

374 Pashiishe, piikalabi nanku, Yèyè ukaadi ne bikondo bya ekeleeziya mwandamutekete, mudiYe mupetele maalu masokoka mwandamutekete adi mapatula ku mwadi wa mpungi, ne avwabo balwangeene mvita, bwa kwaluja. Nenku mpindyewu Dibwe dya mùsongà didi dilwa, bwa kwasa Ekeleeziya mùsongà. Ki cidi Mikungulu yumvwija anyi, bânà beetu wanyi? Bakalenge, mwaba awu ki utukaadi anyi?

375 Junie, ndi muswe kwangata ciloota cyebe. Tangila. Junior, kumpala kwa cipaapu cya musaka aci kwikalaci ciyiishiibwe, ngondo ne ngondo kumpala kwa cyôci aci, wèwè ukaavwa mumone ciloota ciine eci.

Nudi nwamba ne: “Bwa ciloota paabu ki bwèpi’s?”

376 Nebukandeneesa wakaloota ciloota cyàkumvwijà Danye, mwambe bwa ntwadijilu wa cikondo cya baa Bisamba bya bende ne pavwaci mwa kuumuka. Ne mbyenzeke menemene anu mushindu awu. Kantu kakese nansha kamwe kî nkapangile nansha.

377 Nudi numona anyi? Mufundu uvwabo . . . ùvwa pa mbwebwe awu, mêmè ki uvwa ubumvwijaWu. Bôbò bavwa basaluke ne disanka. Ki “bwalu busokoka bwa Nzambi” buvwabo kabayi bumvwe mbwôbù abu, munda mwa bidimu. Mbifwanyine kwikala cyôci aci anyi?

378 Nenku monaayi. Mu mushindu kampanda udi kawuyi wumvwika to, twètù kubakula, mu lupeepele naka, cintu kampanda cya cisàkisha cyàkakàngulà lusongo alu. Ne munda amu muvwa dibwe ditooke dya granite, kadi kaCivwa cyumvwija to. Kapavwa maleeta to. Ncyàkumvwija Aci to, Junior. NgâkaCitàngila anu cyanaana, e kwambila bânà beetu ne: “Ikalaayi batangile Cyôci eci.” Nenku cyôci aci ncyûle, diloolo edi.



379 Nenku pavwabo munkaci mwa kulonga Cyôci aci, mêmè kudifinda kuya mutangile ku wesete. Ku cinyi? Pàmwàpa bwa kuumvwa dyumvwija dya cidi cifunda mu lusongo lwa Cyôci aci amu. Ncifwanyine kwikala cyôci aci anyi?

380 Nenku Yôyi ayi, yituuta makubakuba, dinda adi, yakannyukulula mu mushindu wa ne ngâkatüntumunyiibwa muulu mu lupeepele, mu butumbuke bwa nzubu ewu, cisumbu cya Banjelo aci, Banjelo mwandamutekete mu mmwenekelu wa cipaapu cya musaka. Ki Mikungulu miine yilwalwa ayi anyi? Ncifwanyine kwikala cyôci aci anyi?

381 Eci cikaadi cimana kuumvwija cyônsò. Bilondeshile ciloota cyende aci, byônsò bivwa bijike. Bilondeshile Dîyi dya Nzambi, musanjeela wa mwandamutekete ki wâjikija, Mukenji wa mwandamutekete newikale mujike, ne pa dîbà adi Mikungulu Mwandamutekete. Ne yêyê wakamona dibwe dya mùsongà dibùnguluja.

382 Pàdîbi ne, bantu bààbûngî kabatu nansha bamanye ne kudi Bitampi Mwandamutekete bidi ne cya kubuuludiibwa to. Ntu mubalebale mikanda ya bantu bààbûngî pa bidi bitangila Bwakabuulwibwa, ncituku mwanji kuumvwa baCiteejaku to. Batu anu baCitupika. Kadi nwênù nudi bambila ne Cidiku.

383 Ncyêna mumanye ne ncinyi to. Ncifwanyine kwikala cyôci aci anyi? Nzambi ikaleku neetu luse's! Piikalabi ne ncyôci aci, tukaadi mu dîbà dya bwalu bukole. Mpindyewu, indilaayi kakese cyanaana, tangilaayi. Byôbî biikale nanku, ne bwalu busokoka bujike, bùvwà bufùnda mu mbwebwe ayi abu.

384 Ndi ne disanka dya kwikala musômbe mu ekeleeziya udi ne bantu baa difwana dya Nzambi badi Nzambi mwa kupeeshaku ciloota. Ndi ne disanka dya kuleeja balume ne bakaji aba batu baya mu ekeleeziya wa Junior, ne mu ewu ekeleeziya, wa Mwaneetu Neville ewu, ne mikwabo, ne kudi bantu basômbe mu disangisha edi, ne Bible utu mwambe ne: "Nebaloote biloota mu matuku a ndekeelu." Kadi's ki cyôci eci. Nenku citangilaayi numone, cidi cikumbanangana ne Dîyi.

385 Nciyi mumanye kantu nansha kamwe pa cyôci aci to, ki dikubakuba kulwadi, nenku ki Banjelo mwandamutekete bàlwalwà aba bafumina mu Cyendelele. Mêmè kwamba ne: "Mukalenge, Udi muswe bwa mêmè kwenza cinyi?" Kacyakambiibwa to. Ndi mwa kwikala mwenzejiibwe bwa kuya, dyambedi, bwa kuya kajandula. Ncyêna mumanye to. Ncifwanyine mene kwikala kacyi cyôci aci to. Ncyêna mumanye to. Ndi ngamba anu cyanaana ne: "Àpu nî ncyôci?" Piikalaci cya mu Mifundu, cidi cimweka cifwanangane menemene naaci. Kanwenaayiku peenu nwela meeji nanku anyi?

386 Tangilaayi. Pashiishe, tangilaayi, dibwe dya mùsongà kadivwa dyumvwijiibwe to. Nwamonu anyi? "Nda ku

wesete, kadi walukile.” Anyi, ncyôcì eci anyi, m’Banjelo mwandamutekete mu kasumbu aka badi balwe kúndi abu anyi?

<sup>387</sup> Nenku pângààtwilanganà neenu ku Dituku dya dibiika dya ku lufu, nenumone ne ncyêna ndinga to; Nzambi, Mulumbulwishi wanyi.

<sup>388</sup> Anyi, eci ki katongobela kiibîdi kâmwvâ mwambe dituku dyadya aku anyi? Ncitangile cintu kampanda cyalwa bwa Ekeleeziya anyi? Ncyêna mumanye to. Ndi mufwanyine kushaalapu ndambu, kadi nêntungunukè.

<sup>389</sup> Ncifwanyine kwikala cyôcì aci, mukungulu wa bukole awu, anyi Mwanjelo wa mwandamutekete mu mwandamutekete awu, kasumbu aku, kasumbu kaa cipungu cya mwandamutekete aku, cipaapu cyabo cya musaka ciikale cyenza mu mmwenekelu kampanda (basatu luseke, ne umwe ku lusongo), biikale batuuluke bafumina mu Cyendelele? Ncifwanyine kwikala cyôcì aci anyi?

<sup>390</sup> Eci ki bwalu busokoka, bwa Mikungulu, bwikalà mwa kwaluja Dibwe dya mùsongà anyi? Nudi bamanye ne, cipaapu cya musaka aci kacituku cyanji kwikala cyasa mùsongà to. Dibwe dya mùsongà dicide ne cya kulwa. N’Dibengiibwe. Ncidi cifwanyine kwikalaku anyi’s, bânà beetu baa balume, bânà beetu baa bakaji?

<sup>391</sup> Anyi, ki yêyè Nkokelu Mwisâtù uvwaYe mungambile, kukaadi bidimu bisatu anyi binaayi awu anyi?

<sup>392</sup> Nkokelu wa Kumpala, nudi bavuluke cyâkenzekà anyi? Ngâkateeta kuMuumvwija. KwambaYe ne: “Kwenji nanku to.”

<sup>393</sup> Nkokelu Mwibîdi, kwambaYe ne: “Kuteeciku to.” Kadi mêmè kukoka, nansha nanku. Nudi bavuluke anyi? Nwênù bônso nudi bavuluke. Bidi pa mikaba ya mêyi ne bikwabo byônso.

<sup>394</sup> Ki pashiishe kwambaYe ne: “Mpindyewu kudi Nkokelu mwisâtù wâlwa, kadi kuteeciku kuMuumvwija nansha.” Nudi numona mûndi mulenge Eci, diloolo edi anyi? Ncyêna mumanye to. Kadi, ndi ndyumvwa mwena dibanza, kudi ekeleeziya wanyi, bwa kwamba cintu kampanda. Nwênù nwâmbaayi mwenu peenu munwamona amu.

<sup>395</sup> Mpindyewu, eci neciikale bwalu busokoka budi bufwanyine kukangula, budi bufwanyine kulwa ne Kilisto, kutwadila Ekeleeziya Bukole anyi? Nwamonu anyi? Tukaadi . . .

<sup>396</sup> Tudi twitabuuja kanyinganyinga, kubatiijibwa kwa mu Dîna dya Yesu Kilisto. Tudi twitabuuja dipeta dya Nyuma Mwîmpè. Tudi ne bimanyinu, maalu a kukema, bishima, dyakula dya mu myakulu, ne bintu bivwa Ekeleeziya wa ku cibangidilu naabi abi. Kadi, bwa kwamba menemene, nkwenzeke ne bipite apu, mwaba ewu mene, bipite ne bidi bifunda mu Mukanda wa Byenzedi, mu kasumbu kakese kamwepele kaa bantu aka, mudimu mukese menemene wetu twêtù wa bwambi udi mwaba

ewu ewu. Kadi twámbe bishi bwa buloba bujima? Nwamonu anyi? Bipite ne bidi bifunda mu Mukanda wa Byenzedi, bya mushindu umweumwe awu! Dibiisha dya bafwe! Vulukaayi ne, kuvwa bantu anu basatu cyanaana bàakabiishiibwà, ku bafwe, kudi Yesu Kilisto. Kadi twètù tudi ne bujaadiki, majaadiki a kudi bangangabuka, ataanu. Nwamonu anyi?

<sup>397</sup> “Byenzedi bìndì Mémè ngenza, nenwènzè nwènù bipite ebi ku búngì.” Ndi mumanye ne King James udi wamba ne “bitambe bunene,” kadi kwèna mwa kwenza cintu nansha cimwe citambe bunene to. Byòbì abi bipite búngì! Yèyè uvwa mu Muntu umwepele musangu awu; Udi mu Ekeleeziya mujima mpindyewu. Nwamonu anyi? “Nenwènzè byàbúngì bipite ebi, bwalu Ndi nya ku Taatù.”

<sup>398</sup> Piikalabi ne eci ki Nkokelu Mwisâtù, nanku kudi mudimu wa bwambi munene usanganyiibwa kumpala kutuyaaya eku. Ncyèna mumanye to. Ncyèna mwa kwamba to. Ncyèna—ncyèna mumanye to.

<sup>399</sup> Tangilaayi. Nkokelu Mwisâtù, twánjàayi kwimana pa cyôci aci, kakese. Mu cikeena-kumona aci, dibuuka dya kumpala divwa dya tunyuunyi tukese tumisanjeela atu; apu mpatùcivwaà tubangilaku. Wàkadyunda, kuumukila anu ku dikwata dya muntu ku cyanza cyanaana.

<sup>400</sup> Kadi nudi bavuluke cyakangambilaYe anyi? “Wèwè mwikale ne meeji matooke, nebyenzeke ne umanye ne bwalu mene budi busokome bwa mu myoyi yabo.” Mbanganyi badi bavuluka ne cyôci aci cyakamanyishiibwa mwaba ewu, ne mu matunga ônsò? [Disangisha didi dyamba ne: “Amen.”—Muf.] Kadi cyakenzeka anyi? [“Amen.”] Menemene. Pashiishe kwambaYe ne: “Kuciinyi nansha. Mémè nêngìikalè neebe.” Nwamonu anyi? Nenku necitungunuke.

<sup>401</sup> Mpindyewu, Nkokelu wa Kumpala uvwa ntunyuunyi tukese, twa menemene; twàkabùùkà atu. Twàkaya bwa katuutakeenatu ne cikondo, kutuutakeena ne Dilwa dya Mukalenge; Mukenji wa kumpala.

<sup>402</sup> Musangu mwibîdi, maalu masokome a mu mwoyi. Kuumuka ku dikwata dya muntu ku cyanza, ne kwimana anu mwaba awu kadi kwamba civwaye naaci; musangu wàkalondà, cyakasokolola mpekaatu yabo ne kubambila civwa cikengela kwenza. Ne kwenz- . . . Ncyà bushuwa anyi? [Disangisha didi dyamba ne: “Amen.”—Muf.] Pashiishe, aci cyakenzeka, anu menemene, anu muvwa Nzambi mucyámbe. Ne nwènù nutu badimwene, ne buloba bujima kabidi, ne ekeleeziya kabidi.

<sup>403</sup> Pàngààkambà ne: “Ndi mumone Mwanjelo, ne Ûvwa wa Kapyà kaa diikala ditambe kutwila dya mâyi a matamba, kâlàkuka,” bantu baakaseka e kwamba ne: “Billy, wâfuluka.” Disù dya majimbu dya cyamu cya fòtò kuCikwatadi. Ncivwa ndinga to. Mvwa ngamba Bulelela: Nzambi e kushindikaye.

404 Mêmè kwamba ne: “Mundidimbi wa mîdimà mmubwikile; ndufu, mufiike. Kadi *Eci* ncitooke. Cimwe cidi Mwoyi, cikwabo cidi lufu.” Kadi’s ki Cyôci cyacya, mu fôtò lwà paanyima *pààpa*. Ku . . .

405 Bu mwakamba George J. Lacy—Lacy ne: “Dîsù dya cyamu cya fôtò eci kadyakukwataku bintu bya mu meeji to.” Nudi nundonda anyi? [Disangisha didi dyamba ne: “Amen.”—Muf.]

406 Monaayi, dibuuka dikese dya kumpala adi; cyanza. Diibîdi divwa dinene dipite apu, nkuci, mitambe bunene, mitambe kutooka; Nyuma Mwîmpè mwikale usokolola maalu masokome a mu mwoyi. Nenku dibuuka diisâtù divwa m’Banjelo (kayiyi nyuunyi to), Banjelo; nenku aci ncikondo cya nshiikidilu, ki cyônso civwaku ncyôci aci. Eci ki ciikalà cikondo anyi, mwaneetu? Eci ki cikondo mene anyi?

407 Mpindyewu teejeaayi ne ntema ya menemene, nenku kanuumvwiji eci bibi to. Ndi muswe kunukonkaku cintu kampanda.

408 Twânji twalukilaayi cyanyima kakese. Ekeleeziya mmumanye ne mbulelela. Beena maalu a mamanya mbamanye ne mbulelela. Ne bantu mbasômbe muneemu emu, diloolo edi, ne bààbúngi bacikàle ne mwoyi, bàvwà biimane ku musulu eku pavwa Dîyi adi dicyâmbè ne dîyi dikole, dyambe ne: “Anu mwàkatùmiibwà Yone ne mukenji wa dilwa dya kumpala, ki mudibi kabidi bwa Mukenji mwibîdi ewu, wa Dilwa diibîdi.” Nwavuluku anyi? [Disangisha didi dyamba ne: “Amen.”—Muf.]

409 Nenku piikalabi ne Cyôci aci cyajiki, Yone wakenza cinyi? Yone nyèyè wákamba ne: “Monaayi, ki Mwânà wa mukooko wa Nzambi udi uumusha mpekaatu wa baa pa buloba wawa. N’Yèyè wawa.” Diine dîbà adi, ki dyôdi dyafiki edi anyi, bânà beetu wanyi? Ncyèna ngamba ne dyafiki to. Ncyèna mumanye to. Kadi, ndukonko nzwela nwên’s. Ndi muswe bwa nwênù kwelangana meeji. Anyi, eci ki ciikalà cikondo ciikalabi kabidi ne: “Monaayi Mwânà wa mukooko wa Nzambi” anyi?

410 Anyi, cikondo cya Maalaki 4 ne: “Kwaluja myoyi ya bânà ku Diitabuuja dya baataatù beetu” anyi? Neciikale dikubakuba dinene diikalà—diikalà mwa kwenza bintu bya bukole menemene, mu mushindu wa difika ku diteeka Ekeleeziya, wa bwena udi mu matelu ne kayi mwa kuumvwa maalu masokoka a Nzambi, ne bikwabo ewu anyi? Paamonabo dikubakuba dya bukole adi diya lubilu, necikudimune myoyi yabo ne kuyaaluja kudi Taatù, mudi Bible mwambe ne ncyènzè amu anyi? Anyi, eci civwa m’Mukenji, mumane kupita, úvwà ne cya kwikala mucyènzè anyi? Ncyèna mumanye to.

411 Eci ki cimanyinu cya cikondo cya nshiikidilu, bakalenge. Anyi, eci ki cimanyinu cya ne kwajiki anyi? Cidi cimweka cya mu Mifundu menemene, bwanyi mêmè. Ncyèna mumanye to. Ki Banjelo abu mbôbô abu bavwa mwaba awu. Ki dikubakuba

ndyadi, dyenze bu mukungulu, dyàkakankishà buloba bujima. Nzambi mmumanye ne ndi ngamba Bulelela.

<sup>412</sup> Vulukaayi anu ne, cintu kampanda cidi pawwîpi ne kwenzeka. Ncyêna mumanye ne ncinyi to. Kadi ncifwanyine kwikala eci anyi? Kabingila kândi ngambidila bwalu ebu, dilongololaayi! Tusambilaayi, (kusambila bishi?) twangata kaaba keetu mu cilwilu cya beena kwitabuuja Bende, ne biikale tudilongolola, bwalu dîbà didi mwa kwikala dimane kuya kupita mutudi twêtù twela meeji emu.

<sup>413</sup> Nwênù aba nutu bammanyè, ne kacya ncutuku mwanji kunwambila dishima to, too ne mpindyewu, bwa ku dyanyi paanyi dimanya. Ne anu mwakabambila Samwele ne: “Kacya nkaadiku munwâmbilè cintu, mu Dîna dya Mukalenge, kacyi cyenzeke anyi?” Mpindyewu, ndi nkwambila mpindyewu. Ncyêna mumanye ne eci ncinyi to. Ncyêna mwa kwamba ne ncinyi eci to. Ncyêna mumanye to. Kadi, nênnwâmbilè Bulelela. Ndi mukwacike bwôwà. Mêmè bu mwaneenu, ndi mukwacike bwôwà nkubangila anu ku diisambombo dishaale aku.

<sup>414</sup> Cidi mwa kwikala cikondo cya nshiikidilu. Cidi mwa kwikala cikondo cya myanzankongolo yiya lubilu eku ne eku kwa dyulu, ne dimanyisha difumina mu maulu, dyamba ne: “Cikondo kacicyenaku kabidi to.” Piikalabi ne ncyôci aci, tudilongololaayi, nwênù balunda baanyi, bwa kutuutakeena ne Nzambi wetu. Kukaadi Cyakudya bûngi cyanaana cidi citeeka muneemu emu patudi twakulangana apa. Tukwataayi naaCi mudimu. Tukwataayi naaCi mudimu mpindyewu. Neku bwanyi mêmè, kuumukila anu pa cibumba cya ku cyambilu apa, ndi ngeela lubila kudi Nzambi ne: “Mukalenge Yesu, ikalaku naanyi luse!” Ndi muditacishe bwa kwikala ne nsòmbelu mutambe bwîmpè mwanyi paanyi mûndi mumanye. Ndi muditacishe bwa kutwala Mayiisha mu mushindu mutambe bwîmpè wûmwàku paanyi naawu, apatukila mu Diyî dya Nzambi. Nzambi ngudi mumanye mwoyi wanyi.

<sup>415</sup> Kadi, kasumbu kaa Banjelo aku nkenze anu kalwa lubilu mu citupa cya buloba aci, mvwa mushaale anu bu mukwacike tukulakaji. Ncivwaku mene nansha mwa kuumvwa bôbô bandenge to, munda mwa mukûngûlù mule. Mvwa mene ndyumvwa anu bu ne, paanyima paa mukûngûlù mule, nteeta bwa kwendakana mu cibambalu amu, nansha mene kuumukila mu bwongo bwa mu manungu a mwongo wanyi, ne kuulu ne kwînshi kwa nshingu, mvwa menemene anu bu mukwacike tukulakaji, bu nanku’s, nciyiku mwa kuumvwa bôbô bandenge to. Ncivwa mwa kuumvwa to, mu byanza byanyi. Mvwa mushaale bu lungenyi lunjimine, dituku dijima. Mêmè—mêmè kuya anu mu cibambalu amu e kusômbela panshi.

<sup>416</sup> Mu dyalumingu, mêmè kulwa mwaba ewu bwa kwakula, kadi mêmè—mêmè kuteeta bwa kucyumusha mu mutu, ku

dyakula. Mu dimwe, civwa anu naanyi kabidi. Ne ncyeci cidì mwaba ewu patudi twakulangana apa.

417 Nenku ncyèna mumanye to. Ncyèna mumanye to, bakalenge. Ndi mèmè anu ne meeji matooke, kunudi, nwènù bu bânà beetu. Ncyèna mumanye to. Dìbà dyà—dyàkùmbanyi anyi? Mudimu wa bwamb-... bwalu busokoka bwajiki bwònsò anyi? Dyela dya mpungi dyajiki dyònsò anyi? Nyòyi bulelela Mikungulu Mwandamutekete ayi, miikale pabwìpi ne kwamba cintu kampanda, bwa kasumbu kakese kadi kadisangishe aka kapete Diitabuuja dya Dyambwibwa, bwa kuyaku mu Dyambwibwa paalwaYe anyi? “Bwalu netushintuluke,” lukasa anu muvwa Banjelo abu balwe amu, “mu katanci, mu mubunyi wa disù; ne netwambwibwe pamwe ne aba bavwa balaale tulu, bwa kutuutakeena ne Mukalenge mu mpeepele.”

Disambila dyanyi ndyòdì edi:

418 Nzambi, piikalabi ne bidì nanku, ncyèna mumanye to, Mukalenge. Mèmè mvwa anu ngambila ekeleziya cyanaana. Piikalabi ne bidì nanku, Mukalenge, ulongololeku myoyi yetu. Enzaku bwa twikale badilongolole, Mukalenge, bwa dìbà dinene adi, ku maalù malonda ònsò a cikondo, baprofeta bònsò ne beena meeji bavwa anu bindile cikondo aci. Mukalenge, ndi mupange ne cya kwamba. Ndi mufwanyine kuumvwa bwòwà bwa kwamba ne: “Kulu to, Mukalenge.” Ndi ndyumvwa mèmè mwine bundu, pândì ntangila mmona buloba mu ngiikadilu udibu ewu, ncyènàku mwenze kupita pa cìndì mwenze pa bwalu ebu to. Ndi ndyumvwa mèmè mwine bundu. Piikalabi ne maalaba udiku, Mukalenge, laaba mwoyi wanyi maanyi. Undaabeku maanyi matambidile, Taatù, bwa ngaamonaku mwa kwenza cyònsò cìndìku paanyi mwa kwenza aci, bwa kufikisha bakwabo kùdì Wèwè. Mèmè ndi Webe.

419 Ndi ndyumvwa anu bu Yeshaayi, mu ntempelu dituku adi, paakamonaye Banjelo bapaapala batwa kumpala batwa paanyima, ne mapwapwa mabwikile mpala Yabo, mabwikile makàsà Aabo, biikale bapaapala ne mapwapwa ne: “Wa cijila, wa cijila, wa cijila!” Kaa, mushindu mwine uvwa muprofeta wa citende awu munyungishiibwe’s we. Ùkaavwa mubange kwenda kukola ndambu. Kadi paakamonaye aci, nansha mukaavwaye mumonemone bikeena-kumona amu, wakeela lubila lukole ne: “Dyakabi dyànkwàci!”

420 Taatù, pàmwápa mèmè mvwa bu muumvwe mushindu awu, pàmvwà mumone Banjelo abu diloolo adi, anyi dinda adi, eyowa’s we. Dyakabi dyànkwàci, bwalu ndi muntu wa mishiku mibiipe, ne ndi musòmbè munkaci mwa bantu babiipe. Nenku, Taatù, nsukùlèku.

421 Kadi’s ki mèmè ewu. Ntumaaku, Mukalenge, cyònsò cidìku aci. Ne nyewu ndi mwimane mu cyambilu emu mùndì nsanganyiibwa kukaadi bidimu makumi asatu. Piikalaku cintu

kampanda, Mukalenge, cyûdi Wêwè muswe bwa mêmè kwenza, s'ki mêmè ewu. Ndi mudilongolole, Mukalenge. Kadi, swaku mpeteku ngàsà ku mèsù Kwebe. Ne kudipwekesha kwònsò, ki mêmè udi ulomba ewu.

<sup>422</sup> Ndi ndombela kasumbu kakese kaa mikooko kadi Nyuma Mwîmpè munteeke mutangidi, bwa kwikala kubadiisha. Nenku nyewu ndi mwenze mwanyi paanyi mwònsò mûndi mumanye, Mukalenge, bwa kubadiisha ne Dyâmpà dya Mwoyi. Anu muvwabi mu cikeena-kumona aci, kukaadi bidimu byàbûngì, muvwa cilâmbà cikudika cinene aci cisanganyibwa mu Wesete, ne mukuna wa Dyâmpà dya Mwoyi; kakanda kakese aku kaa ne: “*Ncyâkashikuka Ku Cikèènà-Kumònà Cyà Mu Dyulu Nànsha.*” Kadi’s ncyeci cyenzeka cyònsò, cibuludiiibwe anu kumpala kwetu mene.

<sup>423</sup> Wêwè ki Nzambi, ne kakwena mukwabo to pa kuumusha Wêwè. Twâkidilèku, Mukalenge. Tûfwilèku luse ku mpekaatu yetu. Nyewu nyingalala bwa bupidya bwanyi bwònsò, bwa bubi bwanyi bwònsò. Nyewu ntendakeena ku cyoshelu cya Nzambi.

<sup>424</sup> Pândi ndwa diloolo edi apa, ne kaekeleeziya kakese aka kumpala kwanyi, ku diitabuuja tudi tuumuka mu citanda eci, mu dyambwibwa, “bu mutudi basòmbe bònsò pamwe mu myaba ya mu Dyulu,” banyungulukile Nkwasa wa butumbi wa Nzambi. Myoyi yetu mmivwijiibwe kapya misangu ne misangu, mu maalu atukaadi bamonemone Wêwè wenza, ne mwikale utubuulwila maalu Ebe masokoka. Kadi, Mukalenge, diloolo edi, nyewu ndi mucyokakane yònsò. Dyakabi dyânkwâci!

<sup>425</sup> Ne—ne Yakobo, paakamonaye Banjelo abu batuuluka ku cibandilu ne baalukila, wakamba ne: “Ewu mwaba ngwa wenza bwôwà, kî mmwaba mukwabo naka to ùdi anu nzubu wa Nzambi.” Ki Bethel kwibakiibwaye mwaba awu.

<sup>426</sup> Nzambi, bantu kabatu bumvwa ciine aci to. Batu beela bôbò meeji ne ncifwanyine kwenza disanka dyàbûngì. Kadi, Mukalenge, ncintu kaayi cya dicyokakana, cya cyenza bwôwà bwa muntu wetu wa maci ne mèsù ewu kubwela mu Bwikadi bwa Kampanda munene wa bukole bwònsò, wa mu Dyulu.

<sup>427</sup> Ndi ndomba difwidiibwa dya luse dya kaekeleeziya kaanyi kakese aka, kaudi Wêwè muntume bwa—bwa—bwa—bwa mêmè kulombola ne kuludika. Bâbènèshèku, Mukalenge. Ndi mwenze bilondeshile cidi bikeena-kumona ne biloota ne bikwabo byambe, nenku, ku dyanyi paanyi dimanya. Ndi mukûngwijemù Cyakudya cyònsò cîndi paanyi mumanye aci, bwabo bôbò, Mukalenge. Nànsha ciikale cinyi, Mukalenge, twêtù aba tudi Beebe Wêwè. Nyewu tudilambula mu byanza Byebe, Mukalenge. Ikalaku neetu luse. Tûfwilèku luse. Ne enzaku bwa twikale bantemu Beebe misangu yònsò yitucidi pa buloba. Pashiishe, piikala mwoyi mulwe kujika, watwakidilaku

muulu mu Bukalenge Bwebe. Bwalu tudi tulomba nunku mu Dìna dya Yesu. Amen.

<sup>428</sup> Muntu ne muntu wa kunudi, kezula mwoyi webe wònsò. Teeka ku luseke bintu byònsò, bujitu bwònsò, ùbyùmùshè mu njila webe. Kulekediku cintu nansha cimwe cikutacisha to. Kwikadi ne bwòwà to. Kakwena cintu nansha cimwe cya dikwacikila bwòwà to. Piikalabi ne Yesu ulwalwa, cidi. . . Ki cikondo citu buloba bujima butwiletwile mikemu ne bwelelelele mbila. Piikalabi ne ncintu kampana cya cibwayika mpindyewu, bwa di—dilwa dipyadipya, dilwa dipyadipya dya dipà dipyadipya anyi cintu kampana, nebiikale bilenga bya dikema. Piikalabi ne ndilwa dya cikondo cìkalà dibuuludiibwa dya Mikungulu Mwandamutekete ayi ne cya kubuuludiibwa kudi Ekeleeziya, mushindu wa kuya, ncyèna mumanye to. Mémè ndi mwambe anu cìmvwà mumone. Kaa, ekelekele, cikondo kaayipu's we! Mbya kwelangana meeji ne dísù dikole ne kakuyi tuseku to.

<sup>429</sup> Ne piikalabi ne ncifwanyine kwikala cikondo cyanyi mémè cya kuya, mémè's ndi wenu. . . Mukalenge, ndi Webe Wèwè. Pawajikija Wèwè apu, wâlwa, Mukalenge Yesu.

<sup>430</sup> Kwònsò kudibi bifwanyine kwikala aku, anyi dîbà dyònsò didibi mwa kwikala adi, mémè ndi Wende Yèyè. Ncyèna ngamba ne ndi ne dijinga dya kuya to; to. Ndi ne famiye mwikale ne bânà baa dikolesha. Ndi ne Evanjeeliyo wa diyishi. Kadi, aci mbilondeshile diswa Dyende Yèyè, kî ndyanyi mémè to. Aci ndiswa Dyende Yèyè. Mémè ncyèna mumanye to.

<sup>431</sup> Ndi mémè nzwambila anu cidi bwalu. Cidìku aci, Nzambi ngwèza bwa cyènzèkè. Kadi mémè ndi nzwambila cìndi mumone ne cidi cyènzèke. Bwa cidìci cyumvwija, ncyèna mumanye to. Kadi, bakalenge, eci ncifwanyine kwikala nshiikidilu anyi? Uh!

<sup>432</sup> Bantu abu badi mwaba ewu patudi twakulangana apa, bantu basambombo bàvwà baloote biloota abi abu. Kabyenaku bikemesha muvwabi kabiyi mwandamutekete anyi? Kì mbya bikemesha menemene anyi? mùdi bisambombo abi bilombole anu too ne kuulu aku, ne pasiishe cikeena-kumona aci, dyakamwe. Bantu abu badi mwaba ewu. Mwaneetu Jackson, mwaba ewu, ùvwa umwe wa ku bôbò; Mwaneetu Parnell uvwa mmukwabo; Mwaneetu wa bakaji Collins uvwa mmukwabo; Mwaneetu wa bakaji Steffy uvwa mmukwabo; Mwaneetu Roberson uvwa mmukwabo; ne Mwaneetu Beeler uvwa mmukwabo kabidi. Ne Taatù wa mu Dyulu mmumanye ne kakuywa cikwabo nansha cimwe citangila bwalu abu to. Ne ku ndekeelu wa ciine aci, cya mwandamutekete. . . cívwa ncyà Mwaneetu wa bakaji Steffy, ki dyakamwe cikeena-kumona kubwayikaci. Nudi numona anyi? Nudi numona ne mbwa cinyi ndi nguumuka anyi? Nudi numona ne mbwa cinyi bidi bikengela mémè kuya anyi? Ndi ne cya kwenza nanku.



433 Nenku, balunda baanyi, kanwikadi nutangila kûndi mêmè to. Mêmè ndi mwaneenu. Kanwikadiku nwatuma ntema nansha mikese kûndi mêmè to, bwalu ndi anu muntu wa cifwaka. Ndi ne cya kufwa anu mudi muntu mukwabo yònsò ufwa emu. Kanwikadiku nunteeleja mêmè to; kadi nwikale nuteeleja cîndi mwambe aci. Cîndi mwambe aci ki Mukenji. Kanwikadi nutuma ntema nansha mikese kudi musanjeela to; tabaleelaayi Mukenji. Nulame mèsù enu matangija, kî nkudi musanjeela to, kadi ku Mukenji. Cîdi Wôwò awu mwambe aci, ki cintu cya nwnènù kutangila ncyôci aci.

434 Nenku Nzambi atukwacisheku, ki dyanyi disambila ndyôdi adi. Ndi nkina . . . Ncivwa muswe kulwa, bwa kunulondela ciine eci to, kadi ncivwa muswe kushaala mulame bwalu pamutu paa kunwambilabu to.

435 Mpindyewu, bwa ku dyanyi dimanya, lekelaayi nnwămbilè. Bwa ku dyanyi dimanya, nênguùmukè mu matuku abidi anyi asatu adi alonda aa, mu diisâtù mu dinda, ku . . . nya ku Tucson. Ncyakuya ku Tucson bwa kuya kayiishaku to. Ncyèna nyaku bwa kayiisha to. Nyaaya ku Tucson, mbwa kasòmbesha famiye wanyi ne kubweja bânà mu tulaasa, ne pashiishe kushaala mulalakanyi.

436 Ndi mbànda ku Phoenix, bwa kuya kenza ndambu mukese wa masangisha malondangane awu, wíkala pâmwâpa anu Mayiisha makese mu nyungulukilu amu. Ne—ne pashiishe, pâmwâpa, ncyèna . . .

437 Ngeela meeji ne mbaswe bwa mêmè kuyiisha mu cibilu mu diloolo dimwepele. Kabatuku bambe cintu nansha cimwe pa bwalu abu to, mbambe anu ne nêngiikalèku. Nwamonu's, aci kaciyena cimweka cîmpè menemene to, bwanyi mêmè.

438 Kadi ndi mupete dîyi, EMU MMUDI MUKALENGE WAMBA, bwa Mwaneetu Shakarian pende. Uh-huh. Ncyèna mumanye ne cyenzaye ne ciine aci ncinyi to, kadi ndi mupete dîyi dya kumwambila yèyè. Ncyèna mumanye ne cyenzaye ncinyi to. Ncimutangile anu yèyè. Nuvwaku bamone *Dîyi* dya ndekeelu adi anyi? Cidi ne cya kwikala kaciyi bulongolodi kampanda to, kadi bôbô bâm̄b̄i patooke twitabaayi wabo. Bulongolodi, pa dîbà adi mêmè's ngâshàadi kule naaci. Ndi ndopoka mu bya nanku awu.

439 Mpindyewu, bwa didicinkila, Mwaneetu Arganbright ne Mwaneetu Role, cyenda ne mikanda wa mfumu mu Washington mukwatekwate mudimu ne Bamfumu baa ditunga mwandamutekete, bidi bikengela asanganyibwe mu Afrike. Nenku Mwaneetu Role, ne mêmè, ne Mwaneetu Arganbright, netuye dyakamwe mu Afrike, bwa masangisha kampanda mu Afrike wa ku Sud ne mu Tanganyika, ne Mwaneetu Boze. Nenku tutungunuka, ne pâmwâpa tukapicila mu Australie, ne kuyiila kwôkô aku, twalukila, piikala Mukalenge kayi mwenze cintu

kampanda cya cishiilangane to. Kadi, kumpala kwa mêmè kuyaku, nêngànji kwalukidila apa.

<sup>440</sup> Pashiishe, pângiikalà mukufume, piikala Nzambi kayi mwakule naanyi to, mu mushindu mukwabo kampanda, nêngàngatè famiye bwa kuya ku Anchorage, mu Alaska. Eku kwòkò mpankaci paa sud ne wesete; kwaka naka nekwikale pankaci paa nord ne wesete. Nenku ndi mbashiyaku mu movù wa luuya wònsò awu, cikondo cidiku luuya lukole mu Tucson mu mushindu wa lukwosha dikoba ludyengulula aci. Ncyèna ngeela meeji ne mbafwanyine kulutwala to. Mbafwanyine anu kuumvwa majiya ne batekeshiibwe mu maboko! Katwena tusumbisha nzubu to. Ùdi ushaala anu kuntwaku, ne nkwaswa ne meesa ne malaalu anu mu nzubu amu. Ncyèna mumanye cya dyenza to.

<sup>441</sup> Pashiishe, cikondo cyajika movù wa luuya, bu Mukalenge mwa kwanyisha, ndi muswe kuumuka ku Alaska, ne kupweka lwa ku Denver, pankacinkaci paa wesete; lwà pankaci paa sud ne wesete, lwà pankaci paa nord ne wesete, munkacinkaci mwa wesete, ngeela mbila ne: “Éyi Mukalenge, cyùdi Wèwè muswe bwa mêmè kwenza ncinyi?”

<sup>442</sup> Munkaci mwa ciine cikondo aci, Diyiisha dyònsò, ku dyanyi paanyi dimanya, diikala mwa kuyiishibwa adi, nediyiishibwe anu mwaba ewu mene, mu tabernacle emu. Apa ki piikala mikaba ya mèyi ne cya kusanganyiibwa. Apa ki padi ciimamwëndè wa bukalenge.

<sup>443</sup> Nenku ncyèna ne dijinga dya kushaala, mêmè ne famiye wanyi, mu Wesete to. Nyaaya bwa kukeba too ne pândi mpeta cidi Nzambi muswe bwa mêmè kwenza.

<sup>444</sup> Piikala eci cidimu kacyi cifile cipeta to, pa dîbà adi, cidimu cyalwa, nciyi ne mâyi anyi ne cyakudya to, nêmpatukè nye mu cipeela, ne nêngindilè too ne pambiikilaYe apu. Ncyèna mwa kutungunuka ngenda nya paanyi anu mushindu ewu nansha. Bikengela ushaale too ne paudi ushiikila. Bikengela ufike mu mushindu wa ukeba kumanya ne diswa dya Nzambi didi cinyi. Ne mmunyi mùdi mwa kwenza diswa paudi kuyi mumanye diine diswa adi?

<sup>445</sup> Ndi ngenda nkeba, bwa bwalu bwa nshindameenu wa cikeena-kumona awu wa ne: “Ciwakenza aci.” Nwamonu anyi? Ngenda nyunguluka bu missionnaire ne bu mutangadiki, too ne paalwa dibiikila adi. Nudi nuvuluka dya kumpala adi, patwakateeka dibwe dya mu ditumba adi anyi? “Enza mudimu wa mutangadiki,” mwakambaYe. Kaakamba ne: “Wèwè udi mutangadiki” to. Kadi: “Enza mudimu wa yèyè awu,” pàmwāpa too ne paalwa cikondo cya cintu kampanda cikwabo, dishintuluka dikwabo dya mudimu. Ncifwanyine kwikala cintu kampanda cya cishiilangane. Ncyèna mumanye to.

446 Nudi baMunange anyi? [Disangisha didi dyamba ne: “Amen.”—Muf.] Ikalaayi batwishiibwe menemene bwa cyôci aci. Ikalaayi batwishiibwe menemene bwa cyôci aci, badi banange Mukalenge abu.

Aba badi bindila Mukalenge, nebvawijulule  
makanda abo mapyamapya,  
Nebabuuke ne mapwâpwâ bu mukanku,  
Nebanyeeme lubilu kadi kabayi bacyoka to,  
nebëndè lwa makàsà kabayi bapangila to;  
Kaa, ndongèshè, Mukalenge, ndongèshè,  
Mukalenge, mwa kwindila.

Mêmè ndi muMunange. Ndi mumanye ne, ne nwênù peenu. Mpindyewu, maalaba diloolo . . .

447 Ngeela meeji ne ndi mucitookeshe bîmpè bya menemene. Mmwômò anyi? [Disangisha didi dyamba ne: “Amen.”—Muf.] Mucitookeshe bîmpè ne mwanyi paanyi mûndi mumanye mwa kucitookesha amu, ki cyônsò cîndi mumanye. Ki cyônsò cîndi mumanye cya kwamba. Ne piikalaci cibuludiiibwe kûndi, bwa cintu kampanda, nênnwâmbilè ne lukasa lwônsò. Ndi mumanye ne nwênù aba, nudi baswe bwa kumanya. Mêmè paanyi, ndi muswe bwa kumanya. Ncyêna mumanye civwaci cyumvwija to. Ncyêna mumanye ne nkwèpì—nkwèpì kûnyaaya to. Ncyêna—ncyêna mumanye ciikala mwa kwenzeka to. Ndi—ndi anu . . . Cintu cimwepele cîndi mumanye, nyaaya paanyi anu nanku awu, ku ngàsà wa Nzambi. Pashiishe, Yèyè ki wângambila pângiikalà nkaadi mukafike kwine aku, pâmwâpa. Kadi, wanyi mudimu patudi twakulangana apa ngwa ne, kuya. Ne mbifwanyine kwenzeka ne nciikadi kuntwaku mbingu yibidi, nciyi muye mwaba kampanda mukwabo to, ne mufwanyine kwalukila apa. Ncyâ bushuwa. Ncyêna mumanye to. Kadi ndi . . .

448 Mu cikeena-kumona amu muvwa mukajaanyi ne bânà baanyi. Ne cintu ciine civwâku, mvwa nsanganyiibwa mu dikaadika dibwikila. Ne katanci kângênjì bwa kubwelamu, muvwa, nkaavwa mu kashinyi kaanyi kaa mukokakoka. Nenku mushindu awu ki utwikala mwa kuumuka, mu matuku abidi adi panshi aa, katuyi bamanye kutuyaaya kwine ne nkwèpì, katuyi bamanye cituyaaya kenza ciine ne dînà ncinyi patwaya kakufika to, tuyaaya peetu anu nanku.

449 Nzambi ùtu kayi dyumvwa to, bwetu twêtù, bwalu Yende njila kayitu kulonda kupeta to. CidiYe ukeba nditumikila.

“Kûyaaya nkwèpì Wèwè?”

“Abu kî mbukutangile to. Tungunuka wèwè anu ne kwenda kuya.”

“Nkwèpì Kûdì muswe bwa mêmè kwenza, Mukalenge?”

450 “Aci kî mbwalu bwebe to. Wèwè, ndonde Mêmè.” Uh-huh. Uh-huh. “Tungunuka wèwè anu ne kwenda kuya.”

“Nêngiìmanyinè penyi?”

“Bwebe budi penyi mwaba awu? Tungunuka wêwè anu ne kwenda kuya.”

Pa nanku, ki mêmè uyaaya ewu, mu Dînà dya Yesu Kilisto. Uh-huh. Amen.

Ndi muMunange, ndi muMunange  
Bwalu Yêyè wakannanga kumpala  
Ne wakampetela lupandu  
Pa mucu wa Kalvariyo.

Ndi... (Yêyè ke wanyi mwoyi.) Ndi... (Kî  
cyònsò cîntù mwikadile ne mwoyi aci!)  
Bwalu Yêyè wakannanga kumpala  
Ne wakampetela lupandu  
Pa mucu wa Kalvariyo.

<sup>451</sup> Bakalenge, eci ki cikondo ciine anyi? [Mwaneetu Branham ne disangisha badi bimbila *Ndi MuMunangè* mu matama, cyapamwe, bwa kujikija cipungulujidi cijima aci—Muf.] Ne patudi tuwimbulula apa, labula muntu kampanda udi ku luseke lwebe aku awu ku cyanza. Amba ne: “Mwaneetu wa balume, mwaneetu wa bakaji, unsambidileku. Mêmè nênkusambidilè.”

Ndi . . .

<sup>452</sup> Unsambidileku, Mwaneetu Neville. [Mwaneetu Neville udi wamba ne: “Nêngenzè nanku, mwaneetu. Unsambidileku, mwaneetu. Twasakidila.”] Ne meeji matooke a menemene’s! [Muntu mukwabo udi wamba ne: “Nzambi akubeneshe, Mwaneetu Branham.”] Unsambidileku, mwaneetu wa balume. Unsambidileku, mwaneetu wa bakaji. Unsambidileku.

. . . wakannanga kumpala  
Ne wakampetel- . . .

<sup>453</sup> Usambileku, unsambidileku, . . . ? . . . Unsambidileku, . . . ? . . . Unsambidileku, . . . ? . . . Unsambidileku.

. . . mucu wa Kalvariyo.  
Bwalu ndi . . .

Twèlààyaaku mpindyewu byanza byetu muulu kudiYe.

. . . ndi muMunange . . . (Dinanga dilelela!)  
Bwalu Yêyè wakannanga kumpala  
Ne wakampetela lupandu  
Pa mucu wa Kalvariyo.

Eyowa, ndi . . . (Ne mwoyi wanyi wònsò!)

<sup>454</sup> Londa, Mwaneetu Neville. Nkaadi ngaalukila. Manyisha cikondo cìikalà disangisha.



*ECI KI CIMANYINU CYÀ NSHÌIKIDILU ANYÌ, MUKALENGE? LUA62-1230E*  
(Is This The Sign Of The End, Sir?)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu dilòlò, mu matùkù 30 a ngondo wa dikumi ne mwibidi, cidimu cya 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)